

星旁

經遠通志稿卷二十二上
第二十六冊

綏遠通志稿卷二十二上

墾務

綏遠農田在有清一代其初率為私墾蒙漢人民私相授受官
府聽其自由發展未嘗過問也至季年始特派大臣督辦蒙墾
東墾西墾先後創興河套水利同時並舉而墾務遂為綏政之
大端然論其濫觴實不始於近代徵諸史跡蓋已早起於先秦
歷代郡縣其地未輟耕耘漢唐屯墾規模尤為宏大五代宋金
國力不及綏西而為夏國所據有故自秦漢迄於元代雖版圖
有時不屬於中朝而人民力田如故也其間惟東漢建安以後
東晉太興以前經九十餘年全省土地歸於荒廢即明自中葉
地盡入於蒙古而內地漢民負耒出疆仍未絕跡特範圍較小
純屬私墾而已茲略稽史籍所載歷代經營墾殖之事次錄於

後所以不惜繁徵博引者。欲以見自古西北實邊之計。蓋莫先於農墾云。

史記秦始皇本紀。三十二年。始皇乃使將軍蒙恬發兵三十萬人北擊胡。略取河南北地。三十三年。西北斥逐匈奴。自榆中並河以東屬之陰山。以為三十四縣。城河上為塞。又使蒙恬渡河取高闕。陶山北。假中築亭障以逐戎人。徙謫實之初縣三十六年。遷北河榆中三萬家。

漢書食貨志。徙貧民於關以西。及充朔方以南。新秦中七十餘萬口。上郡朔方西河河西開田官斥塞。卒六十萬人戍田之。武帝紀。元朔二年。遣將軍衛青李息收河南地。置朔方五原郡。夏募民徙朔方十萬口。元封四年。遣拔胡將軍郭昌屯朔方。天漢元年。發謫戍屯五原。主父偃傳。偃盛言朔方地肥。

饒外阻河蒙恬築城以逐匈奴內省轉輸成漕廣中國滅胡之本也。上覽其說下公卿議皆言不便。公孫弘曰秦時嘗發三十萬衆築北河終不可就已而棄之。朱買臣難詘弘遂置朔方匈奴傳是後匈奴遠遁而幕南無王庭。漢度河自朔方以西至今居往往通渠置田官吏卒五六萬人稍蠶食地接匈奴以北。王莽傳遣尚書大夫趙並使勞北邊還言五原北假膏壤殖穀異時常置田官乃以並為田禾將軍發戍卒屯田北假以助軍糧。

案史記匈奴傳謂始皇帝使蒙恬將十萬之衆北擊胡悉收河南地因河為塞築四十四縣城臨河徙適戍以充之。此與始皇本紀所述發兵三十萬以為三十四縣之文不同。蓋兵則紀多而傳少縣則紀少而傳多也。同為史記所

載而互異如此。雖班孟堅生當漢代，其志地理已不能悉舉縣名而辨明之，則後人於此益無能為役矣。又陶山當是陽山，傳寫之為漢書匈奴傳正作陽山。

後漢書光武帝紀十二年十二月遣驃騎大將軍杜茂將衆郡弛刑屯北邊築亭候修烽燧。又杜茂傳建武十二年遣謁者段忠將衆郡弛刑配茂鎮守北邊。因發邊卒築亭候修烽火。又發委輸金帛繒絮供給軍士并賜邊民。寇蓋相望茂亦建屯田驢車轉運。

漢官儀世祖中興海內人民可得而數裁十二三邊陸蕭條靡有孑遺。鄣塞破壞亭隧絕滅。建武二十一年始遣中郎將馬援謁者分築烽候堡壁稍興立郡縣十餘萬戶或空置太守令長招還人民上笑曰今邊無人而設長吏治之難如春

秋素王矣。乃建立三營。屯田殖穀。弛刑謫徒。以充實之。
案後漢自光武遣杜茂馬援等先後於北邊置屯殖穀。其
後成效若何。范氏書殊少述及。故後世讀史者往往以為
自南匈奴內徙。朔方五原雲中諸郡殆已全廢。其實不然。
考後漢書崔寔傳。寔為五原太守。五原土宜麻枲。而俗不
知織績。民冬月無衣。積細草而臥其中。見吏則衣草而出。
寔至官。斥賣儲峙。為作紡績織絀。練縕之具。以教之。民得
以免寒苦。觀此文。則知自光武至桓帝時。北邊農田尚未
盡廢也。惟資生之計甚窘耳。
魏書太祖紀。登國九年。使東平公元儀屯田於河北五原。至
於相陽塞外。食貨志。太祖定中原。接喪亂之敝。兵革並起。民
廢農業。方事雖殷。然經略之先。以食為本。使東平公儀壑闢

谷

谷

河北自五原至於相陽塞外為屯田。天興初制定京邑。東至代郡。西及善無。南極陰館。北盡參合。為畿內之田。其外四方。四維置八部帥以監之。勸課農耕。量較收入。以為殿最。案魏書言屯田而與今綏遠有關者。當以刁雍傳所敘為最詳。雍於太武帝太平真君五年任薄骨律鎮將。六年開艾山新渠成。溉官私田四萬餘頃。七年雍表曰。奉詔高平安定。統萬及臣所守四鎮。出車五千乘。運屯穀五十萬斛。付沃野鎮。以供軍糧。臣鎮去沃野八百里。道多深沙。輕車來往。猶以為難。設令載穀。不過二十石。每涉深沙。必致滯陷。又穀在河西。轉至沃野。越渡大河。計車五千乘。運十萬斛。百餘日。乃得一返。大廢生民耕墾之業。車牛艱阻。難可全至。一歲不過二運。五十萬斛。乃經三年。今求於牽屯山。

河水之次造船二百艘。二船為一舫。勝穀二千斛。一運二
十萬斛。方舟順流五日而至。自沃野牽上十日。還到合六
十日。得一返三返。運送六十萬斛。計用人功輕於車運十
倍有餘。不費牛力。又不廢田。詔許為永式。考魏薄骨律鎮
在今鄂托克旗黃河西岸。沃野鎮在後套狼山口附近。正
如今日由平羅運糧到臨河。順流而下。其勢甚便。此古今
形概之可對勘者。故詳錄之以備參証云。

隋書食貨志。開皇三年。是時突厥犯塞。吐谷渾寇邊。軍旅數

起。轉輸勞敝。帝乃令朔州總管趙仲卿於長城以北。大興屯

田。以實塞下。趙仲卿傳。仲卿拜朔州總管。於時塞北盛興屯

田。仲卿總統之。微有不理者。仲卿輒召主宰撻其胸背。或解

衣倒曳荆棘。棘中時人謂之猛獸。由是收獲歲廣。邊戎無餽運

之憂。

案隋自開皇三年由朔州總管趙仲卿總統屯田。至十九年即封染干為啓民可汗。使居朔州之大利城。並劃勝夏二州地予之。則趙仲卿所創屯田。至此始又變為牧場矣。唐書食貨志開元二十五年詔屯官敘功以歲豐凶為上下。鎮戍地可耕者人給十畝以供糧。天下屯田收穀百九十餘萬斛。初度支歲市糧於北都。以贍振武。天德靈武鹽夏之軍。費錢五六十萬緡。汴河舟溺甚衆。建中初宰相楊炎請置屯田於豐州。發關輔民鑿陵陽渠以增溉。京兆尹嚴郢嘗從事朔方。知其利害。以為不便。奏疏不報。郢又奏五城舊屯其數至廣。以開渠之糧貸諸城。約以冬輸。又以開渠功直布帛先給田者。據估轉穀。如此則關輔免調發。五城田闢。比之浚渠。

利十倍也。時災方用事，郢議不用，而陵陽渠亦不成。然振武天德良田廣袤千里，元和中，振武軍饑，宰相李絳請開營田，可省度支漕運及絕和糴欺隱。憲宗稱善，乃以韓重華為振武京西營田和糴水運使，起代北墾田三百頃，出贓罪吏九百餘人，給以耒耜耕牛，假種糧，使償所負粟。二歲大熟，因募人為十五屯，每屯百三十人，人耕百畝，就高為堡，東起振武西逾雲州，極於中受降城，凡六百餘里，列柵二十，墾田三千八百餘里，歲收粟二十萬石。省度支二千餘萬緡。重華入朝，奏請益開田五千頃，法人七千，可以盡給五城。會李絳已罷，後宰相持其議而止。李景略傳：景略為豐州刺史，天德軍西受降城，都防禦使窮塞苦寒，地瘠鹵，邊戶勞悴。景略至，節用約己，與士同甘蓼，鑿咸應，永清二渠，溉田數百頃，儲稟器

械畢具。威令肅然。聲雄北疆。回紇畏之。高霞寓傳。霞寓拜振
武節度使。會吐蕃攻鹽豐二州。霞寓以兵五千屯拂雲堆。虜
引去。又浚金河。溉鹵地數千頃。盧簡方傳。簡方徙大同軍防
禦使。大開屯田。練兵侈鬪。沙陀畏附。
冊府元龜。會昌六年五月。敕節度靈武。天德。振武三城封部
之內。皆有良田。緣無居人。久絕耕種。自今以後。天下囚徒合
處死刑。情非巨蠹者。特許生全。并家口配流。此三道仍令本
軍鎮各收管安存。兼接借農具。務使耕種。
案唐於三受降城。及天德。振武轄境內。經營規畫。為時最
久。蓋自貞觀至天祐之末。二百八十年間。築城置守。移民
屯田之事。史不絕書。此有唐一代始終重視此土之明證
也。惟歷年既久。農事時有盛衰。亦為情勢所必然。無足怪

者觀於會昌赦文有久絕耕種之語則中經衰歇不難想見然至唐末李國昌克用父子連年轉戰仍不能不恃振武天德為兵食之源則唐家之經營遺澤猶有足以沾被後人者是其規模之宏遠視前後諸代為獨優矣宋司馬光論復置州豐劄子略謂臣等伏見國家復置豐州故城仍差人知州此誠河西險要之地修之甚便然其地勢孤絕外迫寇境向者王氏知州之時所部蕃族甚衆有永安來遠保寧三寨皆以蕃族守之慶歷初拓跋元昊攻陷州城州民及三寨蕃族盡為所虜掃地無遺今州城之中但有邱墟瓦礫環城數十里皆草莽林麓而已若建以為州則須復設外寨備置官吏廣屯兵馬多積芻糧皆應調發內地之民以奉之勞費甚大此所謂徇虛名而受實弊也頃年朝廷欲修

豐州城河東經略司嫌其單外。迺於其南數十里築永寧堡。其地窪下居兩山間。疏惡難守。今既修豐州則永寧堡深在腹內。無所復用。臣等以為不若遷永寧堡於豐州故城。其兵馬芻糧不須增益。但擇使臣有材畧者使守之。不必假以知州之名。仍召募蕃漢之民使墾闢近城之田。俟民物繁庶。皆如其舊。然後升以為州。亦未晚也。取進止。

案今綏遠省境當北宋時黃河以東屬遼。黃河以西屬西夏。宋之版圖能伸入綏界者僅有為王承美父子所置之豐州一隅而已。其地在鄂爾多斯左翼前旗之南部。考宋史王承美傳州有戶百六十餘。口四百餘。比之今日特一小村耳。蓋王氏本蕃族。降宋後即其所居之地置州以示羈縻。惟司馬光劄子既有墾闢近城之田一語。姑存之以

備此州之掌故焉。

遼史興宗本紀。重熙十三年四月丙辰西南面招討都監羅漢奴詳穩幹魯母等奏山西郡族節度使屈烈以五部叛入西夏乞南北府兵援送寶威塞州戶。詔富者遣行餘留屯田天德軍食貨志。統和中耶律昭言西北之衆每歲農時一夫偵候一夫治公田二夫給亂官之役。當時沿邊各置屯田。戍兵易田積穀以給軍饟。故太平七年詔諸屯田在官斛粟不得擅貸在屯者力耕公田不輸稅賦。此公田制也。餘民應募或治閒田或治私田則計畝出粟以賦公上。

案遼自太祖任韓廷徽始制國用太宗籍五京戶口以定賦稅。聖宗以後沿邊各置屯田易田積穀以給軍糧。此蓋五京官田私田閒田之通制也。綏遠於遼屬西京道是為

五京之一。當時奉行此制，殆無可疑。惟遼史單言西京道田事者極少，故續文獻通考謂遼史文簡略，農田租賦所紀寥寥，故官田水利田事俱不及詳。觀此數語，可知耶律氏一朝雖頗重勸農積穀，而由於史志疎略，不能闡明其跡，則不獨西京一道為然矣。茲僅就遼史所述農事之有關天德軍及西北邊者，擇錄二節以存一代之規。所謂披沙揀金，所得雖微，而彌足珍乎。

金史章宗本紀：承安二年十二月癸未，遣戶部侍郎上官瑜體究西京逃亡勸率沿邊軍士耕種。泰和四年九月壬申，定屯田戶自種及租佃法。五年以軍戶屯田地寡，括官民田給之。

續文獻通考：泰和五年二月上，先聞六路括地時，其間屯田

軍戶多冒名增口以請官地及包取民田而民有空輸稅賦
虛包物力者應詔陳言人多論之至是尚書省言若復遣官
分往照案訟言紛紛何時已乎遂令虛包稅石已輸送入官
者命於稅內每歲扣之時主兵者言比歲征伐兵多敗衄蓋
屯田地寡無以養贍至有不免饑寒者故無鬪志願括民田
之冒稅者分給之則戰士氣自倍矣

案金改遼之道為路則續通考所謂六路者即包括西京
路在內也而當時綏境各州皆隸西京路故本條所錄亦
聊示六路田事之同然耳

又案元朝屯田徧全國據新舊元史所載其事甚繁然於
屬今綏境之興和集寧淨州德寧等路及豐州沙井諸處
獨無一事可考原因何在殊難臆測此真所謂文獻不足

徵也。故暫闕以俟博識者補之。

明陝西三邊總督曾銑請復河套疏。附墾田計劃略謂：將套中之地預為闢撥，多為魚鱗籍冊，以防日後弊端。每軍民一戶給田二頃，俾歲耕一頃，閑一頃，是為閑田，以養餘力。其沿邊軍民亦出名募，有欲守邊者皆給以田，引黃河之水為大小之渠，以溉田，可備旱澇。高黍下稻，任土所宜。數年之後，套地可盡墾，而又仿井田之意，廣溝洫之制，吾民易於稼穡，勇於馳驅。既臨河設險，夏秋絕難侵犯，我得耕稼矣。比及河凍，農事已竣，乃於講武之時，作禦虜之計，民不告勞，農不告費，行之既久，則河湟之地不異中州云。

案曾銑之計劃比前條所引宋司馬光請復豐州之擬議尤為空洞。因司馬氏所言者地屬宋有事屬可行，而曾氏

所言者則須俟取得河套之後方能實現。是徒寄希望於
敵人之土地。雖欲不謂為空談不可得也。觀有明一代終
不能越邊牆而開尺寸地。則套之能否取得。其效亦可觀
矣。惟明有中葉以後。內地人民貧乏。或負罪者。往往潛赴
塞外。墾田自存。其見於載籍最為顯著者。嘉靖三十九年
夏。叛人邱富、趙全、李自馨等。住古豐州。其地崇山環合。水
草豐美。築城建墩。宮殿甚麗。開闢良田數千頃。接東勝。號
曰板升。板升。華言房屋也。又當明末鼎革之際。籍隸山陝
之官紳。起兵抗拒清軍。兵敗後。無所為計。則挈家至塞外
避禍。荒山僻野。耕稼其中。或以名捕急而入蒙籍。迄今綏
人猶有能指其後裔者。

清順治中始編伊克昭烏蘭察布兩盟各旗及歸化城土默特

二旗。乾隆初年設廳於土默特境內。屬山西省。於是旗境漢蒙錯居。築室耕田。儼同內地。其後漢人日多。漸至河套。租地耕種。道光以後。蔓延及於後套。浚渠數十道。墾田至數萬頃。而套墾幾恢復漢唐之宏規矣。

案清順治初年已有獎勵墾荒之命。但僅限於各州縣衛所。尚未能顧及塞外游牧區域也。至康熙八年。因國家承平日久。生齒殷繁。始諭令宗室官員兵丁。有自願耕種口外閒地者。由其都統資送。按丁撥給。惟是時膺命墾荒者。為數寥寥。迨雍正元年。復頒詔令。敕督撫以下官員勸導人民開墾曠土。聽其相度地宜。自墾自報。並於每年設總理大臣。專司口外報糧編審事宜。於是人民爭相報墾焉。十二年。察哈爾右翼四旗空閑官地盡闢。生聚日衆。乃置

豐川寧朔二衛鎮寧懷遠二所於其地以資捍衛乾隆十
 五年併豐川鎮寧為豐鎮理事通判廳寧朔懷遠為寧遠
 理事通判廳分屬山西大同朔平二府以管理邊外官地
 及察哈爾正黃西半旗正紅鑲紅鑲藍三旗蒙古與漢民
 交涉事務綏東墾務於時已入於極盛時期查清通典乾
 隆三十四年豐寧二廳報墾太僕寺牧廠地一千五百五
 十五頃七十餘畝三十九年又報墾二萬一千五百五十
 五頃而綏西墾務此時尚在萌芽也厥後綏西田疇交錯
 渠道縱橫時而綏東又早已邑聚殷闐繁榮倍增矣
 康熙年間清公主以下嫁外蒙貝子路經歸化城公主愛其地
 土田肥沃水草豐美遂留居焉朝廷發國帑於歸化城相地建
 築府邸土默特旗奏請効納公主地畝數千畝旗志未以資墾

牧迨後附近四村承墾納租地近黑河可資灌溉即今所謂四
村水地者是也稽之旗志所載墾地此為最初報墾之田焉

皇朝通志雍正十三年六月歸化城都統丹津協辦尚書通

智等奏請將土默特境內閒曠膏腴之地八處作為大糧官

地飭交地方征糧以備軍食奉旨飭廳文放征收賦役善盛曰

墾地一千五百頃原交托廳後歸薩廳二千頃西爾格三廳補

圪圖爾四日什拉烏素三處共墾地七千頃交薩托二廳五

日清水河墾地二萬七千五百頃交清廳六日特穆爾昂力行七

地二千五百頃交和廳以上八處共墾地四萬石又雍正年間奏

萬頃每畝征米三升共征米一十二萬倉石又雍正年間奏

給右衛八旗馬廠地一段在和廳界奏給十家莊頭地六百

頃在歸廳界
皇朝通志乾隆二年七年九年十六年五十四年先後奏交
歸廳文放渾津黑河二里官地四百餘頃二年文放薩廳長

| | | | | | | | | | | | |
|-------------------------|------------------|-------------------------|-------------------------|-------------------------|-------------------------|-------------------------|---|-------------------------|-------------------------|-------------------------|-------------------------|
| 清史略爾吉善傳乾隆七年山西巡撫疏言歸化城土默特 | 亦有右衛廂藍旗牧廠原放地四百餘頃 | 慶二年兩次丈放山後八旗廠地六千九百餘頃清廳界內 | 年奏交五廳地畝二百餘頃作為鰥寡孤獨賞項六十年嘉 | 三十七年奏交五廳丈放代買米地一千五百餘頃四十二 | 地一段二十六年奏放大青山後十五道溝官地四百餘頃 | 禁蜈蚣壩後私墾廠地案內有雍正十三年民墾十七根牛 | 城八旗牧廠地二萬四千餘頃 <small>原為陸公共游收</small> 五年二月閉 | 千四百餘頃五廳共丈放官糧地二萬餘頃三年効納綏遠 | 二百餘頃丈放清廳時和年豐家室盈寧八里官地一萬三 | 地一千一百餘頃丈放和廳物阜民安上下也里官地三千 | 泰寧善四里官地一千九百餘頃丈放托廳安興遵三里官 |
|-------------------------|------------------|-------------------------|-------------------------|-------------------------|-------------------------|-------------------------|---|-------------------------|-------------------------|-------------------------|-------------------------|

蒙古不諳耕種。以地典給民人。生計窘迫。請將民人所輸銀。徵解將軍。分給蒙古用度。如尚有可耕地。一體招民墾種。大學士等議行。

山西通志。乾隆三十六年。權山西巡撫事朱珪奏。撥歸化綏遠二城穀十餘萬石。搭放兵糧。以省采買。而免紅朽。奏免土默特蒙古私墾之罪。以所墾牧地三千一百餘頃。許附近貧者兵民認耕。納租。歲得銀六千餘兩。增官兵公費。又奏太僕寺牧地苦寒。宜改徵折色。以便民除弊。皆下部議行。皇朝通志。嘉慶十四年。文放撥補莊頭四旗。廠地七百九十餘頃。

清史列傳。文孚傳。嘉慶十二年六月。奉命赴歸化城查辦土默特旗員控將軍案。七月。擢通政使司副使。旋以綏遠城將

軍春寧山西巡撫成齡奏請將綏遠廳

案即綏遠城糧餉廳

之渾津黑

河等處地畝改徵折色其不敷支放兵糧米石將大青山馬

廠餘地招墾補額上命文孚等就近詳細履勘九月奏渾津

黑河共莊頭十三戶每戶原認種地六十頃嘉慶四年以地

畝贖壞奏准豁免一百八十餘頃餘仍交糧分種今莊頭等

復以地畝生贖請改折色查生贖之地不過十之一二若因

此一二分贖地並將無贖者全行改徵不惟現在兵糧不敷

支放且腴贖混淆亦不足以昭平允應請按地認真覈計不

堪種藝者悉予開除其並無贖性之區仍令照舊交糧無許

妄生覬覦至大青山馬廠除已墾六千餘頃尚餘草地二萬

頃原可通融籌墾惟滿營牧馬亦關緊要誠恐招墾以後游

民趨利逐漸偷開招之易而驅之難不可不防其漸請將從

前開墾並此次奏開若干頃外。查明未開草地。各按四至界址。堆立鄂博。或挖壕塹。嚴禁偷開。庶兵楮足敷支用。而馬廠尚留有餘。俾資收放。下部議行。

者。獻類徵嘉慶十二年九月復命將軍慶怡詳查履勘。奏言查渾津黑河共莊頭十三戶。渾津十戶。黑河三戶。每戶原認種地六十頃。嘉慶四年渾津莊頭呈報地畝。贖壞經前任將軍永慶奏准豁免餘地一百八十餘頃。其餘五百九十餘頃。各莊頭仍舊交糧分種。九年間莊頭等復以該處地畝生贖。呈請改徵折色。經將軍春寧等具奏。屢經部議。現在逐細履勘。約略牽合計算。有贖者不過十分之一二。若因此一二分贖地。並將無贖之地改徵折色。不惟見在不敷兵糧。抑且腴贖混淆。不足以昭平允。應請按地認真覈計。其實係生贖不

堪種藝之區。卽與開除其餘並無賺之區。仍令照舊交糧。毋
許妄生覬覦。如此辦理。則所短兵米無幾。易於籌補。卽將馬
廠開種。亦屬招墾無多。不至有礙游牧。至大青山八旗馬廠。
地面遼廓。招墾以後。無業游民趨利若鶩。甚至引類呼朋。逐
漸偷開。招之易而驅之難。請將從前奏准開墾六千餘頃。並
此次奏開若干頃外。查明未開草地頃數。各按四至界地。堆
立鄂博。或挖壕塹。嚴禁偷開。並造冊送備案。庶兵精足數。支
用而馬廠尚留有餘。俾資收放下部。議行蒙民交便。
續皇朝通志。道光十二年。達爾漢茂明安土默特三旗有爭
地一案。是年七月。派內大臣松筠馳往歸化城查辦。八月。松
筠督同副都統惠顯副盟長公喇特那巴拉等。逐處履勘。查
明自克籌堆記東北一帶。直至哈達瑪勒河山後。係達爾漢

所屬山前係土默特游牧。有乾隆二十年圖記。茂明安爭土
默特之沙拉哈達地方屬寶。自克籌鄂博東至哈達瑪勒河
山前係土默特游牧。山後係達爾漢游牧。有乾隆二十八年
圖記。達爾漢爭土默特山前地方屬寶。松筠按照原字原圖
堆記履勘。曉諭茂明安。札薩克及達爾漢貝勒皆折服。松筠
又奏言。自哈達瑪勒河東至托蘇圖山。係四子部落郡王伊
什登游牧。南接土默特游牧。北係達爾漢游牧。三旗地界應
一律查勘。又南係延壽寺喇嘛游牧。亦宜添設堆記鄂博。各
清界址。永杜爭端。從之。

清史列傳剛毅傳。光緒十一年。擢山西巡撫。疏陳籌議套外
躔金等處屯田事宜。曰。躔金即台吉地。屬河北外套。係伊克
昭盟所屬之達拉特。杭錦兩旗牧界。河坐落西北。斜向東南。

袤長五百餘里。平川廣漠，一望無垠。正北狼山，迤西紅山，即黃河舊道，由南北行，折而迤南，迤東之處，則東大奈、太什拉干、烏拉前山、後山、峰巒湊接，氣勢迴合，續而不斷，由西而東，漸就收泊。此躔金一帶山勢，地向之大略也。套外地勢西南高而東北低，溯查康熙以前，河行北道，並無水利。自改行南道，蒙古始令素與交易之商租種分佃，即就黃水衝刷低窪處所，因利乘便，修成渠道。西則躔金，計共五渠；東則土人名為後套，計共三渠。中間支渠曲折蜿蜒，不可枚數，而餘水仍可退至河之舊道，由東北折向西南，繞過烏拉前山之西山，嘴歸入南河。土本膏腴，渠又順利，麥、穀、梁、秫種無不宜，以故山陝直隸無業之民，從前承佃到此，均能自立生業。此套外一帶水利土宜之大略也。達拉特旗收界內台吉波羅搭拉

地方道光八年曾奉諭旨准其租給商種五年抵還債項嗣後奉部文而承種者有之由台吉而私放者有之由各廟喇嘛公放者有之開墾甚多至同治初年甘回逼擾寧夏躋全附近各商分立仁義禮智信五社辦理團練以資安輯迨後防剿各軍駐紮防堵或設臺轉輸各商分辦運糧致荒本業渠道旋壞不復疏濬只存一二巨商不忍棄業力耕自給而土人所稱後套地方商人其時尚復不少迨光緒二年馬賊蹂躪不特躋全之僻在西陲者牛楸商號不過數家即後套左右亦不過二百餘家該處土本紅壩利於澆灌現在紅柳及~~鐵~~草枸杞樹等茂然成林聞咸豐年間達旗歲收租銀不下十萬近歲所收租錢不及三千串文此達拉特旗套外地界今昔衰旺懸殊之大略也今若於該處議設屯政則險

要藉以扼地利藉以復蒙旗藉以贍誠如原奏所云於時局不無裨益等情臣伏念躔金一帶誠能及時籌議屯政無事則固吾邊圉免為逋逃淵藪有事則防敵伺隙便於控制事機策誠至善第該旗收地歷經奉旨准其租種抵債以及養育閑散備辦公費等項與他處蒙古無看閑田不同臣閱伍至薩拉齊之包頭伊克昭正盟長固山貝子札那吉爾迪來見據稱該盟達拉特等旗聞有是議率皆懽忻鼓舞冀開屯後上可急公下可沾利惟是目前議屯先務其要約有三端一曰公段套外西則躔金和永牛壩上下東則後套沙忽廟左右均屬適中之地於此分為三段撥兵一千躔金正紮三百二道壩渠以西分紮二百湖爾廟正紮三百西山嘴南哈木爾臺少北分紮二百且耕且練西可以聯絡甘涼隴秦之

聲氣東可以聯絡余太之馬營每兵一名給田五十畝計需
田五百頃並給牛種光就易開之渠督兵挑修通暢以後兵
農兩便兵則耕種自食由營官經理其餘地畝悉由蒙古商
人按照向規辦理以仍其舊惟兵屯地段如西山嘴哈木爾
臺少北等須就近借撥烏拉特地其餘各就近借撥杭錦達
拉特地以資分撥一日修渠套外渠道達拉特杭錦二旗為
最多此外則烏拉特中旗界內大余太船有山水一道向來
引水澆地寬窄不過二十里兩旗界內西山嘴南有珊瑚灣
河道無庸另開大渠止須於灣之東北建築一壩多開支渠
則烏拉前山之前全歸澆灌西口界內有烏拉河渠一道係
藉黃河北流舊道之口引水澆地曩係商人自開各旗領租
若開商屯應將躔金後套各渠官為修濬通利其各處舊商

界內支渠仍責成各商修理。務臻一律順暢。以利引澆。如此則商即易於招徠。蒙又多獲租價。將來或再於尋常租價外酌加商人二成交官。名曰地糧。以資公費。其租多寡仍由蒙商自行定價。不准抑勒。一曰設官。套外地方連烏拉特三旗收界合算。東西袤延七八百里。南北斜寬二百里。至三百六七十里不等。蒙界址商民不能深悉。向年租種者。往往此招彼逐。致啟爭端。今既議開屯墾。該處距薩廳甚遠。勢難兼顧。擬另設文武官各一員。駐紮躔金。專理兵屯商屯事務。其設官經費。即取給於地糧二成。免耗公帑。遇有屯兵滋事。即會同營員辦理。如商款租暨蒙人逐佃。官為分別訊理。免致構釁。以上三端。不過撮其大綱。至屯墾詳細事宜。必俟奉准開辦時。再行條議具奏。但事屬創始。需用浩繁。庫乏積儲。經費

無出。則籌款難。開辦必自兵屯始。口外地方遼闊。現練軍駐紮要隘。無可抽調。則撥兵難。該處係達拉特、杭錦、烏拉特等旗牧地。必須籌商畫一。方可通融屯墾。則借地難。計惟有裁撤樹軍。另行挑練屯軍。樹軍歲需餉銀八萬四千餘兩。現咨照大同鎮總兵張樹屏查照遣撤湘軍章程。厚給資糧。分起護送回籍。計歲省銀八萬四千餘兩。擬仿練章於大同鎮屬額兵內挑兵千名。作為屯軍。歲需薪糧。及加練軍餉。乾銀二萬八千餘兩。尚餘銀五萬六千餘兩。即作屯費。尚可無庸別籌。如將來屯務得手。屯餉等項。均有所出。即將節省樹軍全餉報部備撥。若夫應借蒙部地段。及招商納租辦法。應請旨飭下伊克昭正盟長並烏蘭察布盟長轉行達拉特、杭錦二旗暨烏拉特等三旗遵照妥議。或先試辦三年。如有明效。即

行相地審宜。斟酌損益。著為定章。無失寓兵於農之意。疏入得旨。下所司議。格不行。

五原廳志略。重修河套四大股廟碑記。廟以記文略謂康熙

三十六年。初定蒙界。界內民人耕種。界外蒙古遊牧。是時海

宇清平。刁斗不警。孽生蕃庶。界內民人漸感人稠地狹。則越

界開墾。畊種。私放私種。常啟爭端。道光八年。奉特旨開放躔

金招商耕種。達賴杭蓋。案即達拉特亦將河套節次開墾。是

地距河咫尺。開渠澆田。咸仰黃河之水。數十年來。商人不啻

千百。屢開屢淤。工巨利微。幾成荒土。光緒初年。有直隸順德

府邢台縣籍王傑者。偕子同春。字澹川。來遊是地。見大河縈

繞於前。福山鍾靈於後。草木蔚然。地皆膏腴。寥寥水田。漸成

陸地。喟然嘆曰。前之商人不諳地勢水性。所以開之易。淤之

亦易。彼時地皆有主。無聽其言者。惟山西交城商人張振達。獨具卓識。邀請同春君至公中。菲套曰公中地酌議重新開渠之事。君即應允。度其高下。即為興工。不數日。工人鱗集。遵夏禹王導河之法。做神李冰開渠之規。渠口廣狹合度。枝渠深淺得宜。高不病旱。卑不病澇。耕者數百戶。咸獲其利。二十年來。不知歉歲。家給人足。老安少懷。雖藉二儀之造化。實資一人之經濟。

土默特旗檔案。光緒十三年奏放土默特六成官地三千餘頃。先是土默特地與達拉特旗地南北隔河。以黃河為界。達旗在河南。土默特在河北。咸豐六年。因黃河改道南徙。土默特旗境內涸出之地甚多。兩旗爭地。致起糾紛。互控於部院。旋奉派欽差大臣紹祺來綏勘斷。以六成歸土默特。以四成

歸達拉特。故兩旗後有六成糧地。與四成糧地之稱。而以河
為界之成例。從此破矣。
米訪錄。察哈爾右翼正黃旗署。有乾隆四十九年二月十八
日本旗奏摺底簿。內載事蹟。頗可窺知。清初四旗土地大概
情形。略謂本旗哈爾沁蘇木牧地一千八百七十五頃七十
八畝。又喀爾沁明安等處開墾地七百九十餘頃。又荒地三
十九頃。康熙四十九年至五十七年。出租漢民耕種。雍正九
年。察哈爾蒙古都統奏。該地蒙漢民等。因租種地畝時起爭
端。奉旨禁止租種。十二年。欽差右侍郎阿散等。查丈地畝。復
奏。該地不便遊牧。仍懇開放。奉准後。由部咨山西巡撫。飭豐
川衛守備會同正黃旗總管。勘明四至丈清畝數。仍招民租
種。當編造花戶清冊。送交大同朔平理事通判存案。並存於

本蘇木伍領衙門口粟一百零一張等語。綜合觀之。四旗土地。在清初已有漢民租種。中經雍正年之封閉。復成一片蒙荒。迨至雍正末年。乾隆初年。始由公家正式開放。節次招民墾佃。蒙漢兩方。又復私放私種。年既久遠。拓殖漸廣。其情形與土默特及兩盟各旗正復相同。據皇朝通志載。雍正十三年。曾經一度遣官清丈察哈爾西四旗之地畝。文定之奏請。當在雍正間。未准開禁之時。通志所謂遣官清丈者。或即侍郎阿散奏請開禁之一事歟。自是而後。歷乾嘉道光。蒙荒有開而無禁矣。至光緒八年。山西巡撫張之洞。以察哈爾右翼蒙地分隸豐鎮寧遠兩廳。蒙員地畝。私相授受。歷有年所。於是年。選派幹練人員。設立豐寧押荒局。局設省城實行勘辦。約清出地一萬餘頃。征收押荒。照章升科。十一年。奏結。二十五年。

復行續辦。截至貽穀接辦之日。據豐寧押荒局報稱。兩次墾地共三千餘頃。實則已墾而未報者。固不止此數。已報而未經官文放者。尚未及半耳。二十八年。將押荒舊局改為豐寧墾務局。所有收項。款目及剩存部照。一併截清。於是年五月。開局接收。歸入東墾籌議辦理。

案自來言。綏墾者。大都注意河套。良以套地沃土平行。河流貫注。實邊屯墾。斯為奧區。不特為本省辦墾之中心。亦國家開發西北發軔之所在也。上述墾殖沿革。固不限於河套一隅。惟歷代經營套地。用力為多。屯墾之事。始於秦。或於前漢。至東漢則稍衰矣。經魏晉之荒棄。又復興於北朝。隋唐繼之。雖規模不逮前漢。然後此者。莫或過焉。五代及宋。以中原積弱。北族方強。遂隔絕不通。是時遼金夏元。

雖皆統治於此。郡縣其地。而因史志簡略。文獻無徵。農墾之蹟。所傳蓋寡。明初雖嘗撫有東勝、玉林、雲川等地。而謀國者無遠識。不知固守。旋即棄之。迨有清入關。本省疆域始與內地各省悉隸。版圖屯墾。雖未大興。而自私墾令除。民墾至為發達。東西千餘里。隴畝縱橫。村落櫛比。蔚成西北重鎮。視漢郡縣之多。雖有遜色。較唐羈縻之治。則遠過也。綜觀我國。值中朝殷富強盛之時。則斯地必在經畫建置之列。若遭荒廢棄置。亦可卜中原已成杌隉擾攘之局。晉宋明之邊釁事。豈出於偶然哉。履霜堅冰。其來漸矣。史冊昭然。歷歷可考。是則本省之有關於中國大局者。豈淺鮮哉。故當今西北墾殖一事。所當急為講求者也。爰雜取載籍略紀其沿革。訖於光緒中年。自是以後。興辦墾務。是

為本省由民墾入於官墾之時期。其詳見後編。
有清一代。本省為民墾最盛時期。其由官丈放之糧地。廠地等。
不過二十之一耳。光緒中年。山西巡撫張之洞。剛毅。胡聘之。迭
有奏請開放蒙荒之議。迄未見諸實行。二十七年。以晉撫岑春
煊復行建議。始有專員督墾之命。維時清廷以時艱日亟。西北
空虛。防邊首在實蒙。實蒙莫先開墾。在昔雖有私墾之禁。積久
已成具文。西北蒙旗生計已漸由牧而進於畊矣。二十八年。督
辦蒙旗墾務大臣。貽穀受命辦墾。東起察哈爾境。西訖寧陝邊
界。皆為預定應墾之區。貽遂首與晉撫會籌勘辦蒙墾辦法。並
定東墾西墾分段進行步驟。是年四月抵綏。原議先由近晉之
烏拉特各旗入手。後以西墾一時未能就緒。改為先辦東墾。八
月奉旨。加理藩院尚書銜。赴察後。會同都統奎順。劃定晉直兩

省及察哈爾左右兩翼地界。十月東墾事務開始設局辦理。察
旗界內王公馬廠一律報墾。並同時辦理籌贖西盟賠教地事
宜。而西墾以兩盟各旗札薩克始聞開墾招租之朝命。無不欣
然樂從。繼信奪地礙收之浮言。又復中情迴惑。遂有十三旗聯
銜會懇理藩院轉請緩辦之舉。嗣奉詔旨飭院嚴切催辦。於是
杭錦達拉特任正副盟長之二旗首先派員來綏就議。以次準
格爾郡王札薩克烏審鄂托克五旗亦皆先後報墾。至二十九
年夏西墾亦已開端。而烏盟各旗則仍觀望。延未與議。是時東
墾右翼之墾務進行已過半矣。當二十八年墾務開辦之初。因
經費無源。鉅款難集。且為革除東墾地商把持舊弊。及為西墾
籌贖蒙旗賠教地畝。興辦河套水利。均須有所資墊起見。爰奏
設東路西路兩公司。分設張家口包頭鎮兩處。招商集股。與官

股合辦。將來收放地畝。墾局亦可收提綱挈領之效。而伊盟杭旗於二十九年春。就議報墾後。旋復延抗。遲遲不肯指交地界。該旗札薩克阿貝子竟因此開去盟長職務。八月奉旨。貽穀補授。綏遠城將軍。是年冬。以綏遠城八旗牧廠地墾放較難。擬試辦屯田於達旗。賠教地。經墾局墊款贖出。即行收地。又放。是為西墾正式放地之始。亦有風示各旗。繼起報墾之意。三十年秋。又墾大同鎮馬廠未放餘地。並奏撥附近察哈爾旗直晉邊廳學堂地畝。全蒙教案墾款收地。一律完結。冬。勘查渾津黑河莊頭餘地。清理升科。三十一年春。杭旗悔悟。報地輸誠。奏准該旗貝子以盟長記名。遇缺題補。至於清理土默特旗地畝事宜。因其頭緒繁雜。境內又遭旱荒。暫從緩議。七月。奏陳統籌後套渠道全局。宜大加修治。推廣利源。以規久遠。殺虎口在河西之

站地亦於冬季收歸官壑。至是伊盟壑務暢行無阻矣。是年秋冬之間。雖有準格爾旗丹丕爾之抗壑。事出一隅。未至牽動全局。而烏盟壑務延至三十二年秋。各旗始陸續認壑。蓋距辦壑之初。已積五年之久。原議西壑先由烏盟三公旗着手。其究也。烏盟各旗翻居最後。肅親王善耆素為蒙旗所崇信。時掌理藩院事。以烏盟始終抗壑。乃在朝命之督催疆臣之請求下。嚴檄烏盟。迅速遵行。曉以利害。並特派道員陸鍾岱到綏。嚴催就議。時經數月。始由六旗出具聯銜印文。一致派員報壑。五年梗議之事。一旦幡然改圖。西壑至是完全暢通。事無阻滯。先是在東壑將竣之日。正西壑進展之時。前在包頭鎮設有西壑一局。後以西壑事繁。將歸化總局移併包局。為西盟壑務總局。統轄杭達兩旗放地開渠各事。其郡札各旗。另設分局。遇事報由包局。

核轉此三十一年冬間事也。及烏盟既就範。三十三年春驗收五旗報地。陸續設局招墾。烏拉特中旗前報之地。劃歸前旗專報。中旗尚須另行指地。故未及同時驗收。夏貽穀巡視西盟各處。渠地冬始設局清查。土默特地畝。朔綏墾自開辦。以至暢行。凡經六年。其艱難曲折。幾於節節頓挫。亦可見開邊大事創始者。若是其不易也。三十四年春。督辦蒙墾大臣綏遠將軍貽穀與歸化城副都統文哲琿因事齟齬。互訐於朝。清廷派大學士鹿傳霖等來綏查辦。以貽穀辦墾有二誤。四罪覆奏。奉旨革職。掣回。解京交部治罪。文哲琿同時亦受革職處分。墾員斌儀、景祺、姚學鏡均革職。交部治罪。其餘文武各員均治罪有差。歷年辦墾保案一併撤銷。以信勤補授墾務大臣。綏遠將軍未到以前。印務着歸綏道胡孚宸暫行護理。綏墾經此打擊。六載經營。

廢於一旦。各旗方當聯翩報墾。渠工大興。沃壤宏開。蒙漢兼利。而竟以參案歸於停頓。功敗垂成。時論惜之。自是而後。繼任將軍亦未能踵其成規。續圖發展。宣統末年。所謂墾務者。僅專事調查墾款。催收舊款而已。

案墾務參案起於文都統。以當日情事觀之。查辦大員原無成見。惟隨員中主奏贖者。素不慊於貽穀。於查辦事項未免。意存張大。冀聳觀聽。實則未盡情實。鹿公又適以卧病。未加詳察。遽以入奏。而大獄興矣。夫東墾西墾。區域延長二千餘里。事創而鉅。情複而艱。毀譽朋興。自在意中。民情樂於觀成。難於圖始。自古已然。蒙利私墾。民利私種。情也。辨墾則地歸官放。征收荒價。蒙民之有怨言。亦情也。苟使辦理得宜。國計民生。胥受其福。雖措置張弛。未免遭一

時之浮議而實邊興墾終欲立百世之宏規貽穀之於綏
墾國內自有公論暫沉寃於當時卒昭雪於民國嘉謨良
法後之來綏辦墾者猶多遵循勿替至今綏人數其遺跡
仍緬懷追憶而不能已焉故本志於覆奏原案略而未載
錄其查辦上諭以存當日參案之大概別有貽穀被議後
上政府當局書雖曰詞出一面然於辦墾真相切近事情
多矣其書略曰穀籌邊無狀辜負天恩朝廷法外施仁暫
寬一死聖慈高厚感激涕零方負罪引慝之弗遑尚敢論
辨是非以近於逆指而文過哉惟念穀晉邊待罪以來任
重才輕時以負國負民並負所學為懼而事屬創辦或有
辨而未善失察過當之處亦弗敢自諱而此區區實邊恤
蒙之心與夫潔已奉公之念內省不疚敢以質之天日所

以查辦之來。自以此心無他。坦然並未介意。殊不料按事者。胸有成竹。不獨不查案卷。亦復略過原參。案外羅致。閃爍其詞。冀聳聖聽。直謂無一錢之可原。無一事之能舉。恣睢暴戾。慘若魑魅。筆鋒所及。雖十殺不足蔽辜。夫以穀七載。經營力任勞怨。闢地數千里。籌款數百萬。國計民生。詎必無補。縱無微勞之足錄。亦何至橫加以奇貪至酷之名。人生天地間。所重者名節。頭可斷。名節何可污也。物不得其平則鳴。今此案之翻雲覆雨。使穀生無以答君父。死無以對祖宗。貪酷之吏。千古唾罵。果使查出絲毫贓據。則雖肆市朝籍。妻子亦情真而罪當。朝廷簡任重臣。秉節查辦。所以慎重案而求情實也。查辦到此。甫二十餘日。即奏稱芳跡萬端。則全壑案卷。其為千瘡百孔。一望可知。夫豈不

能按冊鉤稽。隨事指實。謂某處蝕款若干。某款虛報若干。確切指明。使無可逃罪。乃原參曰。有因曰尚實。曰不實曰不中肯。曰約略曰估計曰推之曰顯係類皆影響模糊。意為輕重。是以莫須有三字之外。復益以想當然一語。理想所及。何罪不可加以此定讞。豈得為平查辦者。縱有意愛憎。亦何至是非倒置如此之甚。穀所以引頸呼天而求見照於日月也。謹將辦墾大概情形約略陳之。蒙墾之興發端於晉撫張之洞。剛毅胡聘之諸人。自岑春煊建議。始有專員督墾之命。穀適承其乏。東起察境。西迄甘邊。皆墾地也。時艱日亟。西北空虛。防邊之本在實蒙。實蒙之本在墾地。在昔地皆封禁。後來半屬私開。生計早已不在牧而在耕矣。墾務宗旨。因蒙地久為私墾所占。不若准予開墾。既

可興蒙古利源。又可清私壅積弊。蒙古報地熟地亦曰荒。以不敢認私壅之罪也。辨壅者認熟地亦曰荒。所以原蒙古當日之無知。而釐訂今日之疆理也。朝廷興壅實邊。於荒地既收其押荒。豈熟地可認其私壅。夫以蒙衆利在私壅。民户利在私租。不壅蒙地則已。壅則蒙必有怨者。不收荒價則已。收則民必有怨者。自來辨壅難。辨蒙壅尤難。強者梗阻弱者觀望。寬之悔至。蹙之變生。敷衍則辜恩。清釐則府怨。縷將難辨情形。一再奏陳。乃奉嚴旨督催。并寵以藩銜。以資控馭。膺此殊榮。責無旁貸。謀定決行。迺漸推廣。苟利國家。矢死靡他。東西全壅。得有今日。誠非始願所敢期。而今日之覆盆。雖以穀之愚昧。亦早逆料及此也。原參謂為誤認宗旨。然宗旨之誤。厥有由來。不妨略敘情由。以

期共質也。蒙地邊遠荒寒。調員不易。不能不於山西人員。投効人員。并問於夙所知者。擇而用之。因材器使。但論其任事之效。不效當差之勤。不勤有無。擾民婪款情事。為斷。初不敢知其小人。而故用之。亦不敢謂其必非君子。而故疑之也。君子小人。判在幾微。前後易轍。亦所恒有。穀閣於知人。誠不免有失當之咎。若全墾數百員。一無瑕疵。不惟穀不敢自信。即歷來名臣。近今督撫。亦不敢謂用人皆當。毫無指摘也。原參謂為誤用小人。似未諒穀之初心耳。辦墾從未請領庫款。庚子凋敝之後。晉庫支絀。又萬難接濟。開辦之時。經費無出。恤蒙無款。權宜之計。遂有援案奏設公司之舉。東路公司重在革積年地商土棍。把持壟斷之習。而稍資挹注於公家。西路公司重在籌贖達旗賠教地。

畝以動各旗歸誠之念而築渠道興水利亦有所憑籍以
次施行奏設之初將來能否獲利原難預料巧於何有况
東公司得利共三十餘萬商家所分僅七萬兩耳官商合
辦官股分多數商股分少數何一非為公家籌者公司裁
撤之後實款在氏者由各廳徵解儘數歸公有案可稽西
公司贖地修渠用款浩繁墊款皆取濟公司百年之利不
規目前鑒東公司之得利曾奏明以後商股任撤多入官
股此亦裨益公家之意也渠道未成有墊款而無收款目
前似成虧累而墊未盡全功穀罪有應得原參謂巧立公
司亦曾合前後情形統計之否殺虎口各台站草地附近
民人違例私墾并無糧賦隨處皆有既難一律封禁亦未
便聽其私墾係由該管稟請核辦之事并於三十二年二

月奏明清釐在案。聲明酌給各站養贍之費。所以籌站兵
之生計也。開辦經費無出。飭西公司首先認領。既為提倡。
又資挹注。公司先繳押荒一萬餘兩。一切悉照白章辦理。
收價多在一兩。少在一二錢。其附近街市有園子地。止二
頃餘。以質獨優。故少增其價。然至重者每畝只收到十一
兩。台站自開辦以來。共計收過押荒銀四萬餘兩。而公司
所入地價僅四千耳。至土默特地同屬私墾。雖間有大小
糧地。不過百分之一耳。係屬各旗會印稟請清釐之事。且
於三十一年春。專摺具奏。并附片聲明。地基亦宜整頓。所
收銀兩悉歸該旗公用。所有地則辦法。三十二年復經奏
明。其地鄰街市展轉變作房基者。既屬官地。何可認私相
授受。內有梁姓一戶。地不足一畝。在極熱鬧街心。該戶情

願作價買為己產。不交歲租。永遠為業。曾交過銀一百兩。亦只此一户。何有每畝必交三百兩之事。豈可執此以例其餘。原參謂勝放站地實則屢經陳奏。其辦法亦均有案。卷可考。斷不敢稍涉欺勝也。各省外銷之款。何處莪有。總以公款公用。有無業卷。是否侵吞。入己為斷。若以未經奏咨以前。皆指為匿款。則無省無匿款矣。况墾實無可以外銷之款。且無別項可入之款。所入者。只墾務收押荒。公司收地價而已。然督墾大臣不能直接民戶。文放催收。各有員司。款收於分局。轉於總局。解送墾轅。批交收支。層層節制。若思作偽。恐眾人無此一心。東墾及東公司早經奏撤。各款已經奏銷。奉部議准在案。西盟正在暢興。各局冊報未齊。原難率爾奏報。原奏所指站地局所收地價。王同春

所報渠地寧遠餘地所收荒價三項皆指為匿款確據不
知此三項事均分隸於各廳各局檔案解撥確有可考印
卷經查辦封存事後尤難彌縫則款非匿用自有明徵若
謂代各廳各局擔咎穀不若是之愚耳丹丕爾一案其匿
租阻墾擄人搶局糾衆拒捕置私械傷官兵種種叛逆罪
狀搖動西盟全墾大局已三次奏報一次電奏詳細聲明
矣其子有供其黨有供其同寅有稟其貝子有結衆証確
鑿昭然耳目不得已始有請旨正法之舉其餘黨分別開
釋並劄示保護其家今事隔數年一旦為之翻案噫奇矣
本晉案也而以所調之陝卷為憑奏案卷宗俱在也而以
陝西神木廳之一人呈詞為斷其次子依登甲長婦塔木
暨其孫男孫女俱存人所共知剝辨之時伊勢甚為凶暴

弁兵且多有傷亡。伊黨死傷誠所不免。未聞有斃至該家五命之事。兩軍對敵。危險機關。若謂擇人而誅。恐從來無此暇逸。全案俱在。無難調查。夫以將軍控制兩盟。督辦全壘。以誅一逆犯。猶必如此苛求。毋亦太不諒也。原參謂誤殺台吉。果係誤殺。亦甘承認。此答耳。其餘所參各款。謂後套地價。先放後報。其間租價。盡數入己。查後套地價辦法。不同達旗。賠教贖回之款。地係由公司贖回。公司出款。國家得地也。公司以二十八萬領杭旗地四千頃。只放出二千頃。放之於民。始能升科。其間已領之後。未放之前。荒蕪可惜。遂暫為招租。地屬公司。租即屬公司。公司得利。官商勻分。何能絲毫入己。况租地尚有不歸公司者。有西盟詳冊可考。所參儘數入己者。安在。又謂杭錦地價多扣三萬。

六千兩查墾應發杭旗地價十一萬二千兩除奏明該旗
報効各款外其應承領並入股之款均有領據卷票可查
時日可考所參多扣三萬者何據又謂西公司借渠工銷
納數萬金而王同春所報四渠未增尺寸足見修渠經費
半屬虛捏查後套渠勢縱橫地戶依渠為命王同春所報
四渠僅百分之一耳西公司墊款以渠工為最渠名繁多
更僕難數每渠興修動役數千人派有承修專員稽查委
員隨地有渠未經履勘詳查何以指為半屬虛捏又謂西
公司二十八萬股本皆公款借墊二十萬渠費亦公款查
西公司前後兩次集股共集四十萬兩內計官本十三萬
其餘二十七萬皆商本也有股據可憑賬簿可查以之領
地贖地修渠需款至鉅尚有借用號商之款若謂皆屬公

欸果由何處何項提撥。又謂寧遠餘地收銀一萬餘兩。無
奏案。推之張獨多各廳。不知收銀凡幾。公司既撤。誰則得
之。查寧遠壑局奏明節省經費。歸併該廳酌留委員辦理。
未竟事宜。該廳濱海子有餘地一項。民人爭訟不休。由該
廳會同委員稟請清釐核辦。既屬餘地。即不能不覆為之。
清丈。以息訟端。按照奏明公司撤後辦法。尾欸悉歸公司。
計收過銀一萬餘兩。有該廳會同委員冊報可查。查辦未
調及此案。遂即指為無案。張獨多各廳壑務奏結後。并無
清查餘地之事。他若開設官錢局。乃奏明試辦者。公家墊
欸。兵丁稱貸。皆取給於此。官木廠。官麩鋪。又錢局所分設
者也。工藝兵丁多所利賴。所以杜奸商之盤剝。籌旗兵之
生計。此其一斑。後套公司之貨產。皆係渠工人衆必需之

物塞外距城市寫遠若不官為籌備詳潰堪虞補缺公然
批銀係為裁革漏規彌補官虧起見兼以籌補槍價之需
奏之者屢矣總之以公濟公毫無自私自利之見萬目共
睹案卷昭然似此權宜變通辦法無論何省皆難保其必
無若以此加罪不唯天下無能成之事亦天下未必有能
逃罪之官原參所尤奇者謂公司得地價五萬頃每畝八
錢核計可得四百餘萬有着之款二百萬無着者約計當
有二百餘萬誠如所奏勢必公司盡五萬頃而全領之乃
如其數且必全數而皆以八錢加價乃如其數不知地有
肥瘠即價有高低公司所領之地統押荒在內誠有收到
八錢者餘則統押荒地價有五錢三二錢不等者有照票
案可查民戶領地先發實收俟荒價繳清方換部照無論

卷

何處招墾。何處集股。皆如此辦法。全墾實款在民者多矣。如謂有加價浮取等弊。則調查未收回之實收。較之調查已收回者。更屬確切。普查恐擾民。抽查應自易易。且奏謂公司祇領二萬頃。又謂公司非上地不領。乃又謂地價五萬頃。然則此五萬頃之內。其不為公司所領多矣。語意似屬矛盾。現在清理交代。兩月勾稽。始得確數。統東西全墾并兩路公司共收銀二百七十二萬七千六百餘兩。以收數計。則有無侵蝕二百餘萬。可不辯自明。此二百七十二萬餘兩。除各項開支。各有案卷外。以之解部庫二十七萬六千餘兩。解直察十一萬四千餘兩。解晉綏十萬七千餘兩。移交護任十四萬餘兩。解撥撫恤俄商三千餘兩。解交練兵處六萬餘兩。誠如原奏所云。國家僅毫末之益也。東

蒙本郡縣地也。墾款所入盡屬公家。經費外別無用項。西

盟地屬封建。迥異於東。奏明押荒所入半給蒙旗。以現在

論應發歸蒙旗款已不下三四十萬金矣。而撥墊渠工用

款浩大。徒論目前似成虧累。然非實有虧累也。挹彼注茲。

收利在後。曾於籌興後套地摺內一再陳明。請飭下部各

押荒達旗現收渠租除應歸蒙外凡應歸公者均暫緩提

撥以爲渠工大修之費需之愈緩則報之愈豐程效於一

仍當專款存儲聽候指撥等語。蓋穀為督墾通籌全局。

有不得不然者也。到墾以來無時不以恤蒙恤民為宗旨。

於東蒙也。奏明有四分經費有隨缺地畝有公共牧廠有

窮苦世職之養於西蒙也。奏明於押荒半給之租賦全歸

之戶口召廟香火之地蒙眾歸往稱貸之應所以恤蒙者

至矣其於民也減地價緩年限借籽種撥牛具而尤以濬

溝渠與水利為百年之計。所以恤民者至矣。局外猶或不諒。甚至以蒙民交怨罪之。抑知當時當事之苦心孤詣。力征經營。已六七年於茲矣。穀於墾事。原奏謂百無一當。所以條陳善後。有五事之請。並請以賢員接辦其事。語云。言之易行。之難。穀已矣。拭目以觀後之作者。穀以負累之人。言不足以取信。然均有事實可考。土地具在。人民具在。案卷賬簿亦具在。詎能負之而趨也。謹陳區區。以俟大君子之公論焉。凡貽穀任內之墾政。茲挈其大者。總敘於前。更就貽著之蒙墾奏議中。擇其尤重要者。分年比事。採輯於後。庶參閱可得其詳。而徵考不致闕疑也。至於清理察哈爾左右兩翼地畝。原為督辦蒙墾時。連類而及者。故採輯奏議。先敘西墾。後敘東墾。既別其輕重難易。且亦便於觀

覽云。

墾務奏議。光緒二十七年十二月初二日。接署直隸總督袁世凱遞到軍機大臣字寄。十一月二十六日奉。上諭。岑春煊奏籌議開墾蒙地。請特派八旗大員督辦一摺。晉邊西北烏蘭察布。伊克昭二盟蒙古十三旗荒地甚多。土脈膏腴。自應及時開墾。以實邊儲。於旗民生計。均有裨益。着派貽穀。馳赴晉邊督辦墾務。即將應辦事宜。會同該將軍。巡撫。隨時籌議具奏。另片奏察哈爾蒙地。請飭一律招墾等語。並着會同奎順。妥籌辦理。會籌勘辦蒙旗墾務。大概情形。奏查烏蘭察布。伊克昭二盟。形勢雄勝。水陸交通。內則據秦晉之上游。外則為庫倫。烏里雅蘇台。新疆之後路。廣開蒙地。誠為今日要圖。惟前以張之洞。剛毅。胡聘之。諸臣相繼以屯墾為言。規畫周

至猶未果行。茲臣貽穀復奉命督飭勘辦。籌蒙旗生計。裕國
家餉需。上之以固邊防。下之以擴農務。事關重大。措置綦難。
加以今昔情形變遷迥異。非慎始以圖終。恐觀成之無日。到
晉後。卽會同臣春煊。悉心籌議。分別次第辦法。及應豫為籌
慮之處。敬為我皇太后皇上縷晰陳之。各旗之附晉邊者在
豐鎮廳之西北。為四子部落旗。歸化廳之北。及西北為喀爾
喀右翼旗。茂明安旗。薩拉齊廳之西北。為烏拉特三公各旗。
此烏蘭察布盟六旗。皆與晉邊相近。其伊克昭盟之鄂爾多
斯各翼。近晉地方。遇有蒙漢爭訟。時就理於晉邊廳縣。而遠
者則直接陝甘兩省。界域之廣狹。距邊之遠近。各有不同。而
其間之土地肥瘠。與夫已墾未墾。可屯可牧。若不派員周歷
勘明。必至茫無所措。然而千里之行。始於跬步。由邇及遠。漸

近有功。查前任撫臣胡聘之曾經飭據委員查覆。烏拉特各旗之三湖灣、躔金烏拉特河一帶，有可墾之地約二十一畝。水旱各地約二十萬頃。現據歸綏道恩銘稟，亦以三湖灣地為最肥美。緣大河自杭錦旗之北，分為南北中間交互回注。枝渠極多，至薩廳之西始合為一。數百里間極易開渠，足資浸溉。是以歷來稱為沃壤。臣等擬即先從近晉之烏拉特各旗入手，仍一面分飭各員履勘具報，以便分別辦理。此籌擬循途而進之大概辦法也。事必需人而理，經費尤宜寬籌。查晉省豐寧兩廳前次興辦押荒之地，止一萬餘頃。用委員至五六十人。土默特六成升科之地，止數千頃。用委員至二三十人。此次開墾西盟蒙地，地廣事繁，較上屆兩案不止倍蓰。應用人員必更增多。所有一切局用薪水工食等項費用不

貲刻下。晉省庫款萬緡。既未敢多議開支。亦未便過從簡約。經費一項。擬仿照奉天辦荒成案。於荒價外另徵二成。以資辦公。領戶意在得地。但使押荒公允。無不爭先報領。觀於奉天之放東西圍荒。往往有因後至失時。出款尚恐未果得地者。必不以二成經費之故。觀望不前。是於領戶無礙。而又無損於蒙。此籌擬經費所出之大概辦法也。蒙旗放地向無定價。有并不計及頃數。總指一段者。有俟開種成熟。再行找價者。高下在心。動致釀爭貽患。現擬將水旱各地。各分上中兩等。價亦因之。惟每等每畝收押荒若干。應俟查勘後酌中定價。仍照上年十一月奏案。押荒所入。以一半歸之公家。一半歸之蒙部。以示體恤。其曾經墾熟之地。係由蒙旗舊放。該地戶多已出錢給蒙旗。未便與新放之地一律收價。亦應俟屆

時分別生熟另定押荒不至有畸輕畸重之虞。至常年地租自應照奉吉成案歸蒙部徵收。今用款繁多度支竭蹶各蒙旗歷受厚恩理應報効且佃種地戶皆係漢民應照前撫臣奏案於蒙古地租另收數成作為按租捐輸供晉省興辦一切及蒙地設官添兵之用取之漢民並非取之蒙部該蒙旗自無從置喙。此籌擬押荒歲租之大概辦法也。臣等尤有慮者開墾蒙地之議京外臣工屢經條奏朝旨屢下迄多中格詳為採訪停輟之由約有數端蒙旗放地私招者多奏放者少該台吉蒙員等多以漲落無定予奪不常為漁利之計一經官為勘辦則田有定價人有定業昔之伎倆舉無所施不得不自計經營多方挑弄賄交利動期於沮止而後已故各盟長札薩克等始聞開墾招租之命無不欣然樂從繼聞蒙

員奪地礙收之言。又不免中情迴惑。紛紛瀆訴。蓋由於此。此可慮之在蒙部者也。各旗收地未放者固多。已墾者亦復不少。地戶一聞開辦。輒恐奪舊予新。譁然而起。其間良莠既多。不齊習尚亦復各別。弱肉強食。視為故常。平時皆養打手置軍械以自衛。全在開辦之始。有以駕馭安附。使之無貳無疑。否則一有匪徒構煽。謠詠橫興。即恐糾衆滋事。刻下各蒙旗教堂林立。租地日多。設有煩言。轉貽後患。或出教案。尤碍邦交。此可慮之在地戶者也。以上所陳各節。尚多未盡事宜。或應有另行變通之處。臣貽穀擬即馳赴遠城。會同將軍信恪詳細籌商。隨時奏明開辦。至於遷旗留屯。尤關重要。亦擬請俟臣貽穀履勘情形後。再行分別妥籌辦理。

五月暫緩會商西墾。先行籌辦東墾。竊奴才到晉。業將籌

擬烏蘭察布。伊克昭二盟。大概辦法。會同撫臣岑春煊奏明。在案。拜摺後。當即由太原起程。於四月十八日行抵歸化。正值綏遠將軍信恪因病請假之際。奴才就與會商。見其精神困憊。病未就痊。然勉強支持於牀褥間。指陳各旗利弊。及將來應須布置情形。俾知大概。並於奴才未到前。先已行知該蒙旗遵照。聽候辦理。查綏遠將軍統轄兩盟。蒙部夙所服從。此次與辦墾務。全在該將軍力為推挽。庶可相與有成。信恪顧念時難^艱。極思廣闢利源。上裨國計。口外情形。近尤備悉。若俟病愈後。與之相議一切。將來開辦。更得握要之圖。惟信恪現在調任。不日當赴江寧。且在病中。而新任將軍鍾泰亦未到。綏當此新舊交替之際。所有應須會辦西盟各事。不能不暫從緩議。奴才擬於此時趁便馳往察哈爾。先將右翼四旗

墾務會同奎順詳籌辦法。即督飭局員從速勘辦。以免遲誤。失時致多虛糜。又附奏再前次陳奏西盟辦法。擬先從烏拉特三公旗入手。查該旗所屬之三湖灣等處。即前撫臣胡聘之奏請開辦之地。事未果行。奴才未到晉省以前。當由撫臣岑春煊派員往勘。咨行綏遠將軍轉飭該旗會同妥商辦理。去後。茲准咨覆。據三公旗呈。以該旗地係牧養牲畜。專備台差。並恃養贍人口。仍請禁止開墾。又稱並無三湖灣地名等情。核其情詞。已微露阻撓之意。一旗如此。他旗可知。若不破其疑慮。難保無串通一氣。群相狡抗情事。現已刊發示諭。告以此次與墾務並非奪蒙旗之利。實為濟蒙部之窮。俾曉然朝廷德意。並因蒙古性情迂執。但恃文札往來。仍恐不能生其領悟。復即咨由綏遠將軍轉飭西二盟盟長前來。面與

商辨免致因隔閡而生異議。八月請飭理藩院嚴飭西盟就議墾務奏。六月二十四日業由張家口折回歸化。計調該盟長行文之日已逾兩月。僅據先後呈覆。或稱該蒙旗各理各地未暇合商。或稱世世牧放難允開墾。藉詞搪塞。迄未前來查前山西撫臣胡聘之籌開蒙地未果施行者。以議給蒙租太少。且未為之定業田留牧。厥復不能諭服蒙情。遽臨以兵。以致為蒙旗所阻。若此次西盟辦法。曾經聲明押荒半給蒙旗。歲租則全給之。推之官兵既養贍有資。牧放又孳生有地。且殷殷勸諭。曉以朝廷德意。所以為蒙旗計者。無微不至。該盟長苟深知大義。洞悉事情。一經微調。當必與未議之參。而有後至失時之懼。詎乃逾期不到。故意遷延。本應即行參處。惟念蒙古性情迂執。若操之

太蹙萬一急則相持。是實成其抗違。諭旨之答。轉恐無以善其後。然苟任令該旗觀望不前。長此虛與委蛇者。耽延時日。不惟徒糜餉需。實亦有妨國體。奴才貽穀奉命督墾。本無徧赴各蒙旗一一就商之理。而盟長為各旗首領。觀聽所繫。又不能無與相商之事。如必須奴才貽穀前往。始克有成。則緩東急西。亦豈敢辭勞瘁。所慮該旗或再呼應不靈。反難為轉圜之地。此不可不審慎於其間也。且蒙墾成否。不僅利源得失所關。以該二盟地近大河。向稱沃壤。名為禁墾。實則私開。自來規畫西陲者。罔不注意於此。乃朝旨屢下。旋即中格。向猶未有督辦專員。不足以資操縱。今則奴才貽穀忝來邊徼。奴才鍾泰亦到綏視事。相與會商妥議。事在必行。若仍尺寸未開。因難而退。將使該蒙旗輕量國家。以後倘有號召之時。

難保無自為風氣之意。此又不可不防範於其漸也。查蒙旗
從違。向視理藩院為轉移。前次三湖灣屯墾之議。係蒙旗呈
由理藩院奏請停止。近日密探西盟疑慮之由。亦由以未奉
院文藉口。是此次墾務。惟理藩院能左右之。合無仰懇天恩。
俯念開墾西盟萬難再緩。飭下理藩院轉行烏蘭察布、伊克
昭兩盟一體遵辦。不得稍有阻撓。並嚴飭該盟長迅速來綏。
會商一切。以尊朝命。而赴事機。又附奏再奴才貽穀督墾蒙
旗於烏伊兩盟膠執情形。熟思審處。竊以興大利。不計近功。
苟持之以恒。行之以漸。未必不生其領悟。俾可就我範圍。故
奉命以來。急東緩西。正為徐圖轉圜之地。及由張家口折回
歸化。前任綏遠城將軍信恪已行。益覺呼應不靈。所恃署將
軍文瑞力顧大局。得與籌商辦法。現復會調該盟長迅來受

議催以嚴詞。並由文瑞寓函曉譬。且由奴才迭經招遣。素為
蒙情。悅服之各商。往陳利害。婉為開導。已幾情至義盡。倘機
有可轉。能使千里沃壤。一律宏開。於國於蒙。固為兩有裨益。
即不然。但將舊日私墾各地。歸官辦理。亦尚見蒙旗効順之
忱。乃探其觀望之由。似非急切所能移易。此次嚴旨之請。誠
有迫不容已者。奴才忝與邊籌。勞怨艱苦。在所不避。第曠日
持久。未少興夫地利。轉徒糜夫餉需。顧念時艱。已深慚悚。尤
有慮者。蒙情頑固。亦極迂疲。急固相持。緩更生玩。若再延時
日。必益堅其漠視之心。以後開辦愈難。不獨利權事權不能
自主。即欲收回馭藩之權。亦恐非易。奴才所為。日夜籌維。不
能不上煩宸慮也。

八月。設立墾務公司。奏。此次奉命督墾。數月以來。循行邊地。

博訪周諮。其間利弊所關。亟宜妥籌良法。晉直盟旗各地。宜於樹藝。且生計在畊。而不在牧。歷任將軍撫臣及奴才前奏。言之已詳。向來私放私開。從未能行官墾。以致蒙員受賄。授柄地商。地商包攬。假手地戶。地戶攘取官地。據為己有。即如察哈爾左右翼。已墾地畝甚多。其繳押荒報升科者。不過十之一二。前經奴才於籌辦察哈爾右翼墾務奏明。禁止地商戶總名目。此後放地招墾。自當咸與維新。然舉可畊之地。零星租放。即無從前諸弊。而領地之人。或因無力退繳。及蒂欠押荒銀兩者。亦難保其必無。迨至撤地另放。已多紛擾。不如未經放地之光。設法預籌。則弊不禁而自革。查近年各省辦理。路礦及工藝局廠事務。率多招集股本。設立公司。施之今日。辦墾情形。尤為有益。人情於利之所在。罔不爭趨。以蒙旗

地多膏腴。邊地富商。久所歆羨。一經公司招致。入股必多。則
鉅款無難遽集。且公司既立。事有統宗。有以簡馭繁之權。無
戶總地商之弊。升任山西撫臣岑春煊原奏清單內。曾經議
及招商。奴才前在太原。亦與岑春煊往復熟籌。計無逾此。嗣
據在籍紳士直隸試用知府曹潤堂。候選教諭武洋。稟請創
設墾務公司。奴才以該紳等好義急公。深堪嘉許。當即商之
岑春煊。擬准該紳所請。先由山西商務局剩存項下撥給官
本六萬兩。並由該紳等自行籌集銀六萬兩。共湊成銀十二
萬兩。計成本官商各半。先行試辦。查西盟達拉特旗曾因教
案。以地租抵償賠款。教士欲得現資。該旗亦欲地仍歸晉。疊
經前將軍信恪與岑春煊商令。代為設法。又經綏遠辦理教
案賠款外部戶部催交甚急。亦經岑春煊商由奴才飭晉商

先從股本內籌借應用。奴才思達拉特賠教之地。如由公司贖回。放墾誠為借徑而入之計。即綏遠需款。亦義應就近兼顧。是公司尚未開辦。或須代認賠款。或須墊付要需。已均欲於公司取給。加以墾務一切經費。需用正繁。晉庫既支絀萬分。他處又無從挹注。若公司能漸推廣。庶不至為無米之炊。第該紳等以西盟未能就議。觀望不前。且其所陳。僅就西盟而言。東西事同一律。奴才擬擴充辦法。西路各蒙旗及八旗牧廠。在包頭鎮地方。東路兩翼各旗。在張家口地方。各設立墾務公司。招集股分。凡入股者。即准核照荒價。領地承墾。原入股本。將來應分餘利。均按該公司初立章程。官商各半。總使官商均沾利益。不至畸重畸輕。查知府曹潤堂家道殷實。鄉望素孚。西路墾務公司。擬即派曹潤堂武洋承辦。添調晉

紳內閣中書曹中成寄居晉省戶部學習主事姚世儀該二

員熟諳商務肆應多才堪以委令會同辦理

參案調查記貽大臣奏設西路墾務公司後以分起贖回達

拉特旗賠教地畝咨請山西省於官商股本十二萬兩外再

籌五萬兩另款存儲俾應要需經山西巡撫趙奏准照撥即

於光緒二十八年秋冬季由山西藩庫撥解銀一十一萬兩

官股之六萬兩至光緒三十三年十一月山西省解到綏遠

城備辦旗丁生計一半之款庫平銀一十萬兩除撥繳旗丁

認領馬廠後套地價及撥存官錢局計二萬共銀五萬一千九

百七十六兩一錢五分其餘存入旗庫其應由山西續解旗

丁生計一半庫平銀一十萬兩除五萬兩扣抵貽大臣前借

墊辦墾經費款項外即前另墊實續解五萬兩及款解到時

在參案發生後。由歸綏道暫行留存。隨後提交旗庫備用。
九月初一日。承准軍機大臣字寄。理藩院光緒二十八年八
月二十日奉。上諭。前晉邊開墾。闕係蒙民生計。特派貽穀督
辦。並曉諭蒙旗。遵照辦理。近聞烏蘭察布。伊克昭兩盟盟長
延不遵調會商。以致辦理諸多棘手。著理藩院嚴飭該二盟
盟長一體遵照。迅赴綏遠城。與該侍郎將軍等會商一切。不
得故意遷延。藉端推諉。致誤墾務。將此諭令知之。欽此。
為賞加理藩院尚書銜奏竊。奴才八月二十八日。馳抵察哈
爾右翼正黃旗界之白塔山。勘分直晉界址。恭閱邸鈔。光緒
二十八年八月二十日上諭。貽穀著賞加理藩院尚書銜。督
飭各蒙旗將開墾事宜。隨時認真妥籌辦理。欽此。仰見朝廷
拓興邊利。期在必行。賞以頭銜。正使之易於操縱。祇聆之下。

欽感莫名。當即望闕叩頭謝恩。訖伏念奴才督壑蒙旗已逾
半載。現僅豐寧及綏遠城八旗牧廠壑務。漸可推行。其西盟
蒙情尚在疑慮之間。未即就議。幾轉圜之無術。懼近効之難
期。乃復叨沐寵榮。仰承訓示。責成愈重。報稱愈難。奴才惟有
恪遵諭旨。認真妥籌辦理。行之以漸。持之以恒。用剛用柔。總
期蒙部知恩。擴充美利。以仰副聖朝撫恤藩封。裕儲邊備之
至意。

十一月開始籌贖西盟賠教地事宜。奏查達拉特旗因教業
賠款無力措交。乃遂以蒙地備抵。教士索銀而不願得地。該
旗捐地而不能交銀。綏遠城將軍左右其間苦乏轉圜之術。
前將軍信恪升任撫臣岑春煊商之。奴才欲地仍歸晉。由壑
務代給現銀。既遂教士之心。又紓蒙民之急。奴才因事闕大

局何敢稍分畛域。疊經前將軍信恪署將軍文瑞札調蒙員
來議地價。擬於公司奏設後。先行籌款贖回。迄未就議。新任
將軍鍾泰到任。已在八月初旬。奴才深以此事為汲汲。鍾泰
雖在卧病之中。亦願早日定局。無如蒙情膠執。欲地從減。而
價豐。奴才意在多贖蒙地。且慮地價太昂。開放時商民不願
承認。諸多滯手。不能不作量入為出之計。往復磋商。期得其
平。近因教士需款孔殷。迫不及待。鍾泰商由奴才先行代墊
銀一萬兩。俟收地時。在應付價內扣抵。已於墾務經費項下
撥給。該教士歡欣如願。此時必不至別生枝節。又奏連日間
署將軍與副都統文瑞督同委員蒙員。將地價往復磋商。期
早定議。竊幸事機漸順。該旗貝子等深識朝廷恤蒙之意。官
商籌款之艱。願將地數加增。地價從減。計贖還該旗熟地二

千頃。每頃價銀七十兩。共用銀十四萬兩。訂於十二月內付價收地。現與護撫臣趙爾巽已將銀款設法備齊。專俟收地時。先後應付。此地割於蒙而返於晉。即永為晉有。隸入版圖。但使極力經營。實於晉邊利源。大有裨益。

十二月由察返歸化。會商西壑奏。惟東壑方興。西壑待議。現准署理綏遠城將軍文瑞咨據伊克昭盟長阿爾賓巴雅爾呈奉理藩院檄飭。遵照諭旨。迅赴綏遠城與奴才等會商。一切該盟長已飭所屬各旗齊集察漢蘇巴雅爾噶地方。會商後。擬即遵旨赴綏商辦等情。其烏蘭察布盟雖未接有來綏就商之文。亦據派往曉譬之熟習蒙情員商等稟稱。該盟已深悔從前延抗之非。意圖効順。詳察兩盟情形。似不至復滋疑慮。竊念奴才籌辦西盟蒙壑百計圖維。至此乃始有轉圜。

之望。亟應迅速折回。候與該盟長會商開辦。免悞事機。均以上

緒二十八年業十

四月杭達兩旗首先就議奏。伏查西盟墾務為發議所造端。即屬事機所最要。奴才自奉命以來。夙夜圖維。既期底於有成。又不敢操之過蹙。去年甫抵歸化。即將奏明押荒一半歸蒙升科地租全歸蒙旗各節。剴切宣示。曉以朝廷之德意。歆以久遠之利源。又恐文告往來尚難生其領悟。復疊次商同前任綏遠將軍派委熟習蒙情明白事理之員前往兩盟。反覆開導。無如該盟長札薩克等。袒於故智。從前請興墾之案。屢議屢格。不免自護前非。加以漢民之私墾。蒙員之私賣。歷有年所。惟恐一歸官辦。不能各便身圖。盟長等墮其術中。遂以礙游牧妨生計等詞。空文具覆。所幸疊承詔命。由理藩院

嚴飭遵辦。並催速赴綏城。該盟該旗等始知事在必行。非復如前之任意撓阻。奴才貽穀到邊。將及一載。周諮博訪。情偽漸明。深知各盟旗之不即赴調者。大半牽率使然。頗有數旗極願遵行。而在衆蒙之前。不敢獨持異議。因於本年正月間。再行商同奴才文瑞。派員持文專赴烏蘭布盟長四子王旗。及隸該盟之烏拉特西公旗伊克昭盟長杭錦旗及隸該盟之達拉特旗。陳說曉諭。抽調赴綏。約候同來就議。茲據赴杭錦旗委員約同該旗梅楞棍布於三月二十五日到城。赴達拉特旗委員約同該旗協理台吉巴扎爾噶爾第等於二十七日到城。奴才等即訂期接見開議。容俟議有辦法。再行奏陳。竊思膠執者邊方之舊習。而嘉善者柔遠之微權。該盟長扎薩克始雖稍存觀望。然既經勸譬。即能破除成見。遣官連

袂而來。洵屬嚮慕皇仁。首先効順。亦可見該盟長才堪表率。
信足及人。若得上荷溫綸。定自益加奮勉。且使諸部聞風興
起。合無仰懇天恩。將伊克昭盟長杭錦旗札薩克貝子阿爾
賓巴雅爾、達拉特旗札薩克貝子圖們巴雅爾均傳旨嘉獎。
以示激揚。奴才貽穀百計圖維。始有今日。現當間不容髮之
際。惟有如此操縱。乃克迅赴事機。如能遵照妥速定議。指地
開辦。再由奴才等奏請恩施。將該貝子及赴調蒙員從優獎
勵。其烏蘭察布盟長現在亦據來文。五月初六日在巴圖哈
拉噶地方齊集會盟商辦。以情理度之。有杭錦、達拉特兩旗
轍迹可循。當亦不敢始終固執。倘竟仍前延抗。則是該盟長
不勝領袖。無以倡導各旗。奴才等惟有據實奏參。將該盟長
革去盟長之任。另揀恪遵朝旨。堪資表率者。會同奏請簡放。

如或該兩旗貝子前後異轍。奴才等亦必請加懲處。不敢以
奏獎在先。稍涉回護。如此一勸一懲。互相為用。庶西盟墾務
有日觀成。於大局實多裨益。又附奏。再據杭錦旗二品銜梅
楞棍布呈稱。竊本盟盟長自上年欽奉諭旨。並奉墾務大臣
行知。飭辦開墾事宜。遵即飭知所轄各旗遵辦。無如各旗札
薩克多。意存觀望。未即遵辦。當經呈明理藩院。擬請停辦在
案。茲復經墾務大臣綏遠城將軍劉切曉諭。本盟盟長深知
此次辦墾。係專為蒙旗開濬利源。於各旗裨益甚大。並非奪
蒙人生計。情願先由界內開辦。以為倡率。其本盟所轄各旗。
自應通飭遵辦。惟思上年業經呈請理藩院免其開辦。今若
辦理。又恐與前言不符。擬懇俟理藩院覆准照辦。本盟長當
先由杭錦開辦。仍飭各轄旗一律遵照。梅楞願在城守候院

示等情。前來查開墾地畝。有益蒙旗。疊次聖訓。周詳自當恪
遵。速辨。乃歷任山西撫臣。疊經奏請。均未果行。良由從前理
藩院。拘守成案。不敢變易。坐使蒙旗大利。未能早就開闢。當
局故步自封。奸民反夤緣^緣得利。識時務者。莫不惜之。今日情
形。迥非昔比。地不愛寶。自當有利必興。現在屢奉詔書。理藩
院臣。實心實力。飭令遵辦。用是蒙藩悔悟。頓釋前疑。然猶却
顧。彷徨。總總妄慮。既願懍遵朝命。効恭順之忱。又恐見責院
臣。受失言之咎。其愚可憫。其誠亦屬可嘉。伏思此次理藩院
臣。欽遵諭旨。一再行文。若聞各蒙旗舍舊謀新。更必贊成。恐
後斷無令其中阻之理。惟既經該梅楞籲請。未便壅於上聞。
伏祈聖明垂念。蒙愚之甚。西墾之難。飭下理藩院。迅即行文
各該盟長。催其趕緊一體遵辦。勿再延緩。致誤事機。

五月查明綏遠城牧廠地情形奏。伏查乾隆三年由土默特
地內恩賞綏遠城駐防官兵牧廠原係南北寬二百里東西
長三百里旋於是年七月間仍在大青山後另指十處作為
牧廠八旗兩翼各分四至中間空地照舊歸土默特其牧廠
界內土默特蒙古亦准寄居先係隨同水草公共游牧後於
乾隆二十八年經將軍蘊著奏明在牧廠界外拜衙郭爾山
前另斷土默特游牧而綏遠城泥於從前公共之文不免時
有攙越遂有道光二十三年互爭游牧之案將軍奕興歸化
城副都統成凱先後具奏奉旨着仍賞給土默特其八旗馬
廠仍循舊界以杜爭端等因欽此然判別於馬廠之外者游
牧雖已各分而錯處於馬廠之中者地段依然相接雜居日
久耦俱無猜廠地漸就混同土默特亦未嘗考其界畫迨至

去年奉旨拓充墾務。土默特參領等始以牧廠內尚有該旗應得之地。赴奴才貽穀處呈請分別辦理。奴才等調閱兩處地圖。界址里數均多不合。詳加詢問。而綏遠城土默特官員等皆不能確指其應分地段。奴才等遂於七月間會委各員前往查勘。因地方遼濶。一時未能丈量。各委員就履勘所及。證以綏遠城地圖。用按里合頃之法核計。共有三萬二千餘頃。較道光二十三年奏案八旗馬廠除已放地畝外。尚有草地二萬餘頃之語。迥不相符。奴才等以非統行丈量。終難憑信。惟時值秋冬之際。天寒地凍。人力難施。本年二月間。揀派繩丈委員分赴八旗兩翼馬廠認真逐加勘丈。現雖未一律丈竣。而就各處冊報核其地數。較舊案實有增多。奴才等傳同綏遠城協佐領土默特參領等。同商酌擬照前奏將綏

遠城牧廠已放糧地不計外。應得草地二萬零一百四十一
頃十畝。劃清其餘地畝。仍歸還土默特。該員等均無異詞。此
奴才等查明。綏遠城牧廠與土默特。應行各清地界之實在
情形也。至牧廠之地。乾隆六十年。嘉慶十一年。十四年。因籌
滿營養育兵及孀婦孤女養贍錢糧。先後三次奏放。共計七
千三百餘頃。由歸化廳按年徵收。現在統名糧地。此外未放
荒地間有私墾。尚不甚多。疊次出示招報。迄今報者寥寥。奴
才貽穀飭令委員到地時。一面丈量。一面清查。除糧地外。無
論已墾未墾。一律滿丈。按照定例。以二百四十方為一畝。俟
統行文完後。先劃足綏遠城二萬一百四十一頃十畝之數。
分別墾牧。詳察牧廠各地。以正藍旗兩翼土性為最。正白鑲
藍兩旗次之。正黃鑲黃正紅三旗又次之。鑲白鑲紅兩旗山

多地。方可畊之地較少。現擬照信恪原奏。略加變通。除去山河道。道路村鎮。及僅宜牧而不宜畊者。留作牧地。餘均儘數開放。以三分計之。約計應放地畝。不過二分。上下與原奏不甚相懸。該處廠地尚無旗員地。商串通私賣私租等弊。與察哈爾左右翼情形不同。應收押荒。即照他處稍增。民戶亦當願領。惟地質既分等次。荒價亦應有區別。庶上地不至賤放。次地不至滯銷。擬參酌戶部奏章。量為變通。上地每畝收押荒銀四錢。中地三錢。下地二錢。先行試辦。招墾如有窒礙。仍由奴才隨時妥議奏明。所收荒價。以四成留作辦墾經費。以六成為建立學堂。改練新操等項之需。至部章押荒。雖判等差。地租則統歸一律。查向辦開墾王公報効馬廠章程。每畝徵官租銀一分四釐。另徵私租銀四釐。而綏遠城前放牧地。成

案則係每畝徵銀二分一釐五毫。奴才等竊見承種糧地戶。因歉租報逃者不少。博訪輿論。新墾廠地。若仍照二分一釐五毫徵收。民力實有未逮。與其後來避租逃棄。使土地仍舊荒蕪。何如賦則從寬。使民戶易於輸納。且口外放地。每畝多按三百六十方。而廠地則向按二百四十方。廣袤既殊。租入尤應量為體恤。擬仍照各處開放馬廠部章。每畝徵銀一分四釐。遇閏。每兩加徵銀三分。每正銀一兩加耗銀五分。既非王公報効馬廠。無庸另徵私租。閏五月。西墾已開。赴包驗收地畝。奏竊奴才前以抽調之伊克昭盟長杭錦旗。及隸該盟之達拉特旗。各遣員來綏就議。懇恩嘉獎。並請飭下理藩院。迅飭遵辦等情。奏奉諭旨。允行。欽遵在案。查杭錦所派之梅楞棍布達拉特所派之協理台。

吉巴札爾、噶爾第等到綏後。當經奴才會同署綏遠城將軍
文瑞連次接見。推誠相與。並派旗局各員陳說曉譬。俾知此
次辦墾。係為裨益蒙旗。有百利而無一害。再四詳商。始據該
兩旗首先報墾。杭錦報指該旗之杭蓋地方。長三百里許。寬
或六七十里。二三十里不等。達拉特則議允開渠。盡該旗所
有之地。任便擇修。凡渠到何處。地即開至何處。情願先儘纏
金。長勝兩處聽候。先行試辦。以上杭達兩旗地畝。或須經營
放墾。或須分別招租。一切詳細章程。必須俟勘驗詳明。方可
隨時核定。正派員會勘間。復據赴準格爾旗委員約同該旗
揀派之蒙員札特丹巴到綏。議墾始末。嘗不意存觀望。而一
經諭導。復因有杭達之轍迹可循。亦遂幡然改悟。呈指黃河
以北河套川地畝一段。與前贖達旗賠教之地界址毗連。亦

擬即行派員勘收。又郡王扎薩克烏審鄂托克四旗亦均相繼遣員赴調。已有行抵包頭鎮者。此伊盟各旗先後就議之情形也。至烏蘭察布一盟前稱於五月初六日在巴圖哈拉噶地方齊集會盟商辦。現據來文該盟長等已依期前往。計正在會同籌議之際。果能破除成見。亦必連袂而來。此烏盟各旗漸將就議之情形也。伏念奴才督辦蒙旗墾務。惟西盟為最先注意之事。亦惟西盟為最難着手之事。蒙古性情迂執。緩則生玩。急則相持。操縱一有失宜。不惟寬猛俱窮。且恐枝節橫生。轉無以善其後。奴才到邊以來。不敢望之太奢。亦不敢操之過蹙。熟思審處。百計圖維。幸仰賴聖訓周詳。恩威並用。直至今日始獲有伊盟之首先効順。烏盟之有意遵行。當此事機甫順之時。不無稍縱即逝之慮。而在蒙旗空乏遠

役維艱。現既嚮慕情殷。不能不格外體恤。就近會商。擬即於
閏五月二十四日。馳赴現設壑局之包頭地方。勘察情形。督
飭局蒙各員。妥籌開辦。一面調集未來各旗。就近迅往該處
會議。妥商總期聯絡衆情。擴充大利。及時布置。無悞機宜。並
現在後套各商戶。有爭渠械鬪之案。以彼相尋報復。招集流
亡強者。入與扛幫弱。者聞而裹足。若不往為鎮壓。將使招佃
開渠及時應辦各事。舉無所施。是大有妨於壑務。尤不能不
急於一行。七月又奏。閏五月念七日。馳抵包頭鎮時。伊克昭
盟所屬烏審郡王鄂托克札薩克等旗。經疊次文札嚴諭。並
連派曉事之員。商及格格喇嘛人等。絡繹往說。始各遣員到
包聽候商辦。開壑奴才當聚集詳商。示之利益。仍一面分飭
該各王公等躬親赴調。期與面宣朝廷德意。以免隔閼而釋

猜嫌。現在達拉特旗貝子圖們巴雅爾、札薩克旗輔國公銜頭等台吉沙克都爾扎布均即遵調前來。晤商一切。觀其抒誠効順。已曉然於辨壑之果。為蒙旗當將該貝子等委令襄理西壑。藉資得力。而其未來之札薩克等。或以疾辭。或以幼告。雖不無託故飾詞之事。惟既各有派出之員。持文報地。是所望於該旗者。已得。彼札薩克等。即未能一一親來。固不必深求。以示寬大。查伊克昭盟七旗。現惟盟長杭錦旗前雖呈報。杭蓋地段。未經指交。近為烏盟所唆。微露反覆。已嚴札飭遵。並派員仍往守候交收。不得不徐觀其後。其餘六旗。若達拉特。議允開渠。準格爾。指報河北地段。業經前次陳明。他如烏審。現報之地。東西三四百里。南北七八十里。札薩克現報之地。東西百餘里。南北一百四五十里。計該旗轄地。已報有

十之六七。至郡王鄂托克。一於兩段中認開一處。一於一文
中併報兩地。計長均百里以外。寬均二三十里。四五十里不
等。以上先後報墾各地。全屬河套。但使杭錦仍遵前議。不至
始終異轍。則伊盟所屬一例可開。現已分委各員前往驗收。
惟思各旗土地廣漠無垠。延袤千有餘里。距邊遠近。既有不
同。土地肥瘠亦復各異。執一例百。必扞格之多。虞並舉兼籌。
更艱。長之莫及。上年奴才到晉與升任山西撫臣岑春煊會
籌辦理。西墾情形。曾議及從烏拉特旗入手。今烏盟尚未就
議。擬先儘達旗指報河北各地。併力經營。該處依附大河。全
資水利。度地開渠。向為民蒙商戶之所爭。而即此次辦墾之
先。務奴才業派員分赴纏金後套。周歷查勘。擇從稍易為力
之處。先行試辦。一面籌集官商資本。備款招工。一面酌定租

則招徠民佃。俟辦有端緒。即行奏聞。此達旗之宜。首先開辦者也。其他各旗。則須由近及遠。次準噶爾旗。次郡王旗。又次扎薩克烏審鄂托克等旗。相距遙遙。不儘為晉邊之所及。惟

有相時度勢。各就民蒙土地之宜。依次分別辦理。以期漸近。有功。又附奏後套地勢。黃河自西南入杭錦旗界。迤邐而東。東西四五百里間。濱臨河北之地。均屬杭旗。杭旗之北。則為達拉特旗。向來達地商戶等開引各渠。枝幹縱橫。無一不取徑於杭。杭之達旗茶銀各事者。以杭地為渠水所由來也。今者議修達地官渠。如纏金長勝渠等處。與該旗所指杭蓋相接。如杭蓋不歸官辦。渠無由開。是該盟長之交地與否。又為全渠所關。此次該旗請俟傳諭杭蓋蒙衆之意。度必以衆情不願。有礙游牧為詞。查杭蓋地段。東西長三百二十餘里。南

北七八十里內。已開墾過半。鱗次櫛比。佃戶尤多於各處。何以私墾則無礙。官辦則多妨。現修達渠工役。已招集千餘人。器亦盡備。專待杭旗報地一交。即由上游而利導之。一悞事機。徒糜經費。擬請嚴旨飭下理藩院。迅飭伊克昭盟盟長。速將前報杭蓋地段。即行指交驗收。以便修濬達渠。暢興水利。並可使該盟所屬諸部。亦不至相率效尤。實於西墾全局大有裨益。

十一月。請開去西盟盟長之任。奏略謂。前經奏請飭下理藩院。嚴飭該旗將原報之地。速行指交。奉旨允行在案。乃院文已行知該旗。不第該旗視若空言。近復行文各屬旗。謂各旗紛紛報地。不遵該盟長之命。飭調各原派報墾之員。於二十日前往聽候飭辦等語。該屬旗向惟盟長是遵。一聞此

言難保不群翻前議。掣動全局。此皆奴才用柔而不用剛所
致。悚愧何勝。明知駕馭蒙部之方。全資威力。奴才念開墾係
綏蒙之意。力反從前之所為。以為徐冀轉圜。縱使奴才受迂
緩之愆。不願藩屬著抗違之迹。然不圖該旗之始終異轍。如
此。今者該盟所屬各旗。先後報地。或租或放。任我推行。顧因
抗錦一旗。致滋後慮。西盟全墾所係。正間不容髮之時。若仍
有勸而無懲。豈獨未來之旗。效尤不至。其已來之旗。亦將重
視盟長。而輕量朝廷。一失此機。必至不可收拾。查籌辦西盟
墾務。時逾一年。用人至數十員名。糜款至三萬餘兩。極力經
營。始有今日。何能任令該盟長從此反覆。致撓大局。現在別
無操縱之計。惟有請旨飭將伊克昭盟盟長杭錦旗貝子阿
爾賓巴雅爾開去盟長之任。去其所恃。而震以天威。知必畏

而感悟。立可轉移。將不徒該屬旗藉知驚慄。即烏蘭察布盟
觀望徘徊。至此亦應轉而嚮慕。則西事猶可為也。如蒙俞允。
查伊克昭副盟長烏審旗貝子察克都爾色楞。深明大義。前
此一聞徵調。遂即舉地報開。洵堪為一盟領袖。合無仰懇天
恩。俯准飭令該貝子暫署該盟盟長。遞遺副盟長查有札薩
克旗輔國公銜頭等台吉沙克都爾扎布。自貢忠誠。挺身就
議。奴才深得其心。若以之署理副盟長。必可資其呼應。且足
為情殷効順者勸。奴才為西盟壑事焦灼萬分。不安寢饋。現
祇有威克厥愛一法。為維持全壑之機。用敢瀆請聖明裁斷。
八月補授綏遠將軍謝恩奏。竊於八月十四日馳抵張家口。
恭閱邸抄。光緒二十九年八月十一日內閣奉上諭。綏遠城
將軍著貽穀補授。欽此。跪聆之下。欽感莫名。當即恭設香案。

望闕叩頭謝恩訖。伏念奴才謬躋詞館。游佐戎樞。自奉命督
壑蒙旗。議開邊利。西則衆情狡執。兩盟之疑慮互滋。東則頭
緒紛繁。兩翼之清釐匪易。近雖伊盟就議。察壑暢開。而併力
經營。時虞弗給。乃復仰荷殊恩之錫。畀以專閫之榮。查綏遠
將軍統馭烏伊全盟。節制宣大諸鎮。內以裕八旗生計。外以
固三晉屏藩。當此籌備邊防。拓興蒙利。兼營並舉。措置尤難。
自顧駑庸。彌深悚懼。
十二月。綏遠牧廠試辦屯田。奏伏查前項牧廠在大青山後。
當塞外極寒之地。本非處處宜畊。從前乾隆嘉慶年間。四次
壑闢。均係擇地開放。此次經前任將軍信恪奏請。將全廠三
分壑二。固知膏腴之地。本已無多。奴才前因出示招壑。領戶
寥寥。將章程畧予變通。於應收荒價。寬定期限。分起徵繳。乃

時逾數月。僅據民戶陸續領地二百餘頃。奴才以此舉關係八旗生計。且學堂練兵經費皆將於此取資。若任其觀望。遲回深恐廢時糜餉。前此屢聞廠地不易開放。幾疑不便私圖之人。從中搖惑。及親往履勘。後博稽輿論。徧察土宜。天氣則寒早暖遲。地脈則瘠多腴少。其堪列上則者。大半在已放糧地之中。加以多年久未清查。逃糧溢墾之奸民。又復擇肥而取。凡未經墾闢各地。多係蒙沙含石。為老農所不屑經營。又兼西接兩盟。東鄰兩翼。同時興墾。人人有較量優劣之心。且毗連之四子王達爾罕諸旗。自放蒙地。賤取其值。彼廣招徠。此更碍放。現在興學建軍。業已刻不容緩。奴才日夜籌畫。竊慮無米為炊。因迫令墾務公司呈繳押荒現銀。指認地三百餘頃。又由奴才將應得廉俸公費。儘數捐認地畝。以為之倡。

即飭該城協佐以下官員兵丁量力認領分期繳價留作恒
產復出示將民戶荒價分為三限每六箇月徵收一次並於
查勘廠地時暫駐後山地方傳集商民反覆開導釋其疑懼
觀望之心附近居民輒肯首先承領現據局員報稱領地民
戶較前稍形踴躍統計官民已認之地截至本年十一月底
止共有一千餘頃轉瞬春融將屆東作方興願受一廛或可
更期暢旺仍當飭令局員隨時認真勸領以冀早日竣事惟
廠地既非沃壤辦理又如此其難無論如何設法招致亦不
能放及三分之一奴才熟加籌議與其待價而遺曠土終無
以應急需何如選士而習躬畊轉可以資生計查旗兵坐食
錢糧畏憚勤苦久已習為固然方今庶政修明振興農學而
滿營兵弁徒應差操之故事不知畊作之本原體懈志媮安

望其緩急可恃。奴才到任以來，屢加簡閱，心竊憂之。際此牧
荒難放，分作屯田計成兩得。前於履邊之頃，勘得兩翼馬廠
地勢平坦，土性亦尚可畊種。擬將該處廠地一千一百餘頃，
儘數撥歸八旗選擇滿蒙壯丁，每旗百名，仿照吉林雙城堡
章程試辦屯墾。其詳細辦法容俟擬定另行具奏。但建蓋屯
丁房屋，製買農具籽種，需費甚鉅。現值旗庫支絀，羅掘早空，
即將來荒價暢收，祇能利用之學堂練兵，何暇別資挹注。應由
奴才督飭協佐領等另行設法籌款，務在必行，使經費不充，
亦必先就一二處試辦，以後漸推漸廣，應免土地荒蕪之歎。
兼有兵農合一之規，似可與興學練軍並期兩得。至此項屯
地既由八旗兵丁自行墾種，應懇恩免徵荒價歲租，以示體
恤。

墾務奏議。十二月續贖達旗賠教地畝。奏竊查達拉特旗議
賠教案一款。為數甚鉅。該旗幾次籌價。至上年尚款尾銀十
七萬兩零。無力措交。議以蒙地備抵。其時該教士欲得現銀。
不願得地。經前任將軍信恪升任山西撫臣岑春煊商由奴
才設法籌贖。此項地畝。為西墾入手之基。當於墾務設立公
司。官商各出股本銀六萬兩。共湊集銀十二萬兩。備贖達地。
其不敷之數。仍由山西籌撥應用。此係濟蒙旗之急。而遂教
士之心。惟是地價尚須商定。該旗始尚居奇。幾經派員與該
蒙員往復磋商。茲據該旗指報。瀕臨黃河四成地。生熟地一
段。允交地二千頃。抵銀十四萬兩。計每畝核銀七錢。明知地
薄價昂。不能不顧全大局。力飭該公司如數認辦。訂明先代
教堂半款。其餘一半。俟收地後。分限付清。本年二月間。奴才

派員赴四成地分行勘丈。除應扣河渠、召廟、牛棚、柳林及沙
灘不堪畊種之地外。盡數丈收。實僅收淨地一千二百三十
五頃。而丈量之際。該旗不認扣除種種偏執。幸賴在事各員。
經權互用。未為所愚。不至竟收廢地。以原定交地二千頃之
數核計。該旗尚歉地七百餘頃。當飭補交。續撥。又久未定議。
現始據該旗將前次報墾之長勝渠、渠口荒地內。劃撥補交。
查此段荒地土脈。瘠瘠。必藉河流灌溉。方能鋤耨。若仍照四
成地每畝七錢。必致領墾無人。商情觀阻。將來開渠引水。仍
由公司籌款。成本愈重。出放愈難。若第恤蒙艱。而不顧商累。
亦非事理之平。是以飭令將地加增。作為開渠工費。該旗允
補淨地一千三百頃為止。現以該旗應行續償教款十四萬
兩之外。尚有尾零。再多補地百頃。仍代該旗清還。雖經議允。

尚未文撥交收。其收地之難如此。該旗擬補之長勝渠地。勘
丈尚需時日。除俟辦理就緒。另行陳報外。查四成地地畝。奴
才於收地後。即飭公司早為領放。嗣據稟稱。該公司五月內
遵即前往招商放墾。時值黃河漫漲。濱河之地。多被冲刷淤
填。變腴為瘠。辦理遂行疲滯。又兼地址與土默特六成地界
毗連。從前該地放墾章程。每地一頃。僅收荒價銀十兩。有差。
民間習故。狃常動援為例。此項地畝。係以重價贖回。該公司
籌墊鉅款。縱不能稍資生息。亦何可任其過於受虧。不得已
變通招致。寬以限期。僅飭原佃新認各民戶。先交領價十分
之一。其餘應交地價。緩至明年春秋兩限。一律繳齊。又將地
則分別等差。按照原贖之價。上下牽算。俾擇肥就瘠。任聽其
便。近始陸續招領。將竣。其放地之難。又如此。查此項地。割於

蒙而復歸於晉。係公司備價籌贖。所有轉放地價。仍應歸還
公司墊款。雖寬恤民力。稍遲以時。於公帑並無所出入。惟此
地已分別放墾。未請部照之前。先給局廳印據。其租銀升科。
亦當及時議定。查前次辦放與四成地連界之六成地畝。租
銀分為兩項。凡上地中地。每畝每年均照豐寧章程交銀一
分四釐。下等地畝。則核減一釐。又每正銀一兩加耗銀五分。
遇閏每兩加增銀三分。無論何等。地畝。統行照章核收。此次
四成地。自應一律辦理。擬即以光緒三十年為始。升科。畝徵。
縱緩收地價於公司。可早入歲租於計部。變通盡利。惟期有
裨國家。至其逼近黃河。以後如遇水旱偏災。應准隨時呈報
勘驗。照例分別蠲緩。並水冲沙壓。亦應准其報豁。以期核實。
而免逃租。

以上均光緒
二十九年案

參案調查記。查四成地在河北。河亦稱初因黃河改道。涸出此
地。達拉特旗與鄰盟土默特旗相爭。經欽差紹勘斷。以六成
歸土默特。四成歸達拉特。是以土默特有名六成糧地者。達
拉特旗有名四成糧地者。光緒二十八年。達旗既因西路公
司擬代付教案賠款。遂將四成地二千頃撥歸公司承領。嗣
因丈量不足二千頃之數。又飭達旗在後套長勝渠口地內
撥補。故名所補之地曰四成補地。貽前大臣於光緒三十
年二月間。因歸綏道懇請代籌中學堂經費。遂札飭公司於
後套地內撥地二百四十頃與學堂。即將此項應解晉省之
款。儘數歸之公司。作為學堂應交公司地價。每公司一上地售價
又載。四成地光緒二十八年冬間勘收後。未及歸公司轉放。
春夏間設局招租。初收短租錢。後改收銀。至二十九年冬。將

地放竣於三十年升科徵收歲課並無短租矣惟沙淤未放

之地仍暫租至三十三年春季始止案四成地達旗交不足

黃惱樓上下甲不色八拜水道燕安和等處渠地報墾先後文放一千四百餘頃所謂四成補地也

墾務奏議九月達旗賠地有裨蒙教並益餉楮奏竊照光緒

二十八年口外蒙教各案惟達拉特旗賠款為最鉅故其付

賠為較難而卒得陸續清償不至為全案之累者其關鍵在

籌贖賠地有以濟蒙急而應教需綜論茲事始終敢覩縷以

聞查達拉特旗教案議認賠銀三十七萬為數既多籌付不

易立約之後該旗所籌現款及以地租抵款僅十五萬兩當

奴才來邊督墾時該旗餘款尚鉅議以蒙地備抵惟教

堂不欲得地而該旗又無力交銀彼此相持幾釀事變前任

將軍信恪鍾泰先後咨由奴才將該旗賠教地畝設法籌贖

代付賠款。奴才以事關綬教卹蒙，不忍坐視。當勸令西路墾務公司議價承領。該旗初僅指地千頃，不敷賠款。迭經派委奏保道員分省補用知府李雲慶等展轉籌商，後允指瀕臨黃河之四成地二千頃，抵銀十四萬兩。計每畝核價銀七錢。明知地薄價昂，又須先付現款。該商豈遂不虞賠累，而公義所激，不能不力與維持。此籌贖之難也。及上年二月間，復派委奏保知府奉天補用同知張光鼎、奏保知府署薩拉齊廳同知清治、奏保直隸州用山西候補知縣胡懋鉞等，會同旗蒙各員前赴四成地勘丈交收。查其地與土默特六成官地毗連，本多疏薄，而應除之名廟、道路、河渠、沙灘等項，蒙人復不認除算，任意爭執。加以原佃各戶習嗜蒙利，一旦地歸官辦，疑慮紛乘。當丈地之初，遂有地痞多人糾衆持械毆辱蒙

員。籓。閉。要。挾。並。以。抗。阻。丈。收。倘。操。縱。一。有。失。宜。立。釀。鉅。案。幸。
經。張。光。鼐。等。經。權。互。用。勸。譬。多。方。得。以。化。險。為。平。從。容。集。事。
計。共。收。此。項。地。一。千。二。百。三。十。五。頃。取。具。該。旗。交。地。結。據。餘。
歉。之。地。議。於。他。處。撥。補。此。交。收。之。難。也。奴。才。於。收。地。後。復。飭。
張。光。鼐。等。會。同。公。司。人。員。籌。辦。租。放。又。適。值。上。年。夏。間。黃。河。
漫。漲。地。多。淤。填。間。被。冲。刷。招。墾。本。非。易。易。而。從。前。勘。放。六。成。
官。地。每。頃。僅。收。押。荒。銀。十。兩。有。差。極。為。輕。減。此。則。以。重。價。贖。
回。勢。不。能。仍。援。舊。例。辨。理。然。又。不。能。不。寬。卹。民。力。嗣。經。變。通。
招。放。認。地。既。分。其。差。等。繳。價。更。寬。以。限。期。就。瘠。擇。肥。任。聽。其。
便。至。上。年。冬。間。始。陸。續。招。領。竣。事。復。經。分。定。租。賦。章。程。凡。上。
地。中。地。每。畝。每。年。交。銀。一。分。四。釐。下。等。則。核。減。一。釐。耗。羨。遇。
閏。一。律。核。收。並。定。自。光。緒。三。十。年。升。科。啟。徵。此。又。招。放。之。難。

也。以上情形均經先後奏明辦理在案。伏維全蒙教案之結。由於達旗之先完。而達旗賠款之清。實恃乎公司之贖地。當兩相爭執之際。一願交地。一願得銀。教固膠持。蒙尤狡玩。若非勸由該公司籌收蒙地。代為付賠。必至前議頓翻。其間利導磋商。息教士之爭。而濟蒙旗之困。實屬力顧大局。現在所收之四成地畝。放墾已竣。未至曠闕。雖荒價緩收。難遽歸墊。而國家毫無所費。為晉疆闢地百餘里。為每歲添賦數千金。不惟式廓之增。兼助正供之入。於餉需尤不為無裨益。又札烏兩旗獻地祝嘏。奏竊據伊克昭盟盟長札薩克貝勒銜貝子察克都爾色楞。副盟長札薩克輔國公銜頭等台吉沙克都爾札布等呈。以世受國恩。毫無報稱。近復疊承寵眷。相與統率全盟。聞命自天。感慚無地。本年恭逢皇太后七旬萬壽。

覃恩錫福歡徹震區率土傾心欣呈方物奴才等擬將兩旗
公中之地北起阿拜素南止巴蓋補拉克長七八十里東起
圖林阿鄂博西止達古圖補圖寬十里二三十里四五十里
地方歸官放墾應得押荒銀兩儘數報効等情呈請代奏前
來
綏遠奏議十一月勘查渾津河莊頭餘地奏竊於光緒三十
年十月二十日准戶部咨開綏遠城將軍奏援案征收莊頭
糧石遵章改奏一摺並造具清冊咨送到部查據該將軍奏
稱糧餉同知應徵光緒二十八年分渾津黑河莊頭十三戶
應交米石又帶徵光緒二十六年蠲餘第三年米石均已掃
數徵完查此米石原額係二千六百一十六石八斗七合八
勺節經奏請豁免城地米沙淤河佔地奏請豁免米又報墾

地升科米。是前次請豁後報升科者。已非一次。何以自道光五年至光緒二十九年已屆八十年之久。並未報升科米石一次。顯有弊混。亟應加意整頓。以符原額。嗣據該委員稟稱。勘查渾津莊頭趙天會等十戶。每戶原承種園地六十頃。有餘十戶。共種地六百一十七頃一十六畝一分七釐九毫。內除歇荒城廢道路圪楞河佔水渠房佔草灘民地。現在統共祇贖原種糧地二百六十一頃六十七畝一分三毫八絲四忽。今~~大~~餘出可承種糧地四十八頃四十四畝六分七釐八毫一絲六忽。再查勘黑河莊頭胡建基等兩戶。每戶原承種園地六十一頃有餘。兩戶共承種地一百二十三頃九十四畝三分五釐二毫。內除城廢沙淤河佔水渠房佔道路草灘。現在統共贖原承種糧地一百零四頃七十六畝三釐。今丈

餘出可承糧地八十六畝五分二釐一毫。惟黑河莊頭李自
明一戶原承種園地六十頃七十四畝四分二釐二毫。內除
城廢沙淤河佔水渠房佔道路現在祇贖原承種糧地五十
一頃四十九畝六分四釐六毫。今丈其可以承種糧地四十
六頃六十四畝七分二釐三毫。照原額不敷地四頃八十四
畝五分二釐三毫。此地因沙灘最多河水難灌致有虧短。既
據該委員等所丈各園地有增有減尚屬認真核實以增減
之數統計共丈出渾津黑河兩園莊頭餘出可種糧地四十
九頃有零。足見年久弊混自應令其升科勿任再事隱匿。除
飭該廳即將丈出餘地令自明年照數升科以供兵食並擬
每年飭令該廳親往兩園清查一次有無承種隱瞞據實詳
報以備稽核而杜流弊。

以上均奉光緒
三十一年

墾務奏議。二月。杭旗報墾願照各處改收押荒奏。該旗地畝
全恃渠水為命脈。與達拉特旗大致相同。其渠租歲租章程
亦照達旗辦法。去後適後套大水。渠租一概未收。嗣據該貝
子呈稱。後套收租。向係於青苗出地時。驗其已種。方收租價。
所報中東兩巴噶地。甚寬廣。若每年履畝定租。既多繁擾。更
恐弊端百出。所收亦有名無實。請照開放各旗之例。一律改
收押荒。仍照前奏。以一半歸公。一半歸旗。並酌提渠費幾成。
呈請核辦。又請將應得常年歲租。以一半報効國家。稍助經
費等情。奴才查兩盟各旗地。皆封建原與察哈爾等處之隸
於郡縣者。情事攸殊。乃該貝子悔悟以來。異常恭順。今且願
照他處墾章。徵收荒價。是直以藩封之壤。欲與內地同列版
圖。如此。悃忱洵不可沒。第事闕創始。不厭求詳。復飭墾務總

局西盟墾局西路墾務公司同核議。旋據該總辦等覆稱。該旗改收押荒。雖與原議微異。然辦理既形簡易。規制又可久常。熟察情形。毫無窒礙。奴才遂采集衆議。批定將來徵收押荒。以二成提作修渠及各地商報効水渠賞費。餘以一半歸官。一半歸蒙。其常年所入歲租。亦官與蒙各半。仍業年酌提渠費。豫備歲修。札飭遵辦。該貝子欣然樂從。又將兩巴噶西界可墾之地約數千頃。呈報併入前次所報界內。亦經飭局派員驗收。至所報各地。既願易渠租為押荒。自應比照察哈爾蒙地暨王公報効馬廠成案。請領部照。發給佃種民戶收執。以符定制。又附奏伏查該旗分屬屏藩地。本封建。此次報墾。擬照察哈爾蒙旗及王公馬廠放地章程。自係力圖効順。且為一勞永逸之謀。然其間有應行變通者。必就地利之

所出民力之可行。參酌得中。乃可經久。後套丈放租地。向以二百四十弓為一畝。百畝為一頃。民蒙視為故常。應仍其舊。至於押荒租銀數目。則當因地制宜。不能拘以成格。茲酌中擬定。上地每畝收押荒銀九錢。中地八錢。下地七錢。除提二成撥充開渠經費外。餘則一半歸公。一半歸蒙。常年租銀亦經酌定。上地每畝徵銀四分五釐。中地四分。下地三分五釐。勿庸再加閏耗。惟無論上中下均各提出二成。以備修渠之用。蓋地質有肥瘠。渠工則無省費。其餘一半報効國家。一半由該旗赴經徵地方官衙門承領。綏遠奏議。二月。清理土默特地畝。奏土默特附近邊內。其服食起居。與內地民人無異。漸至竄情戒性。有地而不習耕耘。無畜而難為孳牧。惟賴客民租種其地。藉資當差。久之土容

混淆漫無稽考而奸民非以利餌即以術欺有本非業主擬
然冒稱者有霸種多年抗租不給者侵佔不已世業全失無
地者有地有地者無地此亟宜整頓者一也方蒙覬覦公產
勾串奸民私相租典或以一地而轉售數人或藉一地而侵
越數地輾轉弊混盡入私肥鞦韆不清愈久愈結將有甚於
察哈爾左右翼者此亟宜整頓者二也蒙旗兵官向無俸餉
全指所分租項當差今世產流傳半多迷失何能聚千百赤
貧之族而責以講求政治之端本無缺地無如何也若本有
而歸於無地可惜人尤可憐在一人差不能當在一旗公不
能辨此亟宜整頓者三也口外各廳蒙漢纏訟起於地事居
多世產無部照蒙例嚴禁賣地租典自無印契昔年蒙俗渾
噩並白契亦無之一遇涉訟官斷無從惟有私鬪而已甚至

釀成命案。仇殺相尋。是以地畝一日不清。即爭端一日不息。此亟宜整頓者四也。五廳糧地。綏遠米地。雜出土默特一旗中。自來隱地。匿糧一經官查。皆藉蒙產為影射。以致兵米不繼。國課多虧。其弊莫可窮究。公田報棄不聞。一復其初。缺地暗侵。勢將漸歸於盡。彼則兩混。此則兩妨。蒙地一清。則此疆彼界。不辨自明。既尺土不得自私。自正賦無從隱漏。此又一舉兩得之道也。游牧本蒙人生計。從前不知畊作者。以地租於客民。仍自留牧場。今牧業全廢。牧地亦無。即欲自務躬畊。尚須輾轉他租。至舍己芸人之日。雖愚弱亦積不能平。以數百里膏腴。而不能自食其利。以千萬人游手。而不能自安其生。當貧累未極之時。官力猶得而制之。所慮者在數十年後。此又思患預防之心也。在該旗當年率土來歸。蒙恩賞居其

地乃以朝廷之實惠。竟便痞棍之私圖。默奪潛移。致令地非
其有。固由不善自理。亦以任斯土者。漠視其地與人。上則疾
苦罔聞。下則顛連無告。即有不忍坐視者。終以旗漢畛域不
敢舉辨。亦並不敢奏聞。奴才貽穀督墾頻年。開通蒙部東之
察哈爾兩翼。既已疆理井然。西之伊克昭七旗。亦將經營就
緒。獨此土默特一旗。如絲圍結。雜錯其間。蒙窮固可矜。而以
地大物博之區。不能與左界右疆結成一塊完土。撫茲沃壤。
惋惜殊深。夫為政必自經界始。經界不正。而欲人人各守己
業。畊鑿相安。此必不能之事也。即以各廳一境論。既多迷失。
無所屬之田。又結蒙漢不相安之患。誰無覬覦。豈盡良善。而
欲民不爭政。不擾。又豈可得乎。况其全旗官民。經年祈禱。若
不及時經治。是痛癢無關。直以化外視之。既拂輿情。益深痼

疾。後雖有扁鵲。難為醫也。現聞晉省派員出口。分赴各廳。清理糧賦。奴才等亦擬遴派妥員。附同一律辦理。惟綏與晉同時並舉。斯蒙地糧地不致彼此互推。藉詞隱匿。其如何辦法。總期蒙地不失。漢民不擾。寬以既往。兩持其平。遇有蒙漢交涉事件。當隨時商同山西撫臣。妥為籌辦。又附奏再口外歸薩托和清五廳城鎮。皆就土默特地面建設。昔年蒙俗渾噩。所有官兵。各分世產。皆不善自經營。任容民寄居。或建築田廬。或開設鋪戶。但歲得地基之常租。並不知其地在何處。與夫四至。廣狹。年復一年。遂至弱為強。脇愚為智。欺非侵佔。即隱藏。愈牽混。愈迷失。初則地多而漸至於少。久則有地而全歸於無。至有祖父租典於漢民。約有年限。至其子孫不知收產。且不知祖父之名者。此則無心遺失。彼則有意隱匿。如此

情事尤多。就歸化一城論。公產十之二三。乃比戶數萬家。歲租無幾。頻年報市房傾塌。租日就減。其實填城溢郭。並無一處空間。蒙旗兵官無餉無俸。衙署又無經費。全指各項租產接濟。當差辦公。若竟聽民戶行欺。蒙業半失。官差舞弊。公用日虧。將使市廛全無。反容為主。後之貧累。更不知伊於胡底。以地大物博之旗。成財盡民窮之勢。其業可惜。其人實亦可矜。叠據全旗各參佐印稟。公請整頓。前來奴才等以所稟情節。證以平夙見聞。實有不忍坐視者。查蒙地例不准賣。其自立約據。私典私租者。豈能經官稅契。以故無案可稽。一遇蒙漢爭執。雖有聽之才。亦無從判斷。且有奸蒙暗訪地無業主。出而冒認。久爭纏訟。轉累商家。今一團亂絲。未便聽其再結。惟有以查保甲之法。清理地基。就已有之戶籍。過而詢之。其

跡可尋。不難一時就緒。所易着手者。各處就蒙地建設房間。雖年久戶多。房產有時而變遷。地基則百年而不易。但查其房間屬自何人。地基屬於何姓。其房地各有業主者。以司印蓋契。詳註冊檔。仍發還。令其各守己業。若房有所屬。而地無所屬。則為侵佔隱匿也無疑。此項地基即作公產。租歸公用。寬其既往。由官另給新契。蓋印發交原主。不奪其房業。如此辦理。蒙業可保。官產不失。公用亦饒有餘資。洵屬一勞永逸之計。✓

壑務奏議。五月杭旗壑地原定租章略加變通奏。三月二十七日携印起程。行抵包頭壑局。將應行及時籌辦事件趕緊布置。隨即赴套。逐日經過地方所有熟地荒地幹渠支渠無不逐加考察。凡地形之高下土脈之肥磽渠水之遠近熟審。

而默識之。歸途行過希尼昭時。適該貝子阿爾賓巴雅爾已
前期到彼。候商渠地各租事宜。始知前定押荒歲租數目有
亟宜加以變通者。查奴才原定章程。上地每畝收押荒銀九
錢。中地八錢。下地七錢。除提二成充開渠經費外。餘則一半
歸公。一半歸旗。歲租上地每畝每年徵銀四分五釐。中地四
分。下地三分五釐。無論上中下均各提出二成。以備修渠之
用。當時係據局員所稟先行酌擬。及此次周歷各渠。因流溯
源。皆已得其要領。綜計杭錦旗地勢。狼山峙其北。黃河亘其
南。地居中央。引河為渠導。以就地。由南而北。節節漸高。雖激
之使行。疏之使注。而揆諸就下之性。則施工非易。而壅閼尤
所宜防。加以河水灌輸。沙泥俱下。有時上游水驟。下游沙淤。
倒退狂瀾。動至決隄為患。故從前農民開渠之家。渠身必每

歲刷之使深。渠背必每歲培之使厚。其所以費資甚鉅。致力甚勞。而決不肯舍而不營者。則以地視渠為轉移。無渠即不啻無地。向來民戶租種抗地。率皆於渠租不惜多出。而歲租亦薄納之。誠以渠之所經。必無棄地。而地之所在。不盡通渠。是渠租之宜另徵。並宜多於地租。此其明證。即奴才此次所至各地。訪諸輿論。亦請加渠租而輕歲租。以為渠水足地利自足。租自有所出也。奴才熟加籌計。擬請將原奏章程再行釐定。該旗渠地應徵渠租。每年每畝收銀四分五釐。以為按年修補渠工之費。此項渠租。無論上中下地。均歸一律。並照該旗向來租地辦法。渠水到地。始收渠租。其未經澆灌者。僅收歲租。至歲租數目。即量予遞減。擬將該旗上則地比照歸化廳糧地賦額稍加。每年每畝徵銀二分二釐。中則地比照

察哈爾左右翼墾地賦額。每年每畝徵銀一分八釐。下則地
比照綏遠城牧廠墾地新定賦額。每年每畝徵銀一分四釐。
歲以為常。仍照前奏。毋庸再加閏耗。所收歲租。以一半報効
國家。一半由該旗赴經徵地方官衙門承領。其押荒數目。亦
即遞減為上地每畝徵收八錢。中地七錢。下地六錢。仍按地
則等次。臨時酌量分填。語曰。百聞不如一見。奴才履勘所及。
加以體驗考查。確知其應如此。所以不敢拘執前奏。而於押
荒。渠租。歲租。必請變通改定者也。又附奏。命婦報墾。請旨嘉
獎。再伊克昭盟七旗報墾。以準格爾為最後。該旗蒙眾。尚未
能上下一心。故雖範圍。有時仍懷疑懼。奴才正在因勢利導。
旋據前乾清門行走花翎三品台吉拉蘇倫多爾濟之妻愛
新覺羅氏呈稱。竊命婦遠適藩封。涵濡德化。何幸躬逢盛事。

墾務宏開。變斥鹵為膏腴。奠窮荒於富庶。百世利賴。蒙實沾之。凡有知識者。莫不欣懽頂祝。是以各旗地畝。均已次第暢開。無如準格爾旗蒙人。雖已報墾於前。閒生疑阻於後。命婦本和碩定郡王之裔。分輝宗牒。世受國恩。際此時局艱難。義當首先報墾。况旗事即如家事。利墾實以利蒙。敢不竭盡愚忱。以為之倡。情願將本身自有旗下所屬柳清梁之地。報墾二千頃。遣繼子三品台吉福靈阿呈報前來。查該命婦於衆情稍有觀望之時。立即報墾私田。為全旗之倡。率在各旗王公貝子且難敏。決如斯。乃奉上急公出之閨閭。洵屬深明大義。超越尋常。且所報至二千頃之多。尤足以資感勸。其子係該旗原任札薩克貝子札那格爾迪之嗣孫。秉承闡訓。星夜來綏。年甫十餘齡。奔馳數百里。艱辛不避。顧忘毫無。具此英

資允成大器。其寡母孤子，忠義可風。一則無愧天潢，一則無慚世胄。擬懇傳旨嘉獎，以示激揚。

七月統籌後套渠地全局，亟宜大加脩治。奏竊奴才於本年四五月間履勘後套循渠視地，將渠地大概情形於奏改杭錦押荒歲租摺內擇要陳明。然此第就一旗而論，猶未合渠地全局言之也。查河套七旗中惟杭錦達拉特兩旗兼跨黃河南北，其在河西北外之地橫亘套外處處依渠為命。遼視他處獨腴，綜計兩旗各大渠皆杭受其源，達承其委。從前墾務未經官辦，地由民戶私墾，渠亦由民戶自開。凡來套種地者甫經得地，先議開渠支別，派分各私所有。往往一渠之成，時或需至數十年，款或糜至十餘萬。父子相代，親友共營，而已成之渠，又必每歲深刷其身，厚增其背，其流動充滿而洇。

至溉田千百頃者。良非易也。自二十九年春夏間。七旗一律報墾。於是杭達各地。戶有渠之家。知地即統歸官放。渠亦難據為己有。先後將祖遺自挖各渠。呈請報効。其中大幹最著名者。若五加河塔布河。若纏金渠。長勝渠。老郭渠。其餘報効小幹渠。及以枝渠報者。尚數十家。奴才飭局勘收。估計工程。一面由西路公司添招股本項下。酌償渠費。一面將已收各渠。飭公司備款添員。逐一加脩。其年久漸淤者。濬之。疏之。使無壅遏。又將各大渠中間扞格不通之處。創興工作。俾其綺交脈注源。匯流分。隨地皆可引渠。有渠皆能灌地。施工之始。即將長勝渠改名長濟渠。纏金渠改名永濟渠。挑濬深通。因勢利導。又添修枝渠數道。以分水勢。而廣渠利。其老郭等渠。亦以次及之。此次循行所至。一一親歷無遺。凡前飭加修親

開各工已成十之八九計可灌田萬餘頃就目下而論應收
押荒渠租約在三四十萬兩足抵所償渠費所用經費而有
餘似已收効捷而獲利倍矣然從來遠大之業不囿近功故
規畫必計百年運量至周數世自昔邊臣興利從事農田引
水疎陂久而勿廢若漢書溝洫之志史記河渠之書既徵其
意美法良尤見其思深慮遠西北近河之地昔人稱為上腴
徒以僻在邊陲介於戎索不勤遠略者或度外遺之我朝撫
有諸藩悉主悉臣咸遵約束獨此開墾一舉經久未行仰賴
聖主恩威奴才得所藉手既知為無窮之利即不敢不矢以
經久之心查後套地必附渠渠所能澆始得為地以兩旗沃
野千里而猶菁華久闕未盡南東其畝者則以渠利止此故
也今達拉特旗既請渠至何處地即開至何處杭錦旗呈報

之地亦所在宜。渠計兩旗已開之地，不到萬頃，而利已倍蓰。倘擴而充之，渠日加多，即地日加廣，約計套地，可得數萬頃。異日所入，將有數倍於今日者。若僅規規目前，而不作引伸之計，不惟地利可惜，奴才自問亦覺職分有虧。其何以仰副朝廷委任耶？現在墾員畢集，官力正充，不趁此牽作經始之時，一氣呵成，漸推漸廣，過此以往，即有賢疆臣力征經營而再造之艱，等於謀始。孟子曰：今時易然，時誠不可失也。此人力之事半功倍者也。但水勢愈引而愈上，必激之而後能行。渠工愈治而愈難，即節之而已不資。近來部庫支絀，晉省更無餘力顧此。奴才晝夜籌思，惟有就現在應收之款，悉歸工作，迴還挹注，務竟其功。如修鐵軌成一段路，開一段車，以所收車資仍用修路。如此源源更代，不數歲利大興矣。凡此皆

就已有之渠。塞者通之。淺者深之。短者長之。幹者枝之。循河之故道。以暢來源。順水之下游。以為洩處。其事雖繁於創。而其功牽出於因。若平地鑿空。無中生有。而欲使決渠降雨。原隰龍鱗。恐非三五年所能奏效。更非數十萬所能奏功。此又財力之事。半功倍者也。擬請旨下部臣。所有伊盟各旗押荒。達拉特旗現收渠租。應歸蒙外。凡應歸公者。均暫緩提撥。以備渠工大修之費。需之欲緩。則報之愈豐。程効於一時。轉失百年之利。事有必至。理有固然。奴才明知部庫需款孔亟。而必固請暫緩提解者。誠以一時之利有限。百年之利無窮也。如蒙俞允。奴才即將晉省前墊經費。逐漸退還。以清款目。即西路公司亦擬將前次所集官商各股。結清本利。從此多添官股。少留商股。俾以後渠利官居八九。商居一二。將來暢收

利益。仍當專款存儲。隨時報部。聽候撥用。
九月。準旗蒙員。抗壑。請予嚴懲。奏竊查。伊克昭盟七旗。惟準
格爾旗。報壑為最後。該扎薩克貝子。珊濟密都布。暮年襲爵。
闇弱無能。該旗事務。盡為協理台吉丹丕爾所把持。丹丕爾
復逞其老~~練~~任性妄為。上年該旗。因議定教案賠款二萬九
千兩。無可取償。以翟林窩子等六村熟地三百頃。作抵。經奴
才商允。教士由壑代償現款。復又為其磋減款二千兩。將地
贖回。奏明在案。嗣屢次派員勘丈。該處地多硠瘠。除去沙灘。
並不足三百頃之數。難以歸還。墊款。飭由該貝子。另在報壑
地內設法籌還。已交之地。仍歸該旗。旋於本年正月間。據該
貝子將該旗黑界地一段。開明。四至。以印文呈報。並請俟該
地放出後。在該旗應得荒價內。扣還墊款。奴才即飭壑局派

員勘收界址。於五月間。在該旗什拉塔十里長灘。沙梁川三處設局開辦。委令郡王旗放地委員知縣岳鐘麟。分率員司兼理丈放。詎料該協理台吉丹丕爾於委員到地之始。即向蒙漢民戶徧播謠言。煽惑禁制。不許其向局掛號認地交納押荒。並聚集芳蒙多人。分持兵械到處抗拒。該委員等疊次函稟。經奴才札飭將丹丕爾先行摘去頂戴。論其當時情狀。本應立即奏參。惟念蒙性顛愚。但使可以轉圜。必留其自新之路。是以於嚴檄責斥後。仍令派委員加派曉事之蒙員數向其反覆開導。並曉諭各民戶。毋得信其煽誘。原冀該員漸知悔悟。尚可稍贖前愆。乃丹丕爾狂悖性成。不明順逆。非惟抗不遵順。且敢糾約蒙人們肯吉亞助之為惡。招集匪徒兵械。愈集愈多。其敢如此橫決者。因黑界地早被丹丕爾盜放。

民戶交租於蒙旗。盡為丹丕爾侵蝕。專擅利益。蓋已多年前。此該貝子以旗地報墾。丹丕爾已多所阻撓。迨報及此地。尤所深忌。愚弄貝子。籍束蒙民百計。敗之。務求中止。而後快。及該貝子迫於大義。迫於賠款。卒以此地呈報。既發其覆。又奪其利。丹丕爾銜之刺骨。而陰謀秘計。無可復施。遂以挺而走險。出之。們肯吉亞本一著名凶徒。久欲藉端生事。有丹丕爾為之謀主。遂敢居戎首。而不辭。本年七月十一日。該蒙眾往攻十里長灘東局。聲稱定期開仗。二十二日。復投遞書函。言如不撤局。定即將委員人等逐出長灘。該處護局兵勇人本不多。遂議遷併什拉塔中局。二十四日。們肯吉亞復率蒙眾百餘人。各携抬槍馬槍噴筒等械。分撲中局。該局僅有兵役數名。勢難抵禦。各司員等被逐。渡河。至河曲縣地方。暫避。該

蒙衆遂將局中文牘賬簿等件。概行焚燬。並將委員等衣物。
搶掠一空。現又聞其將從前報墾之蒙員格什巴圖等。捆縛
謀害。疊據西盟墾務局總辦知府姚學鏡稟請究辦。前來。奴
才查準格爾旗現已遵旨報墾。復因賠教墾款無着。允於墾
地荒價抵還。朝廷之待蒙部。不得謂非仁至義盡矣。丹丕爾
身為協理台吉。自應輔助^助該貝子竭力經營。乃竟聚集兵械。
搶局逐官。視國法如弁髦。實屬形同背叛。况於諸旗咸遵約
束之後。首發亂端。思欲搖動墾務全局。其情事尤為可惡。若
不從嚴懲處。何以昭炯戒而儆效尤。相應請旨。將準格爾協
理台吉與們肯吉亞及從亂之蒙衆人等。一併由奴才飭令
嚴拏務獲。歸案究辦。以為大干法紀者戒。該貝子珊濟密都
布。未能禁約蒙衆。致令聚衆抗官。亦屬咎有應得。惟其秉性

愚柔丹丕爾久已玩諸股掌。政柄下移。非復一日。此次肇事。實由權力未伸。並非出於本念。情尚可憐。且該貝子平日於墾務事。亦未有心違抗。應請暫免參處。飭其趕緊將丹丕爾們肯吉亞一千人等掣獲交案。俾期自贖。仍查看其能否力圖振作。管轄蒙衆。助成墾事。再行奏明辦理。

九月。杭旗墾地改徵押荒。按年報効。歲租一半。又復報効。鉅款。奏竊奴才前因杭錦旗貝子阿爾賓巴雅爾於開去盟長後。悔悟効順。將該旗東中兩巴噶地報墾。並將西界王文祥地。續行呈報。統願改徵押荒。以常年歲租一半歸公等情。於本年二月間奏明。並聲明俟地界收齊。再籲請恩旨。仰蒙俞允在案。嗣經飭由西盟墾務局將所報地分段。漸次招放。本年四五月間。奴才往後套察看渠地。已將該地履勘一週。近

渠之地半已開墾。其未墾者則彌望平原。土性沃衍。枳芟紅
柳翳鬱繁茂之處。地質尤佳。但得渠水灌輸。榛莽一除。便堪
播種。各段均設分局。陸續放墾。將來放地之多寡。必視渠之
所及為衡。此奴才前奏所以有大治渠工之請也。上年十月
復據該貝子呈稱。世受國恩。無以為報。今本旗放地開渠。分
收租項。皆由聖主所賜。敬念時事艱難。何忍自私自利。謹報
効練兵處經費銀二萬兩。又綏遠城工經費銀五千兩。綏遠
城學堂經費銀五千兩。現在該貝子請由該旗招墾。應得押
荒項內扣留三萬兩。轉解呈交前來。即伊盟中烏審郡王札
薩克三旗議收押荒報効常年歲租二成。亦賴該貝子導之
先路。况復慨輸鉅款。分濟要公。或為明耻教戰之需。或為衆
志成城之助。至以育才為急務。尤識時政所當先。既堪贖既

往之過愆。更足勵諸藩之忠義。合無仰懇天恩。將杭錦旗貝子阿爾賓巴雅爾先以盟長記名。將來遇該盟更換盟長時。由理藩院奏請。仍行簡放。出自逾格鴻施。

十一月。準旗蒙匪拒捕傷兵。現將掣獲各犯。分別審辦。奏前以準格爾旗東協理台吉丹丕爾。因該旗貝子籌付賠教墊款。報墾黑界地畝。有妨私計。立意阻撓。當奴才派員收界後。於五月間。在該旗什拉塔長灘沙梁等處。設局開辦。該犯丹丕爾。始則造謠煽惑。領戶不前。繼則招聚劣蒙。持械撓抗。論其當日情狀。已屬狂悖不法。然猶未敢公然搶局。逐官也。奴才當念蒙性愚頑。義在開導。僅將該犯摘去頂戴。俾知改悔。一面飭令該貝子派員諭解。並加派通曉蒙語之員。向其理喻。但使先逆後順。尚可寬其罪尤。詎該犯凶悖性成。甘居戎

首。膽敢糾約惡蒙們肯吉亞、二達子、三達子等。聚集蒙人百餘名。分持槍械。於本年七月十一、二十二等日。往攻長灘東局。逐出員司人等。方經遷併什拉塔中局。二十四日。們肯吉亞復率蒙衆。向中局開礮攻撲。該局員司人役等力難抵禦。奔避河曲縣地方。幸未遽罹慘禍。所有局中文牘帳簿及委員等衣物。均經該蒙衆焚搶一空。遂更分股肆擾。不惟阻止準墾。並已搖動全墾大局。奴才查其情事重大。未便姑容。當經奏請將首犯丹丕爾即行革職。與們肯吉亞及從亂人等。一併嚴拏懲辦。奉硃批着照所請。該衙門知道。欽此。自應欽遵。妥速辦理。惟奴才仍不欲遽煩兵力。復經嚴飭該員子力行查拏首要各犯。送案究治。並經諭示蒙衆。速即解散。免蹈刑誅。原使其黨羽離心。元惡自無難投首。不致有勞師動衆。

之舉。查該逆犯事在七月。奴才遲至月餘始行參奏。正為該
逆留轉圜地也。此次奴才巡視西盟。首先馳赴準旗。接見該
旗貝子及其他蒙官。均尚恭順。惟一詰責該蒙犯何以未經
獲案。則均難形於色。及飭取丹丕爾拘禁之蒙員格什巴圖
兩次予限。亦未取回。並因而加虐。該旗貝子無可如何。實絀
於權力之未伸。而探訪丹丕爾背叛情形。乃又日益鴟張。於
其所居之南坪地方。築壘濬濠。鑄造礮火。脅令所屬蒙民丁
壯四面邏守。內為負嵎拒官之計。外則主使們肯吉亞等仍
率蒙衆四出滋擾。復函唆烏審郡王達拉特各旗。同力拒壑。
烏審貝子幾為所惑。致將前報各地亦迄今枝梧未放。不謂
丹丕爾一老悖蒙官。敢於肆行不法。撓亂全壑。橫決一至於
此。若仍瞻顧寬容。後將不可收拾。奴才當與該貝子商定。及

早攻擊。一面由奴才分飭駐防口外之大同續備軍馬隊管帶譚湧發、口外續備軍第四旗步隊管帶胡太才、墾務衛隊管帶李得功、及綏遠常備軍管帶穆圖哩、春秀等分派馬步各隊。一面由準旗貝子派出該旗東西梅楞納木達克色楞、索諾木色楞等帶領蒙兵會同前往十里長灘。距丹丕爾所居之南坪三十里。擇要分札相機進隊。兒拏去後，奴才由準旗西行，歷達旗郡旗，折向包鎮暫駐。料理西壑各事。旋據管帶譚湧發等呈報，該各隊於九月十一日抵長灘分駐。後遣派蒙人致書丹丕爾，令即放出格什巴圖，解散蒙衆，自行投首，仍可予以生路。該犯抗不聽從。復經梅楞納木達克色楞差領催奇落送信開導，並被該犯拘捆不放。遂於十三日管帶譚湧發等率隊協同蒙員分路開往南坪。我隊進距匪巢

三四里間。突有大礮轟發而來。繼以槍擊。子如雨下。我隊奮力抵禦。一齊擁進。直撲丹丕爾住院牆根。差弁金升受傷陣亡。各隊正兵受傷者九名。圍至是日夜間。突見丹丕爾院內火起。詢據逃出蒙人稱。係子藥失火。延燒東西窰房等語。十四日各隊奮勇猛進。撲入院內。救出被拘之蒙員格什巴圖。及送信之奇落等人。當有丹丕爾之次子二台吉依登甲。率其家屬出懇投誠。蒙匪乘隙逃走百餘名。俘獲二十八名。搜出劈山礮一尊。抬礮槍械二十餘件。惟丹丕爾徧搜不獲。詢據丹丕爾之次子次妻。均稱於十三日開礮後。率領蒙衆十餘名。向北逃去。不知去向。所有搜獲馬匹車輛等項。點交東西梅楞轉飭收存。各等情。同日又據準格爾旗貝子呈。同前因。奴才查丹丕爾身為協理台吉。不明順逆。乃敢違旨阻墾。

搶局逐官。並唆使遵順各旗。群相撓抗。牽掣全局。且於奴才
奏參革職後。人文勸諭。至再至三。毫無悛悔。此次派隊協同
該旗往拏。復敢號令匪黨。開槍拒捕。傷亡我兵。實屬叛迹昭
著。罪不容誅。除仍嚴飭各隊協旗搜緝。並通飭西盟各旗暨
咨會鄰近省分一體嚴飭緝拏。此案首犯丹丕爾與同惡相
濟之們肯吉亞二達子三達子一千人等。務獲治辦外。其拏
獲丹丕爾之次子依登甲及匪黨二十七名。現已解送奴才
行次。經調委署薩拉齊廳同知余寶滋署五原廳同知知府
姚學鏡會同提案。隔別審訊。據審明取供稟請核辦前來。奴
才覆查此案。蒙犯內三札圪兔僧肯二名。實係前次從們肯
吉亞攻搶壘局得贓。俵分及此次拒敵官兵之犯。罪無可原。
擬即行就地正法。以昭炯戒。二台吉依登甲係屬丹丕爾親

子雖於伊父逃逸後。立即投誠。並據供稱。於丹逆起。意抗拒。屢勸不聽。未從^助惡。然難保非有心避就。達楞泰係丹丕爾副管事人。雖詢無搶局分贓持械拒捕重情。亦未可信。擬均交薩拉齊廳監禁待質。俟拏獲首犯到日。再行定擬。案內民人賀雙來。係磚瓦工匠。訊無隨從抗拒情事。應飭取保開釋。其餘蒙犯二十三名。均係丹丕爾所屬旗丁。被脅拒守。有到丹丕爾之家。僅一二日者。尚非甘心從逆。若竟一律駢誅。不無可憫。然若令脫身法外。又無以儆愚頑。擬飭從重責懲。後發交該旗屬嚴行拘禁。俾知懲儆。而免效尤。除將錄取犯供咨明理藩院查照外。至陣亡受傷各弁兵。已分別卹賞。並已派委員司仍於長灘什拉塔等處。復立墾局。飭即會同準旗蒙員暨陝晉廳縣。妥速開辦。以重蒙墾。又附奏。再丹丕爾憑

權藉勢匪伊朝夕。準旗事務久為該逆所把持。任性妄為。而莫敢誰何。其積威所致。可以喜怒制一旗之命。故其肇事以來。蒙情惕惕。均不敢過問。即該旗貝子左右蒙官。明知該逆顯干法紀。無能為贊助^助禁阻之力。並該旗一切公件。亦因而廢擲。無敢辦理。此次奴才親蒞該旗。查其情形。立飭該貝子將丹丕爾所遺協理台吉之缺。揀選妥員。經奴才驗看擬補。遞遺各缺。亦均驗補有人。飭各勤慎辦事。該旗事務始漸就緒。惟丹丕爾等一日不獲蒙旗。一日不安。即壑務亦難遽順手。除由奴才分飭防守營隊。協同所屬各旗。跟踪躡緝。暨咨會鄰近省分一體嚴拿外。擬請旨飭下理藩院行令伊克昭烏蘭察布兩盟。阿拉善王旗。寧夏將軍。及察哈爾都統。庫倫辦事大臣。烏里雅蘇台。科布多將軍。大臣等。一體嚴飭所屬。

實力協拿此案蒙犯首要丹丕爾們肯吉亞二達子三達子等務獲送案懲治以靖亂端。十二月殺虎口驛站地歸官墾放奏。據殺虎口管站員司理藩院候補員外部奎顯呈稱所管殺虎口土默特鄂爾多斯歸化城等處各站草地被附近民人違例私墾隨處皆是。本應一律封禁惟查該民人等墾地較多歷年甚久勢難奪其成熟之田概加驅逐且恐因驅逐之故以致失所別釀事端。若竟聽其私相墾闢不加清查將來必至站地皆無於台務大有妨礙擬請將私墾各地報墾由官大放徵收押荒未墾各地亦即明定限制庶於國計民生台務均有裨益開具各站荒地四至呈請核辦等情前來奴才當即派員前往各處詳加查勘隨據覆稟按照單開各站逐一清查其歸化和林

格爾一帶地土較沃。私墾甚多。黃河以西蒙境內站地七處。均約方四十里之譜。土脈磽瘠。民戶私墾。約居十之二三。伏察奴才辦理察哈爾墾務。於民人私墾台地。均令補繳押荒。按則升科。仍酌留未放地畝。以為各台養贍收放之資。均經奏明辦理在案。茲該員司所稱站地私墾各節情事。正復相同。自應仿照辦理。俾得杜奸民侵越之弊。益國家維正之供。查此項地畝。在歸化和林等處者。其徵收押荒各事。擬請照察哈爾右翼章程辦理。在伊克昭盟鄂爾多斯境內者。查其附近何旗。即照該旗現行章程辦理。仍酌給經費。俾資各站贍養。應差。

十二月。致外務部軍機處電。洪密。準格爾旗已革協理台吉丹丕爾。阻墾倡亂。前派兵往拏。拒捕傷兵。乘隙逃遯。僅獲該

逆次子依登甲及從匪二十七名。業將辦理情形。暨仍通飭
嚴拏奏明在案。該逆自南坪逃後。沿途煽聚漢蒙匪徒。踞喇
嘛洞險隘。勢復燎原。經委員楊守性探悉。由準旗壑局委員
林毓杜會同楊守性分率壑務衛隊大同馬隊二三十人。分
截要隘。因兵力太單。圍攻至八九日。未能深入。飛文往包頭。
約會管帶游擊譚湧發副將胡太才。星夜親往接應。及馳至
該處。該逆先已乘夜由小逕潛竄。各隊分追。獲賊六名。楊守
性率兵尾追。直抵準旗東南豹子塔。崔成寨。該逆等添聚匪
衆。負隅固守。譚湧發胡太才林毓杜各率弁兵。於本月初九
日同抵豹子塔。分路合圍。該逆鎗礮齊施。我兵奮勇猛撲。數
次猝難取勝。乃於是夜五更。各軍潛至寨門附近。外委劉光
泰等鼓勇先登。餘兵由寨牆繼入。且戰且進。胡太才面受

傷仍不却退。鎗斃該逆長子拉木甲及匪黨十數名。餘匪奔潰。立將首逆丹丕爾擒獲。並獲餘匪十九名。礮六尊。槍數十。由貽穀飭將首從各犯解綏審訊。查丹丕爾肇亂以來屢次抗拒官軍。煽惑各旗。幾搖全局。情罪重大。未便稽誅。擬於取供後即行正法。其餘從匪分別情事重輕。定擬辦理。現在伊盟各旗人心大定。墾局照常辦事。理合先行電陳。乞代奏。貽穀漾預印。三以上均光緒十一年案緒

正月。準旗蒙匪首從就擒。分別懲辦。奏竊前因。準格爾旗逆犯丹丕爾。由南坪在逃。經奴才續派兵隊往捕。於上年十二月間。將該首逆擒獲。並獲餘匪十九名。鎗斃匪黨十數名。奪獲鎗礮多件。當將獲匪及擬辦大概情形。電陳在案。查該逆丹丕爾。自南坪逃逸後。率領悍黨北竄。到處勾結蒙漢奸民。

入夥屯運糧草鑄造槍械遠招鄰境匪徒援應其長子拉木
甲復助之為虐上年十月間曾持刀謀刺該旗貝子未成奴
才以該逆煽亂猖獗勢恐燎原亟宜及早擒獲遂飭各軍分
投嚴密查拿重懸賞格示諭漢蒙人等協拿復派已革典史
楊守性隨處購綫去後旋於十二月初間疊據該旗西協理
台吉額爾齊木吉爾噶勒及該旗壑務分局委員直隸州知
州呂繼純林毓杜暨楊守性等各報稱訪悉該逆丹丕爾等
現逃往喇嘛洞地方擁眾多人意在復行搶局並分往該旗
各司官家尋仇是處負山面河形勢極險又復小徑歧出不
易圍攻該員等得信後即由林毓杜會同楊守性率壑務衛
隊及歸壑務調遣大同馬隊四旗弁兵等二三十人先往分
截要隘因該匪深藏洞內該處先有平民居住恐及無辜遂

力謀圍困。不敢遽施攻擊。又以兵力太單。士卒圍困。至八九日。寢處霜雪。漸已飢瘦。該員等一面飛文約會大同。續備軍管帶譚湧發。口外續備管帶胡太才。星夜親率兵丁接應。一面稟由奴才添濟快鎗子彈。迨譚湧發。胡太才由包頭防次馳至。該逆已於初四日由小徑夜遁。各弁兵望影分追。獲匪五名。胡太才另獲長命子。即烏爾兔納素一名。楊守性率兵尾匪直抵豹子塔。崔成寨。該逆正在聚合。徒黨負嵎固守。楊守性率兵五名。衝入寨內。幾被困害。幸譚湧發。胡太才。林毓杜各率兵弁。於初九日辰刻同抵豹子塔。分路合圍。該匪遽開砲轟擊。我軍開鎗還擊。楊守性乘間得免於難。兵已受傷二名。是處地勢尤險。於喇嘛洞。而鎗砲尤多。蓋其平日所恃舊巢也。我兵相持半日。勢難取勝。因合謀於寅夜奪寨進攻。

是夜五更時。月色沉暗。各軍均潛至寨門附近。大同四旗口外二旗及衛隊巡哨弁兵數人乘隙鼓勇奪門。餘兵由寨牆蟻附而入。且戰且進。戰至天明。各隊齊集。譚湧發胡太才督隊冒鎗直進。胡太才面腿均受鎗傷。仍不少却。該匪砲彈如雨。我軍奮勇猛擊。鎗斃蒙匪十數名。匪衆四散紛逃。陣擒丹丕爾。並擒獲從匪十九名。奪獲劈山砲四尊。牛腿砲兩尊。鎗數十枝。我軍受傷七名。先後由譚湧發胡太才林毓杜揚守性飛稟前來。奴才批飭將首從各匪一併速解歸化審辦。鎗砲由局收存。旋據將丹丕爾等押解到城。奴才督飭署薩拉齊同知余寶滋署五原同知姚學鏡提同前次捕獲之該逆次子依登甲從匪達楞泰長命子等分別審訊。據丹丕爾供認煽惑阻墾。招集蒙漢匪徒聚蓄鎗械。並歷次開砲拒捕。傷

亡官軍弁兵等情不諱。質之依登甲亦於其倡亂搶局抗拒官軍各事無從為之遁飾。以該首逆情罪重大未便稽誅。當於審明後將其就地正法。以昭炯戒。該逆次子依登甲訊未從逆。且當其起事之時曾經勸阻。本可即從寬宥。惟此次遽通疏釋。恐生枝節。擬仍暫交薩拉齊廳羈禁。嗣後如察其果係畏罪守法再行取具妥保開釋。從匪達楞泰長命子即烏爾免納素兩名在丹丕爾家辦事有年多。預詭謀惟首惡伏誅。其他黨惡均可以脅從曲宥。請貸其一死。一併交廳永遠監禁。其脅從未久情節稍輕之。必得格等十八名除奇滂長有子蒙濟圪什巴兔四名因病先後身死外。餘均查照前次辦法從重責懲。分交該籍該旗嚴行拘管。俾做愚頑。年尚幼穉及訊未從匪之二三金泉子王石小子三名應從寬准予

保釋。此案該逆丹丕爾以該旗協理台吉於奉旨辦理事件。首先抗違。復縱令蒙匪們肯吉亞等聚眾起事。搶局逐官。並暗煽各旗劣蒙。群起為難。烏審全旗報壑年餘。延不交地。郡王旗已放之地。蒙眾四出。分收押荒。抗違兩旗。亦於秋後。在後套聚眾抗租。滋擾各局。一人倡亂。搖動全盟。去秋奴才巡閱伊盟各旗實由於此。迨奏請將該逆革拏後。竟敢狡馬思逞。大肆披猖。拒捕傷兵。勢成滋蔓。奴才鑑於去年川藏巴塘夷變及青海番族叛亂之案。不敢從事姑息。致令養癰。亦不敢遽施誅夷。稍鄰操切。於南坪未攻。以先遣使諭令投誠。至於十數。復寬以時日。令其親族往招。乃該逆怙惡不悛。甘心為亂。擁兵憑險。日益光橫。聞其由南坪逃走後。有遣人潛往西寧塔爾寺勾引匪黨之事。若非刻日捕除。後患何堪設想。

仰賴聖主威福。用能殲厥渠魁。未至釀成巨變。現在伊盟各旗亂蒙皆赦。自十二月後。不交地者。交地。不納租者。交租。各壑局均已照常辦事。懲前毖後。愈益驚心。奴才於辦理蒙壑。原擬不參一官。不戮一人。不意套匪之後。又有此案。但論阻壑之罪。豈無一綫可原。而其肇亂稱兵。則既背叛朝廷。亦實該旗亂臣賊子。罪愈犯而愈重。惡愈貫而愈盈。直使欲未滅曲從。竟難仁寬法外。履霜冰至。諸部望風。實迫於事機之萬不容已。逸匪們肯吉亞等及各犯。供出之匪黨賈愷。仍分行各處。飭屬一體嚴拏。務獲按法懲治。以絕根株。其暗中助亂各蒙。亦札飭該旗嚴加管束。除將錄取犯供咨送理藩院查照外。理合恭摺具陳。

案丹丕爾一案。為壑務參案中最着要之點。原參謂為誤

殺奏議所載。究為當日情事。抑或有所鋪張。是否誤殺。殊難言矣。故於本業備錄其詞。以俟後人之考核而論定焉。四月。文放伊盟各旗報墾旱地奏。竊照伊克昭盟七旗。自光緒二十九年以來。先後就議。其報墾各地。惟杭錦達拉特兩旗地接大河。處處依渠為命。凡渠水所及。土脈膏腴。俗稱水地。達有分取歲租之議。杭有改徵押荒之請。均經奏明辦理。在案。杭達之外。若烏審札薩克郡王。鄂托克。準格爾等五旗。雖地質肥饒。原難一致。而皆距水較遠。類屬旱田。情形與杭達不同。所有應徵押荒歲租。自應準之蒙情。權之民力。酌中定擬。方可利於推行。查烏審札薩克郡王三旗。前請將報墾地畝。照杭旗辦理。改永租為放墾。收徵押荒。發給領戶部照。收入版圖。復以二成歲租報効歸公。奴才核其情事。於國於

蒙均有裨益。當經奏請允行。並請頒發空白部照六千張。以憑轉發。係因該三旗押荒歲租未能預定。是以請將銀數空出。臨時酌填。現在該分局分行招墾。各就所辦蒙地。察度情形。將應徵押荒歲租。分別酌擬。稟由西盟墾務總局詳請核定。前來。奴才覆加察核。如烏審扎薩克郡王三旗地質較次。荒價未便多收。上地擬每畝收押荒銀三錢。中地二錢。下地一錢。除提經費外。一半歸公。一半歸蒙。以符原議。若鄂托克準格爾兩旗。雖前於報地之時。未經議定如何放墾。而改徵押荒。給領部照。既抗旗倡之於先。烏札郡旗繼之於後。該兩旗亦應一律辦理。惟常年租銀能否報効。不必強其從同。如以後該兩旗亦或樂輸。再行核辦。至其地則現均區作四等。鄂旗上地每畝擬收押荒銀四錢。中地三錢。中下地二錢。下

地一錢。準旗則地質差強。擬將上地收押荒銀六錢。中地四錢。中下地三錢。下地二錢。除經費外。仍照章以一半歸公。一半歸蒙。其歲租數目。詳為審量。亦須徵分差等。鄂托克準格爾兩旗。擬將上地每畝每年徵銀二分。中地一分六釐。中下地一分二釐。下地一分。烏審札薩克兩旗。地止三則。擬將上地照鄂準兩旗。中地核收。每畝每年徵銀一分六釐。中地仍徵銀一分二釐。下地仍徵銀一分。若郡王一旗。前據該旗呈請核減。擬以上地每畝每年徵銀一分四釐。中地一分。下地八釐。該旗土性瘠薄。即歲遇豐收。所獲亦遜於他處。不能不輕其賦額。俾寬民力。如此分別定擬。庶無礙於施行。惟納賦不妨稍寬。啟徵則不能過緩。蒙旗急於見利。若地歸官放。食租尚遲。以數年。何以遽償其願望。升科期限。擬即於文放給。

領之次年。無論各領戶曾否繳完荒價。屆期一律飭繳歲租。以杜取巧。而恤蒙情。每歲所收租銀內。除烏審、扎薩克、郡王三旗報効二成。應行提歸公用外。查二十八年二月間。奴才與升任山西撫臣岑春煊會奏西墾情形摺內。有按租輸捐之議。今擬不另加租捐。亦即於常年租銀內。提出二成。另款存儲。留供蒙地一切建置之用。餘均撥歸各旗將來所放各地。隸於何廳。歲租即由何廳徵收。查照奏定章程辦理。又附奏再。郡王旗所屬之王愛召。舊有香火地圍附。該召四面總計三十里。向係招集民蒙各戶分佃納租。藉供香火。於二十九年秋間。據該召胡畢拉漢喇嘛圖布登札拉桑以民蒙租種召地。任便交租。歲入無幾。無法清釐。呈請奴才飭由墾局代為放墾。以所得地價報効一半。作為經費。並請酌定地價。

租章。放墾後。由墾局代收租項等情。奴才查此次辦理西盟蒙墾。凡各旗所報地內。有大小召廟。均須酌留廟地。俾資養贍。茲王愛召喇嘛。以自有之地。呈請為之租放。並不需用墾局經費。自未便拒其所請。當飭西盟墾務局。放墾員事簡之時。派往勘辦。一面取具該召事官喇嘛人等遵辦文結。一面酌分地則。招戶認領。已於上年丈放完竣。計共丈放生熟淨地一千二百六十七頃一十二畝八分。內上地二百五十七頃二十二畝一分。每畝徵銀四錢。應徵地價銀一萬二百八十八兩八錢四分。中地三百九十九頃四十六畝七分。每畝徵銀二錢。應徵地價銀七千九百八十九兩三錢四分。下地六百一十頃四十四畝。每畝徵銀一錢。應徵地價銀六千一百四兩四錢。統計共應徵地價銀二萬四千三百八十二兩

五錢八分。此項地價銀兩陸續徵收。按照所收數目。以一半撥歸該召。以一半充作墾局經費。以符原議。其常年歲租。定以上地每畝每年徵銀二分。中地一分六釐。中下地一分二釐。下地一分。一律自今年起租。暫先由墾局就近徵收交付。如撤局後。再交由薩拉齊廳照章代徵。惟徵收不無耗費。即於所徵租銀內。每百兩提取一成。藉以津貼辦公。嗣復據該召喇嘛呈請。將應收歲租。每年報効歸公。二成撥歸郡王旗一成。所餘七成為該召供奉香火。及該召喇嘛度用之需。亦經奴才詳為核定。分行知照。並分別發給領租執照。俾每歲持以取租。無虞冒領。惟查此項放墾之地。係屬廟產。與各旗報地歸墾者不同。不能發給領戶部照。而各戶備價領地。本為世業。又豈可無執守之據。復由奴才另行刊印廟地執照。

飭交該局按戶填發。以昭信守。又附奏。再奴才前准總理練
兵處咨開。光緒三十一年十二月二十日。會同戶部具奏議
覆調任山西撫臣張曾敷續籌練兵經費一摺。於蒙墾渠租
一款。指供練餉。咨令查明。每年可收若干。作為練兵經費等
因。准此。當飭西盟墾務總局詳查去後。茲據該局詳稱。渠租
收數。以每年澆地多寡為斷。而澆地之多寡。則又視乎河水
之大小。必其地為渠水所及。始收渠租。其事本無定額。與升
科地畝歲徵常賦者不同。蓋歲租收數有定。渠租收數無定
也。套地濱臨黃河。雖曰沃野千里。然處處以渠為命。無渠不
甞。無地就現在而論。如將放與公司之杭錦旗地四千頃。全
數澆灌。計每畝應徵渠租銀四分五釐。每歲約收銀一萬七
八千兩。他若達拉特旗。議由官局開渠澆地。渠至何處。地即

開至何處。但承租不放。以每歲租銀所得。除提二成渠費外。七成歸公。三成歸旗。業於另摺陳明在案。查該旗得水可租之地。每歲在二千頃左右。每畝合渠租地租共徵銀二錢五分。上下以二千頃核計。除提二成。計應歸公銀二萬七千兩。內再動支經費一成。實應歸公銀二萬四千兩。此現在約收渠租之大概數目也。以後若能擴充辦理。循河之故道。以暢來源。順水之下游。以資消導。則水勢愈引而愈上。地亦愈澆而愈多。渠租之入。自可倍於今日。惟此項係議備渠工之用。暫難提撥等情。詳請核辦。前來。奴才伏查後套之地。除沙磧外。全屬膠泥。苟無河水灌溉。即等石田廢棄。是以奴才於上年七月間。奏請以押荒渠租所入。大治渠工。懇請飭部暫勿提用。以廣水利。業經奉旨俞允。良以地畝依渠為命。渠

道糜費甚多。必先資鉅款於前。乃獲大利於後。溯自開濬各渠以來。全賴公司招集股本。設法經營。始有此項渠租之入。然為數無幾。尚未能歸還股款。及各項官墾之款。而已濬之渠。時須修補。未成之渠。更待引伸。現正擴治渠工。公司已無他款可籌。又未便請撥庫款。惟有就渠地所入。留以治渠。若驟予提充。餉需數本涓微。既無濟於實用。勢成竭蹶。必難竟其前功。再四思維。不得不仍伸前請。合無仰懇恩慈。仍飭練兵處。戶部。暫勿提撥此項渠租。俟三五年後。渠利獲收。大效再行具報。聽候提用。實於渠工餉需。兩有裨益。

參案調查記。王愛召即廣智寺。其地界乎郡達兩旗之間。周

圍約三十里。蓋蒙旗王公施捨之香火地也。光緒二十九年

七月。該廟大喇嘛圖布登札拉桑第一次呈請。以寺地放墾。

經西盟局於是年九月。派委張克勤前往勘收丈放。即於是
年之十二月。一律丈放完竣。計共放地一千二百六十七頃
十二畝八分。共收押荒銀二萬六千八百四十六兩六錢九分。
蓋王愛召為西盟局之附屬。並未設有分局也。光緒三十二
年。該寺大喇嘛圖布登扎勒拉桑第二次呈請。以該寺西一半
地放墾。當由西盟總局派員勘放。嗣經勘得地質不佳。可放
者甚少。於三十三年四月間。由局具詳。委員前往丈放。然嗣
忽云開辦尚需時日。先行派員勘丈青苗。收取短租。仍未開
放也。

九月。烏盟各旗遵報墾地。分別驗收。奏竊奴才奉命督墾蒙
旗。如察哈爾左右兩翼。係屬連類。而及而最先注重之處。則
在伊克昭。烏蘭察布兩盟。故於籌辦之初。方議從烏盟之烏

拉特旗入手。詎該盟異常愚執。相與阻撓。不惟有異於察旗。並較頑於伊盟所屬。伊盟雖間有反覆。旋且就議。烏盟則始懷失地礙牧之疑。繼為深閉固拒之計。經奴才疊次調商。辨理。忱之以朝旨。重之以院文。不憚曲喻繁言。人文絡繹。積四五年之久。該盟仍狡抗如前。迄無一至。其間開示為難。延不遵辦。情形迭經奏達。聖聰不得已於上年覆奏。推廣蒙墾。摺內請旨飭下理藩院檄調該盟各旗輪替赴京。由院嚴切開示。冀可轉圜。然已智盡能索矣。幸仰賴查辦蒙古事宜肅親王公忠體國洞悉邊情。有馭制藩部之威權。為遐邇蒙人所畏服。當商請設法維持。經肅親王嚴檄該盟迅速遵行。曉以利害。旋經派委道員陸鍾岱來綏。守候札調。商定操縱之法。諸協機宜。一面由奴才加札飭遵。復派員前往就近開導。候

至數月。該盟無可藉延。始於本年七月初八日。出具六旗聯銜印文。派員來綏。就議分報墾地。查四子王旗所報察罕依格勒圖。達爾罕旗所報卓克蘇拉塔烏拉特前旗所報在圖爾格果勒之庫伯格阿爾班噶勒烏拉特中旗所報在博羅托伯均寬長十五里餘。烏拉特後旗所報在薩爾庫伯格茂明安旗所報在察罕庫圖勒均寬長十里餘。並聲請不受押荒歲租等情。現在已派委旗局各員會同蒙員分往勘驗。如均係堪種之地。其寬長里數亦與原報相符。即先收地歸墾。分別酌定墾則。另行奏明辦理。倘地不足數。或並不堪開放。仍嚴飭該旗另指地段。以符原議。至該盟所請不受押荒歲租等情。核其詞意。似因迫於屢次嚴札。姑以此地應付開墾。以圖塞責。是仍未曉然於此次詔開蒙墾裨益該旗所無。非

損奪該旗所有也。除仍切實曉譬。令遵初議辦法。俟放墾後。將所得押荒半給該旗。其歲租則全給該旗。以示利益外。伏念伊烏兩盟均隸綏遠將軍所轄。又為奴才此次墾權之所及。乃一則先迷後順。現已廣闢利源。一則自私自利。不復知有國計。緩之而生玩。急之則相持。奴才以蒙愚未化為憂。尤以朝命不行為懼。何期積年梗議。一旦輸誠。經奴才情感理喻。而開悟莫由者。今院臣一紙之催。遂翻然而効順。可見蒙雖愚獷。尚視典屬為轉移。合無再請飭由理藩院因勢利導。俾資推廣墾界之處。出自聖裁。又附奏再查殺虎口驛站地畝。前經奴才於上年冬間。奏請由官清墾。奉旨俞允。當於歸化城設立站地墾務總局。於伊克昭盟境內酌設分局。委員辦理。茲據該局稟稱。自開辦以來。清查招放。已有頭緒。私墾

則土默特界內為多地段。則河西各台較廣。現在民戶認墾者。日多一日。應請發給部照。以便填給俾資信守等情。前來。奴才查各台情勢不同。前經奏明。地近何旗。即照何旗現行墾章辦理。所有押荒歲租數目。未便預刊。合無仰懇敕部速行頒發空白執照六千張。到綏。由奴才轉發填給。應用。仍將截留照根彙齊咨部。以憑考查。至台界混淆民蒙侵佔。均應一律清查勘辦。並如何籌給站辦公及津貼官兵養贍之處。俟奴才詳加查核。籌議妥協。再行隨時奏聞。以上均光緒三十二年案二月。驗收烏盟墾地。設局開辦。奏竊烏蘭察布一盟。於開放蒙地之事。深閉固拒。百計遷延。經疊次嚴催。多方勸諭。積五年之久。始各於上年七月間。遣員就議。出具六旗聯銜印文。遵報墾地業經奴才將該盟報地情形。奏陳在案。查烏盟各

旗性多狡詐。奴才逆知其所報之地。必非佳壤。是以於委員
前往會勘時。飭其切實勘驗。如地不足數。或並不堪開放。就
近商令改報。以符原議。經分飭遵辦。去後。嗣據收地各員先
後稟報。所勘各地。惟四子王旗所報察罕依魯格勒圖地段。
尚堪耕種。統核地形。截長補短。亦尚足原報十五里之數。其
他各旗。或虛捏地名。或土性硯瘠。均與原議參差。又幾於中
變。幸經勘地各員相機因應。操縱得宜。商至再三。各旗始另
行指報。達爾罕旗改交西邊卓克蘇拉塔一帶。茂明安旗改
交小壕帳房塔兩處。均係該旗從前租給商民。已經限滿之
地。烏拉特前中兩旗。先則合交。改指達旗迤東之什拉胡魯
素地段。議明由南界向北。挨次丈量。以足兩旗所報三十里
之數為止。嗣以該處地畝原屬前旗所有。遂轉歸前旗呈交。

並添報紅門兔地一段。至烏拉特後旗則改交黃河西岸之紅洞灣。雖地質稍次。而距包鎮甚近。或尚不難招放。惟烏拉特中旗前報之地。既歸前旗專報。應札令該旗另行指地。俟交收有日。隨時奏報。其已經驗收五旗各地。均由派出之員會同蒙員。劃清四至界址。取有交地文約。並繪具圖說。呈請核辦。前來奴才查此次所收四子王達爾罕茂明安及烏拉特後旗地畝。均屬旱地。應照旱地章程辦理。若烏拉^特前旗所報之什拉胡魯素暨紅門兔兩處。則係五加河退水之地。昔年渠堰舊迹可尋。尤應及早興修。因端竟委奴才擬即委令調辦蒙墾之分省補用道李雲慶總理烏盟墾務。並揀派員司設局開辦。以擴利源。又萬億統館商李世俊李榮恩等。於光緒三十一年呈報。因債作抵之四子王旗忽濟爾圖地一

段請由官局放墾。前經奏報。現已派員勘驗。其地在四子王旗報地東北。土壤相接。每面約寬二十五里。內外又現據綏遠城舉人通泰以祖遺價買四子王旗地段。東西長十三里。餘南北寬約四里。亦與前項報地毗連。報効歸官。自應一併酌度情形。分別籌辦。

六月。巡視西盟渠地。敬陳大概情形。奏。此次循巡後套。注重看渠。誠以套地依渠為命。渠道之適用與否。所關匪細。在施工之始。既難相度之得宜。論經久之規。尤賴維持於不敝。奴才於查閱廣覺寺後。循山麓而西。馳入後套。套地東偏。即烏盟西公旗所報之什拉胡魯素等地。一望平衍。夙稱上腴。惟向專渠。僅恃五加河退水澆灌。又附依大山。恒有山水冲刷之患。無壩無渠。領戶裹足。雖沃壤猶石田也。奴才前經派員

勘估詳議。及時興修。籌防衝突之虞。暢疏引灌之利。現已壩
工就竣。渠道擇修。奴才復飭將上游各渠。劈寬加深。擴充來
源。期可承流普及。並一面飭由公司招戶認領。陸續文放。其
東公旗所報之紅洞灣地。係在黃河西岸。土質較次。亦一併
飭招墾戶。若中公旗轄境。本無沃土。疊經飭其指報。未即如
約。直至奴才由後套折回時。始據呈報。於該旗莫多噶魯泰
即黃河東西岸之熟地兩段。請於秋後指交。應俟勘收後。另
行辦理。此烏盟西公各旗地。現辦情形也。自西公報地迤西。
達地之招租。杭地之放墾。縱橫阡陌。脈注綺交。若老郭塔布
長濟等渠。達地藉以灌輸。若沙河爛大豐濟等渠。杭地用以
挹注。惟入夏以來。河水陡落。各渠減流。往往不敷應用。至五
月初間。始據各局報告水漲。渠道充盈。及此時澆灌青苗。或

尚有秋可望。未成之渠。亟待引伸。修復之渠。時有淤塞。奴才
週歷勘查。嚴定責成。查有不甚得力人員。立即撤換。免誤事
機。此杭達各旗渠地之現辦情形也。
綏遠奏議。十一月清查土默特地畝。詳陳辦法奏。竊查土默
特旗界內。民蒙雜居。地畝混淆。奴才貽穀到任以來。疊經全
旗參領公同印稟。籲請清釐。謹於光緒三十一年二月間。會
同前任歸化城副都統文瑞。奏請開辦。奉旨允准。在案。嗣因
其事繁難。滿漢官員意見不能融洽。無從着手。境內又復荒
早。姑從緩議。至去年十月間。始行設局。名曰清查土默特地
畝總局。由奴才等札派分省補用直隸知州王德榮充該局
總辦。督率員司分投查勘。務使民不失地。蒙不失租。收一地
二養之公益。無此疆彼界之互侵。庶幾民蒙各安其居。不相

紛擾。卽嗣後土田訟案。亦可憑所發印照立斷。以平其爭。近
已酌擬章程。逐漸暢辦。敬將大概情形。為我皇太后皇上縷
晰陳之。土默特地土。晉之北鄙也。境內分設歸化。薩拉齊。托
克托。和林。格爾。四廳。武川。清水。河。二廳。亦半屬土默特之地。
其間村落相望。人煙稠密。無異內地。推原其始。民人負耒出
疆。爰得我所蒙戶質田。得價以養其生。民有餘力。假蒙地以
畊之。蒙有餘地。假民力以芸之。公平交易。人情之常。固朝廷
禁令所不及。乃轉相租典。疊經分割。始則蒙與民私立約據。
繼則民與民私立約據。一地數約。一約數主。而蒙戶年久迷
失。既失其地。又失其租。雖經涉訟。官斷無從。如此則病在蒙。
百畝之田。五畝之宅。終歲勤劬。民生不易。而安分良民。地無
印契。奸民劣蒙。勾串加價。而覬覦之。要索贖地。而攘奪之。因

謹愿以傾家。恃狡黠為得計。實為風俗人情之大害。如此則
病在民。現值朝廷撫綏。綏藩屬。統西北蒙疆數千里。通飭調查
物產。繪具地圖。以固吾圉。直晉秦三邊。東則察哈爾。西則烏
伊兩盟。均經開墾。疆里井然。惟土默特橫互其中。勢如絲亂。
亂而欲其理。理之必自清查地畝始。惟地勢寬長。各四百餘
里。而各廳糧地。綏遠米地。台站地。公主府地。必須一一劃出。
其難一也。凡一蘇木內。而官民戶口地。官灘牧廠地。絕戶地。
各召廟地。必須一一分清。其難二也。清查必先勘丈。而地畝
零星。大半不成片段。丈地百塊。或僅頃餘。每繩一根。在東西
各墾。一日能丈十餘頃者。此則不過一二頃。其難三也。丈地
必先驗約。而新約舊約。鞦韆重重。細為辨其真贋。明其曲直。
每遇一案。動費周折。始得剖析清楚。各無異言。其難四也。用

人既多。經費所出。必取之於地。而民人畊種。均經蒙戶租典。或已得過壓租。或已得過典價。此次萬難多取。且水地旱地。肥瘠懸殊。勢非多分等則不能得其公平。其難五也。歲租所入。蒙古特為生計。既給民戶以執照。亦必給蒙戶以租據。使兩有憑證。以便按年取與。第其原租之數。多寡參差。相去或至百倍。不可以等則核定。俱待驗其白契。哀多益寡。斟酌註其數於印照印據之內。其難六也。此次開辦。先從歸化負郭之田入手。由近及遠。挨次清查。該旗共分六十佐。現已查訖。十有餘佐。凡地經民人租典。雖曾出過價值。尚非永業。此後蒙古永不贖地。應飭令民人補交地價。以作經費。戶口之地。酌提二成。發給蒙古原主。用示體恤。民人補交地價。共分八則。上則地每畝一兩六錢。上中地一兩二錢。上次地八錢。中

上地六錢。中地四錢。中次地三錢。下地二錢。下下地一錢。其
草灘牧地未經開墾歸公另放之地。仿此略加變通。俟民人
清繳後發給印照。永為該戶執業。至蒙古自種之地亦為清
丈發給印照。不取地價。不出歲租。以其為蒙人之原業也。均
經該局詳擬章程。稟請核辦。前來。奴才等覆查無異。轉飭遵
辦。以竟其功。蓋土默特定制在官無俸。在兵無餉。惟此土地
以為戶口之養贍。而又變價度日。典賣於民。積至今日常年
所入。僅有歲租。閤旗官兵數千戶。困苦顛連。其情可憫。此次
清查後。擬將官灘牧廠絕戶之租。由該旗戶司征收。作為該
旗公款。自參佐以次。分定津貼。以資辦公。官兵召廟戶口之
租。本係各人私產。仍以屬之本人。以昭公允。總之。清查主義
在化民蒙之爭。而使各利其利。庶與東之察哈爾左右翼西

之烏伊兩盟。結成一塊完土。政教之原。實基於此。參業調查記。土默特查地局。自光緒三十二年十月設局開辦。至三十四年四月停辦。統計丈放過戶口民佃官灘絕戶。召廟各地九千九百八十五頃六十一畝。應徵地價庫平銀二十二萬二千一百三十六兩。除未徵外。已徵銀二萬四千七十二兩五錢九分八釐。云。業民國二年十二月設局整理。即接續此案進行者也。

綏遠奏議。光緒三十三年八月議覆。綏遠建省大概辦法奏。於推廣墾務一項。略謂天下之利必歸農。聚民之計在闢地。歷觀列邦殖民政策。往往於荒涼寥闊之區。設法經營。不數年即成巨埠。雖曰地利使然。實亦人謀之能。見實行也。矧我邊衛所關藩部所屬。放牧之外。不乏可墾之地。若竟任其曠

廢割棄等諸閒田。不第於生殖之術有缺也。一思及西北塞防。遠或萬餘里。近亦數千里。向所恃者。蒙古屏衛。今蒙古已貧弱堪矣。一旦有事。根據毫無。而欲徵兵內地。馳出於空虛。無人之域。緩不濟急。進無所守。何以資接濟。何以壯聲援。此不可空言備防。不待著決矣。岑春煊左紹佐原奏。意皆注重開墾。奴才前次議覆程德全開通蒙部摺內。亦曾將推廣蒙墾關係情形。詳細奏陳。誠以開地乃可實蒙。實蒙乃能備邊。今將議建省治。尤當急所先務。查奴才督辦蒙墾以來。東之察哈爾。左右兩翼。漸次清釐。西之伊克昭。烏蘭察布兩盟。分投暢辦。他如綏遠城牧廠之興屯。殺虎口驛站之報開。喇嘛士商之輸納。已產因不收為墾地。極意擴充。然近惟河套數百里間。渠利暢興。田廬相望。有成邑成落之象。河西則準格。

爾郡王札薩克等旗。站地則頭二、三、四台等處。放墾將竣。若
鄂托克旗地遠而瘠。烏審盟長始順繼抗。至今猶未推行。盡
利者一。囿於墾界之有定。一滯於荒價之必收。蒙地雖廣。必
待其報墾而後開。即如烏盟六旗。延抗至五年之久。始肯就
議。而所報僅西公較多。餘則段落零星。歸墾放者無幾。近蒙
如此。遠者可知。此墾界囿之也。小民舉知本計。苟樂土可適。
得地不啻得財。即令繳價公家。度亦欣願。所難者荒寒之地。
邊遠之區。畊作相同。而收穫獨薄。人本裹足不前。而又以成
例之拘。不能不微取其值。無怪招致之難也。此荒價滯之也。
奴才考察情形。非及今設法變通。不足以謀拓植。應請旨飭
下理藩部。通行西北蒙旗。切實曉譬。俾知朝廷德意在保其
土地。不利其賦租。貧弱之餘。萬難仍安故步。有以破其愚而

生悟。如綏遠舊屬之伊烏兩盟前已報地。應令其續行指報。
如阿拉善旗白並不屬綏遠。應令其認為綏遠所屬。仍飭照
伊烏兩盟指地報墾。以資展拓。如此庶可恢張墾界。若招墾
變通之法。重在開地。不重押荒。岑春煊條擬酌獎之議。切中
事情。設治後宜仿行其意。並應查取上年戶部議准升任廣
西巡撫林紹年奏辦廣西開墾章程。就綏遠邊地情勢。斟酌
所宜。實力推廣。除原有墾局外。一併以地方官為墾員。不論
舊廳新廳。凡所管有應墾地畝。責其設法招墾。嚴定考成。庶
可廣收墾效。以上均光緒三十三年業

以上西墾奏業

附東墾奏案

墾務奏議。光緒二十八年二月二十八日馳抵山西省城。當
與撫臣岑春煊查照原奏事理。悉心籌議。俟將大概辦法另
摺會陳後。即須北赴綏遠城。會同將軍信恪詳加體察。隨時
奏明辦理。其豐鎮、寧遠墾務。應俟西盟開辦後。再赴察哈爾。
會同都統奎順妥商辦法。次第舉行。現在開辦伊始。應行刊
用木質關防。以昭信守。茲經刊就。文曰欽命督辦蒙旗墾務
大臣關防。於三月二十八日敬謹開用。

六月。籌擬察哈爾右翼四旗墾務辦法奏。五月十三日馳抵
張家口。遵即與奴才奎順悉心籌議。查該四旗蒙地。昆連豐
鎮、寧遠兩廳。自光緒八年經前任山西撫臣勘辦押荒升科。
於十一年奏結後。二十五年復行續辦。迄今又三四年。現據
豐寧押荒局呈報。文清報墾地畝僅三千餘頃。幾疑在事各

員承辦不力所致。即週歷地界。參以聞見。考之卷宗。始知向來辦理為難情形。大抵由於窒礙之多端。事權之不一。今欲擴充辦法。亟應相時度勢。量為變通。敬為我皇太后。皇上縷晰陳之。一曰清舊墾。近年蒙古生計久不在牧而在租。或抵價而指段於人。或圖利而私放肥己。或一地而數主。此租彼逐。或一地而數租。忽予忽奪。而奸商知其可以利餌也。遂得乘間插入。肆行其包攬侵漁之計。往往承領之地。未經與該旗議定。即行立契出賣。而佃戶愛地如金。便爾出價承買。以致有得契並未得地者。有契內數多而得地反少者。又有契係此地而混予彼地者。抑且有牛羊各羣之牽混。王公馬廠之交錯。教民教產之動成訟案。無窮膠轕。禁如亂絲。此次若不速行清理。日復一日。枝節愈多。擬即揀委妥員。會同該總

管參佐等官同赴地所核實勘辦其要尤在查其約證之虛實出價之多寡與畊種之後先公同理斷儻有抗拒不服仍前爭執者即嚴懲以儆效尤此籌辦變通舊壑之辦法也一日招新壑查從前各地商向係私賄蒙旗約領地段往往招佃壑熟多年不報即報矣而官局尚須移會廳官據以咨旗訂期會勘而蒙旗又任意耽延苟愆~~愆~~壑之未盈即指交之無日且旗廳局員中一有不到事即中格曠日持久難竟其功職是之由今擬力祛前弊仿照上屆辦理王公馬廠章程將地歸官勘辦一面札飭各該旗總管等報明共有蘇木若干分繪詳圖註明縱橫里數及已壑未壑大致數目一面派員查勘酌留隨缺及公共牧廠外餘均一律交出開放該旗不得過問並揀調各旗參佐一二員常川來局當差俾可隨時

差遣庶操縱在我。不至諸多牽制。此籌擬變通新墾之辦法也。一曰恤蒙艱蒙旗之窮日甚俸餉有限牧產無多近將各~~地~~私行租放。久以視為利藪。一旦舉以歸公。若不預為之計。有坐困窘鄉而已。查晉省墾地舊章。以三百六十弓為一畝。每畝應交押荒銀二錢。其升科正項。無論王公馬廠及官荒空閒地。每畝均徵銀一分四釐。遇閏每兩加銀三分。每正銀一兩隨徵耗銀五分。王公馬廠每畝隨徵私租銀四釐。由該地主向官領取。至官荒空閒地。每畝亦加徵歸公私租銀四釐。以充口外七廳捕盜營弁兵經費。如遇災年。核實勘定分數。將官私各租一律豁緩。此向來辦法。今應仍因其舊。惟查此次既將各旗地由官辦理。是該旗地去而無所得。難免不生缺望。以後新放地畝。擬於每畝押荒二錢外。加收辦公銀

一銀錢。以六分作官局經費。四分作該旗協同辦墾公費。以示體恤。如慮領戶以加辦公銀或不樂輸。不知戶部原定押荒章程。本分三則。上則每畝交銀三錢。中則二錢五分。下則二錢。以右翼地論。不難照上則押荒辦理。而從前照收每畝二錢者。以地係民戶私行承領。已出重貲。不便再行多取。若此後由官放墾。一切私費。概予捐除。惟每畝加收辦公銀一錢。核之從前私相授受。所省已多。必不因此一錢公費之故。裹足不前。是無庸過慮者也。至各旗常年養贍。則又擬請恩准酌予官弁兵丁隨缺地畝。及公共牧廠種佃牧放。均可自由。豈尚不足資生。時不准將劃留之地。再行私售。如仍前習。從重治罪。此籌擬無礙。正供有濟。蒙困之變通辦法也。一曰定期。查向章交納押荒後。試種三年。始行升科。本指未墾荒

地而言。而現在各旗地有私墾業。經有年。仍復取巧不報。以
緩交押荒。並可藉延升科。似此安心欺隱。大於國計有妨。擬
即先行派員分赴各地。所勘明未經清丈熟地若干。隨時呈
報。一面另委員司挨次勘丈。文清後。從限三月內交納押荒銀
兩。逾限不交。立將原地追繳另放。如其中實有牽混他故。未
經清結者。應令另行辦理。至升科則分別已墾未墾。其已經
墾熟之地。於收繳押荒之次年。即行升科。一律完納官私租
銀。未經墾熟之地。則統歸試墾。照章三年後升科。如此辦理。
庶使條目分明。此籌擬嚴防弊混。而又易於遵循之變通辦
法也。一曰籌經費。查豐寧押荒局。未有經費專款。一切薪工
局用等項。統由所收押荒銀內作正開銷。約計每歲動用正
款十分之一。然彼時印委各員會旗勘界時。向由地商支應。

所費不貲。故地商遂敢藉端詐騙。今則地歸官辦。其緊要關
鍵。尤在絲毫。不擾及地戶。方足以感動愚蒙。而懾服刁健。此
後事務日繁。用人日衆。所有員司書役人等薪水工食及車
馬川資等費。需款甚鉅。若仍開支押荒銀兩。恐事竣而款亦
無多。於國計何補。此項經費。前條擬於加收每畝之辦公銀
一錢內。以六分留充局用者。正期不動正款。又可藉資應用。
至徵解常年升科糧銀。應需傾鎔火耗解費。查光緒十五年
直隸續墾張獨多三廳官荒地。獨石多倫兩廳。每畝准予
加收銀二釐八毫。均係為傾鎔火耗解費之用。此次擬照獨
多兩廳舊章。每畝加收銀二釐一毫。不准額外稍有需索。以
示限制。而杜流弊。此籌擬變通經費之辦法也。一曰預儲備
各地現。即逐漸開放。將來民戶衆多。不能不添設官汛。以資

治理一切善後事宜。在在需款。與其有事而始籌挹注。有臨渴掘井之慮。何如及時而預為存儲。無待米為炊之慮。查各旗捕盜營。有從前墾地所徵四釐租銀。足敷發放。無庸再行撥款。以後所收官荒空間地。四釐私租一項。擬即另款收存。專備新開地方善後經費之需。惟地屬公家。款歸公用。似不得有私租名目。擬改為四釐另租。除王公地如有續行報効。其私租仍舊撥給外。所有官荒空間地。每歲共收另租若干。於年季奏咨一次。以備考查。此籌擬變通儲備之辦法也。奴才等尤有進者。向來承辦蒙地之人。名曰地商。曰戶總。其辦事地方曰地局。罔不養打手。置軍械。弱肉強食。動輒爭鬪。近日口外散勇游匪。均以此為逋逃之藪。往往有焚燬房屋。殺傷人命。重情種種強暴。縱不咎其既往。不可不做其將來。擬

即嚴行諭示。去其地商戶總名目。其從前地商戶總有經手
未報之地。無論已墾未墾。均飭遵照現辦章程。即行交納押
荒。以憑分別升科。不准任意延抗。亦不准再有恃強越佔及
互相械鬪情事。儻或不遵。查辦定予重懲。是顯以戢現在爭
端。即隱以弭無窮後患也。又附奏再王公馬廠與察哈爾各
旗地界。毘連交錯。牽混最多。辨認不易。蒙古山名地名重複
隱奧。繙譯粹難明晰。又往往東西易位。壕塹無憑。度其地在
恩賞之初。不過括指地段。本無里數可稽。久之各便私圖。遂
至任意開拓。漫無限制。查豐寧現辦押荒升科各事。不難於
清丈。而難於指界。種種鞫鞫。勢如亂絲。直令分無可分。查不
能查。今欲廓清前弊。計惟有仍令該王公將廠地一律報効。
開墾。由奴才等查照上屆辦過成案。每畝完官租銀一分四

釐。另加該王公私租銀四釐。官為辦理。則界址向多不清者。至此遂可漸為勘定。蓋地由官局丈放。該王公即不得以尺寸自私。當不復有爭執之事。即使稍有溢佔。不過歲多幾分。私租尚與公家正課無礙。此無須苛求者也。惟一再報墾。該王公未必不以礙牧為詞。不知時殊勢異。法宜變通。即如奉天之東西圍場。大凌河牧廠。根本重地。均已弛禁開放。矧王公馬廠久已有地無牧。且名為禁墾。實則私開。與其啟蒙漢民教之爭。何如及早勘辦。上以裕國家正供之入。而不復棄置閒田。下以竭藩服效順之忱。而仍可藉資生計。於公於私。兩有神益。如蒙恩准施行。擬請俟查明兩翼旗內。究有王公牧廠若干處。即由奴才等恭錄諭旨。行知該王公等遵照辦理。除馬廠應留牧地詳定里數外。餘均准其一律報効開墾。

以興地利。該王公世受國恩。當必樂於從事。其間或別有窒礙。不願報効之處。亦應准將實在情形。即行陳明。聽候朝廷飭查遵辦。於核實之中。仍寓恤藩之意。

八月。設立墾務公司。奏其東路墾務公司。查有前由奴才會同岑春煊。奏調之分省試用道曹受培。為守兼優。素講信義。自調委以來。派充各差。均能綜理精密。措置裕如。且籍隸粵東。于官商籌款情形。尤稱熟悉。又刑部候補主事宋乃鵬。分省補用通判左樹珍。分省補用通判李年慶。該員等才具開展。在通商口岸有年。素為商情所信服。均擬調赴晉邊。委令與曹受培會同承辦。如蒙俞允。再由奴才參訪各省鑛務。鐵路公司集股章程。悉心妥議。再中書曹中成。主事姚世儀。宋乃鵬。係京職候補人員。可否援照前次。奴才調委差遣成案。

免扣資俸。出自逾格鴻慈。再豐寧墾務業已開辦。合併聲明。
又附奏。再察哈爾左右兩翼旗地。既經先後奉旨。一律開墾。
自應首先勘明界址。以便分別辦理。查從前所開各地。以該
旗左翼與直隸相近。由張多獨三廳升科。右翼與山西相近。
由豐寧二廳升科。本有一定不易之勢。惟間有正黃旗牛羊
羣地。毘連交錯。以致報墾各地。戶直民願地歸直。晉民願地
歸晉。任意爭執。迄未劃清。而惡棍土豪。遂趁此界務未定。得
以逍遙化外。恃強霸佔。械鬪相尋。小則纏訟不休。大則動釀
命案。兼以旗羣地方等官。或拘執一偏。或模稜兩可。甚且藉
指界收界之事。為自私自利之圖。因遷就而混淆。因混淆而
紛擾。奴才以界址一日不定。輾輳一日不清。一切清墾丈量。
無從措手。是以前在張家口時。曾經會同察哈爾都統奎順。

分飭旗羣局廳暨添派督同勘界各員等前往公同履勘詳
查以前直晉舊分界址持平劃定並曉諭該處民佃如私墾
未報及已墾未丈與未交押荒各地無論分在直晉仍准地
歸原認俾無失業乃該各員等業已會勘定地迄未劃分據
稱係地痞惡商從中撓阻並有不肖吏役暗為煽惑查察哈
爾旗地原非直境亦非晉疆祇以開墾多係漢民理訟微糧
固不能無所附隸然既查係適中之地直晉平分上於國課
無妨下亦於民生無礙歸直歸晉何難即定今乃梗議於一
二地商其平日恣橫情形已可概見除再剴切曉示仍令聽
候前委各員勘辦外儻有不法之徒始終狡抗或造言煽動
定行從嚴究治設旗羣局廳各員有敢意為左右希便私圖
者亦即查明據實參辦奴才仍一面馳往該處督飭彈壓並

咨約奎順會同覆勘。以期妥速辦理。奴才擬于八月卅日由歸
化起程。前赴豐鎮廳東北劃界地所。理合附片陳明。
九月會同勘定直晉界址。奏。八月二十八日馳抵正黃旗之
白塔山。奴才奎順亦於九月初九日繼至界所。現在已會同
詳細履勘。查該員等擬分直晉界址處所。由古勒班諾爾東
邊南自洪明牧廠北界起。向北取直綫平分。至羊羣盡處與
五台接界止。計長三十二里有奇。東歸直隸。西歸山西。由此
劃分寶屬。至當不易。質之附界左右各地。亦均無異詞。無
復阻撓。自應照擬辦理。除飭催覓民夫。依綫刨挖壕塹。並立
石繪圖。分咨備用。俾資封守外。仍曉諭該處民佃。如有墾熟
未報各地。無論分直分晉。均准原戶認種。聽候分別清丈。押
荒。永為世業。復即揀委各員。一面就近清理訟爭。查拏豪霸。

一面將舊墾地畝。挨次丈量。以期積弊廓清。推行盡利。十月調辦墾務各員奏。晉邊開墾。從前屢議屢格。迄未果行。奴才此次復奉命督墾事。同創舉。兼以邊塞之地。天氣嚴寒。風物迥殊。人情亦異。久居內地者。往往聞風生畏。觀望徘徊。晉省得力人員。或擬咨調。而先有要差。或甫到差。而旋經調省。其派辦墾務之員。不過就近差委。人數本屬寥寥。是以開辦之初。必須借才異地。然前調各員中。現在到差得力之員。僅止十數人者。分布於東馳西突之途。往來於朔吹驚沙之地。辛苦墊隘。靡敢定居。數月以來。奴才在察哈爾豐鎮寧遠等處地方。往返數次。親見該員等晝司勘丈。夜理文書。受地者紛來爭田。者待判。加以蒙旗興墾。動與交涉相關。操縱之間。尤資心力。奴才方覺地遠差苦。無以獎其勞。惟恃慰勉交。

施冀生感奮該員等迫於公義許以馳驅有不賞而勸之心。無行役懷歸之歎特以服官從政積有歲時舍易就難事非得已若遽停其選補格於向章誰肯棄已往之資勞徒從事於荒寒之域况兩盟十三旗及察哈爾兩翼八旗東西相望不啻三千餘里事方經始在在需人使人皆愛惜前資紛紛求去則已來者尚退然思返未來者更裹足不前墾務觀成期於何日在部臣職司銓補申明舊例自當事者之不得不然即奴才在部辦事亦必不稍假借但各員從公朔漠不避艱辛與尋常辦理局務有間即就墾務而論亦與內省尋常辦墾者不同查從前各疆臣使臣調員差遣部臣亦有引案聲明者一經據實瀝陳無不重邀慈允今調辦邊墾各員事同一律其勞苦更有過之合無仰懇天恩俯念墾務之重用

人之難。仍將前調各員及續調辦理公司人員一併免扣資

俸。出自鴻慈逾格。二十八年光緒

五月王公馬廠地報墾情形奏當經分飭墾務委員會同各

旗羣總管等詳查兩翼所屬旗地究有王公馬廠若干坐落

何處及已未開墾情形飭速查覆去後旋據查明左翼所屬

有王公馬廠十五處右翼所屬有王公馬廠十處呈請核辦

正恭錄諭旨分行該王公等欽遵辦理間准軍機大臣字寄

光緒二十八年十二月二十二日奉上諭理藩院奏喀爾喀

親王那彥圖呈請賞還牧地招佃墾種據情代奏一摺已降

旨依議矣此項牧地雍正年間賞給該親王之祖策凌用酌

勞勩與別項牧場不同著貽穀查明該親王牧地令其自行

招佃墾種以恤蒙艱他處不得援以為例將此諭令知之欽

此仰見聖朝篤念舊勲。曲予體恤。至意除派員劃清該親王馬廠界址。令其自行招佃墾種外。伏查各王公馬廠。自近年以來。久以有地無牧。名為禁墾。實則私開。往往啟豪滑之爭。端便牧丁之中飽。否則視如棄地。不復稍事經營。坐失利源。均為可惜。奴才奏請恩准一律報墾者。亦以一歸官辦。為公家添一分正賦。即為各藩添一分私租。非僅藉以清釐鞅轡已也。惟臣下報効之忱。朝廷嘉之。初未嘗迫之。奴才方恐各王公之稍有觀望。乃諭旨一下。固已爭先効順。查有禮親王世鐸。鄭親王樂泰。克勤郡王崧煊。輔國公載卓等。或備文知會。或派人前來。均願即將該各廠地。一律報明墾放。聽候辦理。似此感恩圖報。不敢以尺土自私。且化私為公。首先應命。洵足資倡率。而利推行。奴才遵即分飭兩翼墾務局。查照原

擬章程。仍詳定應留牧地外。其餘均與各旗蒙地一律陸續開放。以擴利源。又附奏再察哈爾右翼四旗地畝。分隸豐鎮、寧遠兩廳。上年奴才推廣開墾。僅先於豐鎮設立分局一處。名曰豐寧墾務局。係將該四旗墾務合併興辦。嗣因寧遠所屬之鑲紅、鑲藍兩旗距豐較遠。兼顧難周。遂另立寧遠墾務分局。以期同時並舉。兩無貽悞。惟豐寧墾務既經分行辦理。自應因實定名。在豐者為豐鎮墾務局。在寧者為寧遠墾務局。而仍統其事於墾務總局。

八月。右翼墾務成效過半。謹陳前後辦法。奏伏查右翼蒙地分隸豐鎮、寧遠兩廳。蒙員地商私相授受。歷有年所。自光緒八年。經前山西撫臣勘辦押荒升科。十一年奏結。二十五年復行續辦。截至奴才接辦之日。據豐寧押荒局呈稱。兩次墾

地共三千餘頃。奴才到壑後，詳加考察，已壑而未報者，固不止此數。已報而未經官文放者，尚未及半。是以於任事之初，即將押荒舊局改為豐寧壑務局。所有收項款目及剩存部照一併截清，遴派委員於上年五月初一日開局接收。奏明後，即按照現擬辦法，將查勘荒熟，招報私壑，催收押荒各事宜分定章程，及時開辦。該處地畝半已私開，就局外觀之，化私為公，似甚易於措手。一經身親其境，乃知清理舊壑有較之招闢新荒其難倍蓰者。各旗蒙地向分蘇木，蘇木中之大小蒙員率皆貧窘，漢民之來口外者，挾資以餌之，詭謀以誘之。蒙員牟利之工，視漢民不逮，而其行詐之術，又惟漢民是師。往往一地而先後私放數人或數人，而先後同放一地，甚且含混指界文約無憑，愈後則偽據愈工，愈久則轉轄愈結。

從前押荒之不能暢收。幾疑催徵不力使然。不知纏訟未清。則舍稽事而相忿爭。荒價何由而出。自奴才到壑以來。豐寧兩廳之爭地呈訴者不下數百起。奴才隨時批飭局員從速訊結。又因在局斷結之案。勘丈時每有翻異。復飭該局會辦幫辦帶同承審繩丈各員分段親往地所。傳集兩造隨到隨訊。隨結隨丈。計為時數月。該委員等寬嚴互用心力交施。始將積年控訴互爭各案斷結十之七八。地畝亦即挨次丈清。其生荒地段仍按每號五頃。每畝三百六十弓。分丈編號綜計豐鎮寧遠兩處。丈明地畝共二萬四千餘頃。除應留官兵隨缺地牧地由奴才會同都統查核劃撥另行具奏外。共放過報墾未交押荒生熟各地一萬四千餘頃。未經放墾荒地一萬餘頃。現已分別招民領種。應留缺牧各地即在未放生

荒地內劃撥其已放各地按奏定新章每畝三錢核計應收
荒價銀四十二萬餘兩又應代徵從前辦結地押荒銀九萬
八千餘兩惟查豐寧兩廳之間有地名灰騰梁跨連三旗縱
橫百餘里泉多山峻六月猶寒非獨播種難施樵牧亦多不
至此外亦尚有地質硠薄不堪耕種者應仍留作公共牧地
上年定章出示後奉限九月初一日起至十月底止催令呈
報私墾聽候勘丈分限飭交押荒惟訟案既未全清私墾亦
難全報又值上年口外風旱歉收民情異常困苦不得不稍
示體恤展限催交計自二十八年九月起截至本年六月止
共收過銀十五萬餘兩該民戶等押荒交清即隨時填給部
照收執今年兩澤尚屬應時但使秋後不值風災歲收可卜
中稔交納荒價自當較前踴躍約計今冬明春可一律放竣

荒價亦可陸續徵收。此右翼墾務成效過半之實在情形也。又附奏再察哈爾兩翼各地現已漸收成效。惟前撤奸商崔維賢竊佔之白塔山老虎山一帶地段糾繞至今未能丈量。查該商籍隸山東。久在直隸盤踞竊佔晉直之地。廣輪百十餘里。其平日慣行賄賂得借官勢招養打手欺壓良民專以強霸侵奪為事業。經被控多案。奴才彼時即飭廳局提訊。如其悔罪自新仍為網開一面。嗣因該商屢傳不到不能以一累百。當將其私佔之地撤歸公司領放。仍通行嚴緝在案。詎該商前雖逃匿近復內外賄通出沒於京城張家口之間。非徒法外逍遙仍復暗中把持地雖被撤猶在地所聚集兇徒持械擾阻不許他人承領役不能捕兵臨則散去仍聚之。近以所撤前佔之地逢人盡許分肥。廣求兇助詭計陰謀無所

不至。直使官局文放難施。必欲仍復其地而後已。查上年八月間。曾經奴才奏明。如有不法之徒。始終違抗。即行嚴拏懲辦。今地商崔維賢竊佔地至一百餘里。始則抗傳不到。復於畏罪潛逃之餘。造言煽動。百計阻撓。實屬怙惡玩法。未便姑容。左右翼之惡劣地商。以崔維賢為最著。若任其倖逃。法網恐奸商從而效尤。朝廷重墾。豈能任一二宵小擾動大局。相應請旨。飭下步軍統領衙門。順天府五城暨直隸總督。山東巡撫一體嚴拏。務獲懲辦。該商前曾因業涉訟。自稱捐有監生同知職銜。請飭部查明。一併斥革。以示儆戒。

八月擬留各旗官兵隨缺地及公共游牧地。會同察哈爾都統奏查察哈爾蒙地附近直晉邊廳各旗私放得租久已計不在收。特蒙情雖變。蒙俗不殊。為牧之求。固宜早為之所。收

地一項擬每整蘇木酌留十二頃半蘇木及半中之半蘇木。減撥一半計每蘇木六頃惟牧地與墾種之地不同不必區別肥瘠亦不必拘定一處但水草相宜或與蒙營相近截長補短儘可照擬撥給如本蘇木地已墾盡或不敷撥給之數即於左右附近各蘇木另行劃補以免向隅如此撥留足數收放並擬俟兩翼地畝丈竣時餘有苦寒澆确不堪耕種之區在何旗界內擬即留給何旗此酌留公共牧地之辦法也其隨缺地一項查察哈爾官兵等俸餉無多日艱一日此後地歸官辦無復自私自利之謀若不恤其身家寬為籌計將使資生無術難免缺望之生擬仿照吉林烏魯木齊奏撥缺地成案酌量稍加總管每員給地八百畝正參領每員給地六百畝副參領每員給地五百畝整蘇木之佐領每員給地

四百畝。半蘇木及半中之半蘇木。其佐領每員均給地三百畝。滿蒙理刑官每員給地二百五十畝。總管下及整蘇木之前鋒校、護軍校每員給地二百五十畝。筆帖式及額設捕盜官每員給地二百五十畝。半蘇木及半中之半蘇木。其前鋒校、護軍校每員給地二百畝。筆帖式及額設捕盜官每員給地一百五十畝。至各蘇木額設兵丁有大小錢糧之別。今撥留缺地亦應分別辦理。馬兵每名撥給地百畝。步兵每名撥給地六十畝。各捕盜兵如係額設每名亦給地六十畝。此酌留缺地之數。若撥留辦法一須統劑其平。一須預防其弊。各蘇木官兵缺地應各由本蘇木劃留。惟內有地已私放淨盡。無地可撥者。若據由他蘇木撥補。是有餘地之蘇木。反因撥地於人。致官局少放地若干。即該佐亦少得若干。四分經費。

之利。而無地者既早獲盜賣之價。又同得養贍之田。等量齊觀。殊非公允。不得不量予裁減。微示之罰。此項無地可撥之蘇木。擬照現定應得各項缺地數目。減半撥補。並須俟有地之蘇木。先將本佐官兵缺牧撥留完竣。再以餘地分撥。免致喧賓奪主之嫌。如備撥之地仍有不敷。則擬由升科之四釐另租項下。以租抵補。每畝撥租若干。照正賦一分四釐核計。若地雖未放盡。而所剩之地不足現定缺地之數。尚缺若干。亦於另租項下折半抵補。如尚缺十頃。補以五頃之租。餘可類推。於薄罰之中。仍寓體恤之意。此酌劑其平之辦法也。蒙人唯利是圖。罔知後顧。此次所撥各項缺地。係為該官兵等永資養贍。將來生計。全恃乎此。若不預為之防。難保該官兵等不仍前私賣。擬自撥定之後。由奴才奎順衙門查照立案。

並飭由該各旗將撥留數目詳造細冊送由奴才貽穀鈴蓋
闕防發存各旗遇有官員遷調將此項缺地算入交代不得
稍有含混至缺地撥給官兵或自行畊種或招佃分收悉聽
其便惟不准私行變賣無論是官是兵如有營私盜賣盜典
及假託承租不賣之賣致令地非其有一經奴才奎順衙門
查出或別經發覺官則參處兵則革除其私買之人亦與私
賣者一併懲辦仍追奪原地歸旗如此嚴立防閑庶可使永
遠遵守此預防其弊之辦法也以上牧地缺地無非惠恤蒙
旗應請恩准免其押荒升科以廣皇仁而紓蒙困又附奏再
察哈爾各旗之地比年來經該官兵等互相串賣各便身圖
有將全佐私放淨盡幾無尺土者再尋數年蒙衆托足無所
矣幸及今時歸官勘辦為之清舊墾理新墾鞅鞅一清復蒙

皇恩優渥。准予酌留各項缺牧地畝。奴才等此次擬撥辦法。係經體察情形。為各旗寬籌生計。如果該各官兵恪遵法令。永遠奉行。以後牧放有資。養贍不缺。何莫非百年樂利之貽。惟蒙情嗜利。每徂於售地得財之故。智希冀頓生。今雖明定章程。難保不為無厭之求。妄行爭執。除曉示各旗官兵聽候辦理外。俟前摺奉旨先行。即便派員分行勘撥。並責成總管參佐等官。會同切實遵辦。倘有不肖官兵。從中狡抗。或該管官有主使蒙衆滋鬧情事。一經查明。擬即從嚴參懲。以儆效尤。而維蒙計。

案右翼四旗隨缺地。光緒二十九年八月奏准劃留後。定章綦嚴。不准轉鬻於人。近年各旗官兵。以俸餉不繼。為維持生計。大都陸續變價。惟正黃旗較為富足。隨缺地出賣。

紅

蘇

第二蘇木 七十七頃

無

第三蘇木 七十七頃

三十八頃

第四蘇木 七十七頃

三十八頃

第五蘇木 七十七頃

三十八頃

第六蘇木 七十七頃

三十七頃

第七蘇木 七十七頃

三十七頃

第八蘇木 七十七頃

三十八頃

第九蘇木 七十七頃

三十七頃

第十蘇木 七十七頃

三十七頃

第十一蘇木 七十七頃

三十七頃

第十二蘇木 七十七頃

三十八頃

第十三蘇木 三十八頃半

一十九頃

毫沁蘇木 二千零一頃

五百五十五頃

合計 一百九十六頃

一百四十六頃半

衙署 三千零一頃半

一千零一頃半

蘇木 三千零一頃半

一千零一頃半

各蘇木編制相同。每蘇木應領隨缺地。計伍領五頃。驍騎校二頃半。護軍校二頃半。大糧兵二頃。小糧兵五平畝。蘇木收廠地十二頃。惟每蘇木設大小糧兵七十名。或七十三名不等。故每蘇木即以七十七頃為標準數也。

明說總

旗

計

目

十一月。墾地押荒銀兩併案解部。查此項右翼地畝荒價。截至本年六月收銀十五萬餘兩。除經費外。計押荒銀十萬。

兩零。而山西添設口外廳治。經升任撫臣趙爾巽奏。指動用
此款為辦公需用。當由奴才前後分撥新添之五原、武川、陶
林、興和等四廳。共銀一萬二千八百兩。又因興修達拉特旗
渠工。撥用銀二萬餘兩。現實存右翼押荒不及七萬。遵由右
翼墾務押荒儘數提銀七萬兩。由左翼墾務押荒儘數提銀
三萬兩。共庫平銀十萬兩。於十月二十九日發交號商存義
公。合盛元、大德通等匪兇至京。限十一月內前赴戶部投納
應用。以後續征押荒。本應仍行悉數解部。惟晉省設官伊始。
一切修署、建獄、興辦警察保甲。在在均不可緩。需費綦殷。業
經趙爾巽奏明。由豐寧押荒項下動支。借資挹注。口外地方
重要。不能不並顧兼籌。擬於右翼押荒所入。截留四成。撥充
晉省新廳經費。

十二月。豐寧墾地升科案奏。據豐鎮墾務局詳稱。該局自光緒二十八年五月初一日開辦起。所有接收前局移交已繳押荒各戶。及該局截至二十九年閏五月止。續收舊款押荒各戶。凡係早經墾熟之地。例應於二十九年一並升科。造具民產地畝花名數目清冊。詳請查核等情。查豐鎮局收過押荒熟地。應歸入本年升科起徵者。共計二千九百八十九頃七十畝。每畝應徵正課銀一分四釐。共銀四千一百八十五兩五錢八分。每正銀一兩。隨徵耗銀五分。共銀二百零九兩二錢七分九釐。遇閏。每正銀一兩。加徵銀三分。共銀一百二十五兩五錢六分七釐。四毫。每兩隨徵耗銀五分。共銀六兩二錢七分八釐。三毫七絲。又每畝加徵另租銀四釐。共銀一千一百九十五兩八錢八分。照例不加閏耗。以上應徵各項

銀兩均經交由豐鎮廳自二十九年
起照章徵收。又據寧遠
墾務局詳稱。該局自光緒二十
八年五月初一日起。截至年
底止。所有早經墾熟之地。均已
繳納押荒。亦應自二十九年
起。分別照章升科。造具民产地
畝花名數目清冊。一併詳請
查核前來。查寧遠局收過押荒
熟地。應歸入本年升科起徵
者。共計三百零七頃五十五畝
七分。每畝應徵正課銀一分
四釐。共銀四百三十兩零五錢
七分九釐八毫。每正銀一兩。
隨徵耗銀五分。共銀二十一兩
五錢二分八釐九毫九絲。遇
閏。每正銀一兩。加徵銀三分。
共銀十二兩九錢一分七釐三
毫九絲四忽。每兩隨徵耗銀五
分。共銀六錢四分五釐八毫。
六絲九忽七微。每畝加徵另租
銀四釐。共銀一百二十三兩
零二分二釐八毫。照例不加閏
耗。以上應徵各項銀兩。均經

交由寧遠廳自光緒二十九年。起照章徵收。十二月。保獎右翼墾務人員。奏伏查察哈爾右翼豐鎮寧遠兩廳屏藩大朔。連跨台羣。地勢袤延。至七八百里。從前晉省奏開地畝。事經兩次。時越十年。僅報墾地三千餘頃。押荒猶未一律徵齊。其辦理之繁難。固已概可想見。奴才上年到墾後。事端叢委。焚如亂絲。查舊墾則鞫鞫。逐待清釐。闢新荒則尺寸皆需勘丈。經奴才督飭奏調咨調。及晉省各員設局認真經辦。復因地畝皆在蒙旗。添調深明大義之蒙員。隨同辦理。該各員等或在奴才駐所。或在豐寧兩局分任要差。奴才隨時週歷考查。親見各員等晝夜勤動。手足胼胝。冒暑衝寒。奔走跋涉。荒山大漠。艱苦備嘗。開局未逾兩年。而全功已將告蕨。現在兩局開放各地。綜計在八成以上。徵收荒價亦逐

漸加增。按照前奉分別留解。冀增晉鄙版圖之廓。兼助司農涓滴之儲。且將來各地統行升科。計可歲增租賦數萬金。於國計亦不無小補。合無仰懇天恩。俯准將列保各員照擬給獎。以示鼓勵。出自逾格鴻慈。二以上均光緒十九年案

四月。東路墾務公司官股應得利銀。提存待撥。奏竊奴才前於光緒二十八年八月間。奏設東西兩路墾務公司。均係官商合辦。西路公司在包頭鎮地方。辦理伊烏兩盟各旗墾務。其要首在籌贖達拉特旗賠教地畝。為西墾入手之計。東路公司在張家口豐鎮寧遠及多倫獨石各廳地方。辦理察哈爾左右兩翼各旗墾務。義在除積年之宿弊。濟官力之弗周。當經分定章程。逐漸開辦。計兩路公司原擬各集股本銀十

二萬兩。官商各半。現查西路公司業將達旗賠教之地備款

籌贖顧全蒙教。惟已收之四成地。上年黃河漲漫。間被淤填。經該公司變通招放。所有應收地價銀兩。寬予限期。一時未能完繳。至伊盟各旗。已經先後報地。舉待經營。現在該公司獲利尚微。無庸即行截算。其東路墾務公司。於光緒二十八年冬間。由奴才借墊官本銀六萬兩。復招集商本銀六萬兩。嗣又多集商股十股。共一千二百一十股。計銀十二萬一千兩。即以二十九年正月為開辦之日。經奴才奏派山西即補道曹受培。及加派官局總辦江蘇存記道陳際唐。奉天補用同知張光鼐等。相與悉心籌布。詳定條章。大旨總以通上下之情。開商民之利。而又裨益公家為務。其始難於集股。其繼難在信民。其地痞奸商。不得濟其包攬之私。從而把持撓阻。若非操縱得宜。何克推行盡利。查公司與墾局相輔而行。凡

墾局所到之處。公司隨之。所有察哈爾左右翼各旗。隸於山西之豐寧及新設之興和陶林各廳。直隸之張多。獨三廳應墾地畝。除私墾越墾。向有鞦韆之地。仍須墾局結辦外。其餘生熟各地。一經墾局大明飭撥。即由該公司勘驗承領。分起繳納押荒地。歸公司。由公司發佃放墾。另有經營。惟按月將自行墾種與放出地段畝數及領戶花名。造具清冊。送由墾局核填部照。發交公司。分別存發。查自開辦之日起。截至二十九年年底止。所得發佃放墾利益。現經該公司清算結報。除開支員役薪工車馬川費局用等項。及照章付給各股週年股息銀五釐外。淨餘利銀一十五萬二千三百八十八兩四錢八分九釐。內照章提出二成花紅銀三萬四百七十七兩六錢九分七釐八毫。分酬任事人員。淨餘八成利銀十二

萬一千九百一十兩七錢九分一釐二毫。內再照章留存二成。作為公積。以便隨時添置墾種農具。計銀二萬四千三百八十二兩一錢五分八釐二毫。實餘淨利銀九萬七千五百二十八兩六錢三分二釐九毫。係官商各股實在應得之利。照章按股勻分。商股應由公司知照分領。其原入官本銀六萬兩。應分淨利銀四萬八千三百六十兩。再加應得二十九萬兩。分五釐年息銀三千兩。共庫平銀五萬一千三百六十兩。伏念時局日艱。國家練兵籌餉需款孔殷。但有涓滴之輸。亦屬壞流之助。此項官股所得利銀。係於墾局應收押荒之外。設法籌益之款。自應另行提存。除留尾零銀一千三百六十兩。為傾鎔火耗匪費之用。擬即將所存官股利息庫平銀五萬兩。儘數籌解。惟應解交何處。聽候飭撥應用。

七月擬撥直晉邊廳學堂地畝奏竊維當務莫急於興學而興學莫先於籌款此次奴才辦理察哈爾左右兩翼蒙荒為民旗開利賴之源尤應為學校廣教養之路查左翼地畝隸於於直隸之張家口獨石口多倫諾爾等三廳右翼地畝隸於山西之豐鎮寧遠興和陶林等四廳口外人不知學風氣未開非分建學堂無以資教育惟該各廳地居邊塞每苦於無從籌費舊廳既擴充之無力新廳更經始之惟難迭據紛紛稟請酌撥學堂地畝期歸久遠原係為振興學務起見奴才自當統籌兼顧免使向隅現在該兩翼蒙地雖放墾殆盡尚有餘荒擬即於劃撥蒙旗缺牧各地之外由左翼酌撥張獨多三廳學堂地各五千畝由右翼酌撥豐寧興陶四廳學堂地各五千畝均於放墾所餘較近廳治之地酌量分撥而每

廳總以五千畝為準。以昭劃一。查此項荒地。如果開墾成熟。每畝每年可租銀一錢上下。以每廳五千畝計之。約每年收銀四五百兩之譜。於學堂經費不無裨益。又附奏。再察哈爾右翼正黃旗三、五、七、八蘇牧之間。有山西大同鎮署馬廠官地。前署大同鎮胥明德以綠營漸次減汰。留存馬匹無多。無須赴廠牧放。議將該馬廠地畝招佃墾種。於光緒二十五年間。設局招租。共租出廠地二十號零。計一百零二頃五十畝。每年定官租銀三百五十兩。因辦理未善。鞦韆叢生。經升任大同鎮劉光才交歸豐鎮墾務局。會同豐鎮廳將該廠舊有地業節次清結。易租戶為領戶。其未放餘地亦均招民認領。現在放墾已竣。照章飭交押荒。給領部照。一律按限升科。所收押荒銀兩。及以後升科租賦。自應仍照已裁各營路地租。

屯租辦法。由該局廳解交山西司庫。湊充軍餉。以符原案。
十二月。豐寧墾地升科案。奏據豐鎮墾務局詳稱。自上年詳
報升科地畝後。截至二十九年十二月底止。又收過新放正
黃正紅兩旗各蘇木及已經開墾之大小台站官羊羣並大
同鎮馬廠各項押荒地共六千二百九十三頃三十畝三分。
內除大同鎮馬廠地九十一頃四十九畝三分。應遵照奏案。
將所收押荒銀兩及以後升科租賦。解歸山西司庫。湊充兵
餉外。實在官荒應行升科地六千二百一頃八十一畝。分別
已墾未墾及升科啟徵年限。造具民戶花名地畝數目清冊。
詳請查核。又據寧遠墾務局詳稱。自光緒二十九年正月初
一日起。截至年終。又自三十年正月初一日起。截至六月底
止。共收過新舊押荒銀兩計地三千六百九十一頃七十二

畝九分四釐二毫。分別已墾未墾及升科年分。造具清冊。詳請查核。各等情前來。查豐寧兩局冊報收過押荒已墾熟地。應歸三十年升科啟徵者。共六千二百九十五頃六十二畝五釐四毫。每畝徵正課銀一分四釐。共徵銀八千八百一十三兩八錢六分八釐七毫五絲六忽。每正銀一兩隨徵耗銀五分。共徵銀四百四十兩六錢九分三釐四毫三絲七忽八微。遇閏每正銀一兩加徵銀三分。共徵銀二百六十四兩四錢一分六釐六絲二忽六微八纖。每兩隨徵耗銀五分。共徵銀十三兩二錢二分八毫三忽一微三纖四沙。又內除甘草台蒙旗小台站地三頃八十畝八分。援照海州^勝爾台成案。每畝加徵水草銀一分二釐。共徵銀四兩五錢六分九釐六毫。由該蒙員承領。以充差費。毋庸再徵另租外。其餘熟地六千

| | | | | | | | | | | | |
|---|---|---|---|---|---|---|---|---|---|---|---|
| 二 | 七 | 八 | 耗 | 共 | 分 | 二 | 一 | 千 | 例 | 釐 | 二 |
| 年 | 釐 | 沙 | 銀 | 徵 | 六 | 忽 | 分 | 三 | 不 | 共 | 百 |
| 升 | 一 | 每 | 五 | 銀 | 釐 | 每 | 四 | 百 | 加 | 徵 | 九 |
| 科 | 毫 | 畝 | 分 | 二 | 七 | 正 | 釐 | 九 | 閏 | 銀 | 十 |
| 啟 | 五 | 徵 | 共 | 兩 | 毫 | 銀 | 共 | 十 | 耗 | 二 | 一 |
| 徵 | 絲 | 另 | 徵 | 五 | 五 | 一 | 徵 | 三 | 其 | 千 | 項 |
| 者 | 二 | 租 | 銀 | 八 | 絲 | 兩 | 銀 | 頃 | 未 | 五 | 八 |
| 共 | 忽 | 銀 | 四 | 兩 | 一 | 五 | 一 | 六 | 墾 | 百 | 十 |
| 二 | 照 | 四 | 釐 | 錢 | 忽 | 千 | 千 | 十 | 之 | 一 | 一 |
| 千 | 例 | 共 | 共 | 三 | 六 | 九 | 九 | 六 | 地 | 十 | 畝 |
| 二 | 不 | 徵 | 徵 | 分 | 微 | 百 | 百 | 六 | 應 | 六 | 二 |
| 百 | 加 | 銀 | 銀 | 四 | 遇 | 五 | 五 | 畝 | 歸 | 兩 | 分 |
| 四 | 閏 | 五 | 五 | 釐 | 閏 | 十 | 十 | 七 | 三 | 七 | 五 |
| 頃 | 耗 | 百 | 百 | 五 | 每 | 一 | 一 | 分 | 十 | 錢 | 釐 |
| 二 | 其 | 五 | 七 | 絲 | 正 | 兩 | 兩 | 八 | 一 | 二 | 毫 |
| 十 | 未 | 十 | 七 | 九 | 銀 | 加 | 五 | 釐 | 年 | 分 | 每 |
| 五 | 墾 | 七 | 毫 | 微 | 一 | 徵 | 錢 | 毫 | 升 | 五 | 畝 |
| 畝 | 之 | 兩 | 二 | 六 | 兩 | 銀 | 三 | 每 | 科 | 釐 | 一 |
| 一 | 地 | 四 | 忽 | 纖 | 加 | 九 | 分 | 畝 | 啟 | 一 | 分 |
| 分 | 應 | 錢 | 五 | 每 | 徵 | 十 | 五 | 徵 | 徵 | 每 | 每 |
| 每 | 歸 | 六 | 微 | 兩 | 銀 | 七 | 釐 | 正 | 者 | 畝 | 畝 |
| 畝 | 三 | 分 | 四 | 隨 | 三 | 兩 | 三 | 課 | 共 | 徵 | 徵 |
| 徵 | 十 | 分 | 纖 | 徵 | 分 | 五 | 絲 | 銀 | 一 | | |
| | | | | | | | | | | | |

正課銀一分四釐。共徵銀三千八十五兩九錢五分一釐四毫。每正銀一兩隨徵耗銀五分。共徵銀一百五十四兩二錢九分七釐五毫七絲。遇閏每正銀一兩。加徵銀三分。共徵銀九十二兩五錢七分八釐五毫四絲二忽。每兩隨徵耗銀五分。共徵銀四兩六錢二分八釐九毫二絲七忽一微。每畝徵另租銀四釐。共徵銀八百八十一兩七錢四毫。照例不加閏耗。以上應徵各項銀兩。均經交由豐鎮、寧遠兩廳。並由該廳分撥新設之興和、陶林等廳。查照升科年分。分別徵加。又附奏。再上年豐寧墾務兩局造報應升科地畝。業經奏明在案。嗣據豐鎮局續報收過押荒熟地二十六頃七十畝。查係押荒局辨結地畝。應歸入光緒二十九年升科。又據寧遠局續報。光緒二十八年收過押荒未墾地九十六頃五十三畝六

| | | | | | | | | | | | |
|-------------------------|-------------------------|-------------------------|-------------------------|-------------------------|-------------------------|-------------------------|-------------------------|-------------------------|-------------------------|-------------------------|-------------------------|
| 一絲二忽每兩隨徵耗銀五分共徵銀二錢二釐七毫二絲 | 遇閏每正銀一兩加徵銀三分共徵銀四兩五分四釐五毫 | 一兩隨徵耗銀五分共徵銀六兩七錢五分七釐五毫二絲 | 銀一分四釐共徵銀一百三十五兩一錢五分四毫每正銀 | 收過押荒未墾荒地九十六頃五十三畝六分每畝徵正課 | 銀四釐共徵銀十兩六錢八分照例不加閏耗寧遠局續報 | 毫每兩隨徵耗銀五分共徵銀五分六釐七絲每畝徵另租 | 閏每正銀一兩加徵銀三分共徵銀一兩一錢二分一釐四 | 每正銀一兩隨徵耗銀五分共徵銀一兩八錢六分九釐過 | 畝每畝應徵正課銀一分四釐共徵銀三十七兩三錢八分 | 奏升科查豐鎮局續報收過押荒已墾熟地二十六頃七十 | 分應於三十一年升科改徵各等情上年未及核辦亟應補 |
|-------------------------|-------------------------|-------------------------|-------------------------|-------------------------|-------------------------|-------------------------|-------------------------|-------------------------|-------------------------|-------------------------|-------------------------|

五忽六微。每畝徵另租銀四釐。共徵銀三十八兩六錢一分。
四釐四耗。^耗照例不加閏耗。以上應徵各項銀兩均經交由豐
鎮寧遠兩廳。並由該廳分撥新設之興和等廳查照升科年
限分別徵。以上均光緒三十年業

十二月豐寧壑地升科。奏據豐鎮壑務局詳報。光緒三十年

收過押荒地畝。除大同鎮馬廠地四十一頃一十一畝一分

及續報之三十四頃五十三畝六分。應遵照奏案。將所收押

荒銀及以後升科租賦解歸山西司庫。湊充兵餉外。實計應

行升科地一千六百一十九頃三十二畝四分二釐。又興和

廳詳報。光緒三十年收過押荒地畝。應撥由豐鎮升科地計

三百六十一頃六十畝五分。應由興和升科地一千三百二

十二頃三十七畝八分。又據寧遠廳詳報。自光緒三十年七

| | | | | | | | | | | | |
|--------------------------|---------------------------|----------------------------|--------------------------|--------------------------|--------------------------|---------------------------|-------------------------|--------------------------|---------------------------|---------------------------|---------------------------|
| 銀一百四十二兩二錢五釐三絲六忽四微。每兩隨徵耗銀 | 兩八釐三毫九絲四忽。遇閏每正銀一兩加徵銀三分。共徵 | 八毫八絲。每正銀一兩。隨徵耗銀五分。共徵銀二百三十七 | 正課銀一分四釐。共徵銀四千七百四十兩一錢六分七釐 | 行升科地三千三百八十五頃八十三畝四分二釐。每畝徵 | 歸三十三年升科者一百八十一頃三十一畝二分。統共應 | 分二釐。應歸三十二年升科者六百四頃八十五畝三分。應 | 歸三十一年升科者計地二千五百三十八頃九十五畝六 | 其應歸光緒三十年升科者計地六十頃七十一畝三分。應 | 請核辦各等情。前來奴才詳加查核該局等冊報放墾地畝。 | 五十二畝七分。均分別已墾未墾及升科年分。造具清冊詳 | 月初一日起。截至年底止。收過押荒應行升科地八十二頃 |
|--------------------------|---------------------------|----------------------------|--------------------------|--------------------------|--------------------------|---------------------------|-------------------------|--------------------------|---------------------------|---------------------------|---------------------------|

五分。共徵銀七兩一錢一分二毫五絲一忽八微二纖。又內
除蒙旗小台站霍素巴勒格蘇台地五頃甘草台地一十四
頃一十一畝二分。援照海腦台下成案。每畝加徵水草銀一分
二釐。共徵銀二十二兩九錢三分四釐四毫。由該蒙員承領。
以充差費。毋庸再徵。另租外其餘墾地三千三百六十六頃
七十二畝二分二釐。每畝徵另租銀四釐。共徵銀一千三百
四十六兩六錢八分八釐八毫八絲。照例不加閏耗。均經交
由豐鎮寧遠興和三廳查照升科年分。分別徵收。又附奏再
籌辦察哈爾左右兩翼墾務。前經詳定章程。奏明於升科正
項外。王公馬廠每畝隨徵私租銀四釐。由該地主向官領取。
其官荒空間地。每畝亦隨徵歸公。另租銀四釐。以備口外新
開地方善後之需。分飭辦理在案。現在新墾熟地。皆已陸續

升科。所有此項另租銀兩。自應按年分別撥用。蹠泔杯水。本
不足以資辦公。惟查直晉邊廳辦理警務捕務。需款孔殷。而
察哈爾之整頓旗防。綏遠城之擴充新政。亦在在資籌措。
撮壤細流之助。豈曰無補。擬即將另租一項。飭令直晉經徵
各邊廳計。每歲所收。各以一半留備該地方善後經費。其餘
一半。則徵自左翼者。解歸察哈爾。徵自右翼者。解歸綏遠城。
雖為數無多。而涓滴之儲。有資公用。如此量為分濟。兼顧不
遺。庶於地方邊防。皆有裨益。除飭各該廳遵照辦理。仍將經
徵數目。每屆年季造報備提。暨咨明戶部。直晉察哈爾查照。
又附奏。再奴才於光緒三十年七月十六日附奏。開放山西
大同鎮廠地。所收押荒銀兩。及升科租賦。仍照已裁各營路
地租屯租辦法。由該局廳解交山西司庫。湊充兵餉。以符原

案當奉硃批戶部知道。欽此。欽遵。業將光緒二十九年收過
此項押荒地九十一頃四十九畝三分。造送升科押荒清冊
暨截存照根二十張。咨送戶部。並將此項押荒銀兩撥交山
西司庫驗收在案。茲據豐鎮墾務局將光緒三十年截至年
底止收過該廠押荒地四十一頃一十一畝一分。填發部照。
造具升科押荒清冊。又於三十一年將該廠押荒掃數徵齊。
計地三十四頃五十三畝六分。填發部照。造具升科押荒清
冊。並將所徵押荒銀兩批解。詳請核辦前來。奴才查大同鎮
馬廠官地共計一百六十七頃一十四畝。現經該局徵齊押
荒。自應及時奏結。至所收此項押荒銀兩。及升科後所收租
賦。應由山西巡撫自行酌核報銷。除將該局解到押荒銀一
千五百一十二兩九錢四分。撥歸山西提用。及將來所收租

| | | | | | | | | | | | |
|-------------------------|-------------------------|-------------------------|-------------------------|--|-------------------------|-------------------------|-------------------------|-------------------------|-------------------------------------|-------------------------|-------------------------|
| 賦仍飭豐鎮廳解歸山西司庫並將該局造送升科押荒各 | 清冊咨送戶部暨山西巡撫查照又附奏再本年口外地方 | 秋收歉薄間有亢旱成災之處而新開地畝民力尤艱茲據 | 署興和廳同知陳時隽詳稱該廳墾務公所光緒三十年收 | 過察哈甲圪素台正黃旗羊馬羣四蘇牧 <small>木</small> 九蘇牧 <small>木</small> 蒲州蘇牧 <small>木</small> | 甘草台等處押荒地一千三百二十二頃三十七畝八分應 | 照章升科歸於本年啟徵業經造冊詳請奏咨在案茲查本 | 年自春徂夏雨澤愆期六七月間亢旱尤甚田苗萎壞民戶 | 困苦不堪請將前項升科地畝應徵正課另租銀兩一律緩 | 至明年秋後啟徵以示體恤 <small>三以上均光緒業緒</small> | 十月右翼徵收押荒銀兩截至光緒三十年底報部核銷奏 | 竊查察哈爾右翼墾務前經奴才會同調任察哈爾都統奎 |
|-------------------------|-------------------------|-------------------------|-------------------------|--|-------------------------|-------------------------|-------------------------|-------------------------|-------------------------------------|-------------------------|-------------------------|

順於光緒二十八年六月間奏陳辦法曾經聲明大放新案
各地每畝徵收押荒銀二錢加收辦公銀一錢各等因當飭
右翼墾務局遵照辦理並節經奴才將分年升科地畝數目
先後奏咨在案茲查豐鎮墾務局自二十八年五月初一日
開局之日起寧遠墾務局自二十八年十月二十日開局之
日起均截至三十年十二月底止共辦結地一萬三千四百
四十七頃八畝二分六釐二毫照章每畝徵收押荒正銀二
錢計實收押荒庫平銀二十六萬八千九百四十一兩六錢
五分二釐四毫係應解交部庫之款惟查奴才於二十九年
十一月間籌議晉省口外新設各廳常年經費奏請將所收
押荒銀兩截留四成提撥應用復因後套賊匪起事綏遠徵
兵撥隊及隨時保護教堂需款尤繁於三十年三月間奏請

由截留四成押荒項下核實動用。將來晉用若干。綏用若干。
俟事竣開報。奉旨允行遵辦。除陸續撥充口外新廳公費共
庫平銀九萬二千五百三兩九錢四分五釐九毫六絲。又除
撥交綏遠城防邊護教軍隊等項經費共庫平銀一萬五千
七十二兩七錢一分五釐二宗共撥庫平銀十萬七千五百
七十六兩六錢六分九毫六絲。均在應行截留四成押荒款
內。分別撥交外實應解交部庫六成押荒庫平銀十六萬一
千三百六十四兩九錢九分一釐四毫四絲。內除於二十九
三十等兩年分由商號兩次解交部庫共庫平銀十萬兩。又
除奏准墊撥綏遠城籌給準噶爾旗教案撫卹銀兩。除陸續
收到該旗劃交賠款地畝歲租。按年抵還外。截至三十一年
年底止。計墊給押荒庫平折合庫平銀二萬六千三百五兩

九錢四釐八毫四絲九忽四纖。又除准照部咨撥交科布多
撫卹俄商庫平銀三千兩。共解撥庫平銀二十三萬六千八
百八十二兩五錢六分五釐八毫九忽四纖。實在應存解部
庫押荒庫平銀三萬二千五十九兩八分六釐五毫九絲九
微六纖。均暫撥墊辦墾經費。另案造報。此外豐寧興三廳尚
有已經丈放荒地一萬餘頃。因口外連年歉收。押荒經費均
未徵齊。應俟各該局催收完解到日。即將前項應解部庫之
款。由續收經費項下。如數歸還補解。據行轅收支處核造詳
冊呈請奏咨前來。奴才覆核無異。除將各冊咨部查核外。所
有察哈爾右翼墾務各局經徵押荒銀兩。截至光緒三十年
十二月底止。謹分別解部。截留及現存各數目。造冊送部核
銷。飭部覈覆。

十月右翼徵收四六分經費銀兩。截至光緒三十年底報部核銷奏竊查察哈爾右翼墾務前於光緒二十八年六月間經奴才奏陳辦法擬定每畝徵收押荒銀二錢外收辦公銀一錢以六分作官局經費四分作蒙協同辦墾公費二十九

年八月間奴才復會同察哈爾都統副都統於奏撥左右翼官兵缺牧地摺內因世職一項未便給以業田請由四分經費內每旗提銀一千兩交地方官發商生息所得利銀查取世職並孤寡蒙民按名勻給其各召廟香火地畝由官局確查清理惟勘丈需費令照章繳押荒一半以濟公用又於是

年十一月間會同前山西撫臣察哈爾都統副都統奏明辦理蒙旗墾務在歸化設立行轅其隸行轅之局文案收支兩

處暨墾務總局統於二十八年五月初一日開辦豐鎮局係

右翼舊押荒局改設。亦於是日接辦。因鑲紅鑲藍兩旗距豐較遠。是年十月二十日另立寧遠分局。所有各局處員司人等額數及開支薪工等項章程奏咨立案。經部覆准。三十一年三月復奏陳豐寧兩局墾務將竣。請將未竟事宜款繳押荒。交各該處廳官接管催徵。仍留委員四五員書役七八人。經管收支文放剩存地畝。其餘各員截至三十年十月底一律分別調遣。惟豐局新放路遠之地。民歉押荒尚鉅。請在新設興和廳設立公所。並飭興和同知會同經理。俟押荒催齊裁撤等因。先後奉旨允准。各在案。遵即飭將各局處辦事各員銜名到墾到局更調裁減及分別起止薪水各日期自開辦起截至三十年以後均照部咨造冊送由墾務行轅收支處彙核分造清冊送部查核等因去後查兩翼墾務加收辦

公經費。折為六分四分。原為分清款目。以免混淆。惟六分一項。除各該局開支之外。所存無多。若提為行轅各局處支用。不敷甚鉅。自應由各壑局四分經費內。核其剩存若干。悉歸行轅辦壑經費項下。抵充各局員司薪工等款。以公濟公。核與原奏章程。亦無不合。茲查察哈爾右翼蒙旗協同辦壑四分經費一項。豐寧兩局自二十八年各該局開辦之日起。均截至三十年十二月底止。共文放豐寧興三廳所屬各旗羣台地一萬三千四百四十七頃八畝二分六釐二毫。照章每畝徵銀四分。共收過庫平銀五萬三千七百八十八兩三錢三分四毫八絲。每百兩以四兩二錢伸合湘平銀五萬六千四十七兩四錢四分三毫六絲一微六纖。自各局開辦之日起。截至三十年十月底裁併之日止。共動放過右翼各旗羣

台隨同指界分界清結蒙案各蒙員津貼並世職孤寡津貼
生息等項湘平銀一萬五千七十七兩六錢九分八釐應存
湘平銀四萬九百六十九兩七錢四分二釐三毫六絲一微
六纖儘數撥入辨墾六分經費項下抵充各局處員司薪水
等項之用其六分經費一項按每畝六分徵收共收過庫平
銀八萬六百八十二兩四錢九分五釐七毫二絲伸合湘平
銀八萬四千七十一兩一錢六分五毫四絲二微四纖又由
四分經費項下撥來剩存湘平銀四萬九百六十九兩七錢
四分二釐三毫六絲一微六纖又由兩局徵存應解部庫六
成押荒項下撥來借墊辨墾經費庫平伸合湘平銀三萬三
千四百五兩五錢六分八釐二毫二絲七忽七微八纖又兩
局文放召廟地每畝徵收一半押荒銀一錢五分共收庫平

伸合湘平銀四千三百七十四兩七錢九分一毫一絲。又收
豐局丈放大同鎮馬廠地徵收辦墾經費項下撥來剩存湘
平銀一千二十六兩四錢一分八釐八毫。又由左翼局徵存
應解部庫六成押荒項下撥來借墊辦墾經費庫平伸合湘
平銀四萬一千三百五十二兩三錢二釐六毫七絲四微。又
由左翼局解交丈放王公牧地。每畝經費一錢。內除六分歸
該局辦墾經費另銷外。剩存四分經費庫平伸合湘平銀二
萬八千九百六十一兩八錢三分三釐九毫八絲八忽八微。
又左翼局解交察哈爾都統衙門撥給丈撥張獨伊犁三駐
防缺地辦墾經費庫平伸合湘平銀八千二百八十三兩九
錢。統共收過湘平銀二十四萬二千四百四十五兩七錢一
分六釐六毫九絲七忽三微八纖。動支督辦大臣並行轅各

局處員司等自開辦起截至三十年十二月底止共支過公
費薪工等項。湘平銀十四萬四千七百二兩六錢。又豐寧兩
局員司等自開辦起截至三十年十月底裁併之日止共支
過薪工等項。湘平銀六萬一千七百四十二兩四錢九分。又
勳支兼辦墾務各地方官自開辦起截至三十年十二月底
止共支過津貼。湘平銀三千四百一兩。又准部咨提解右翼
照費庫平伸合。湘平銀一千四十二兩。又兩次匯解部庫押
荒支過商號匪費庫平伸合。湘平銀一千六百六十七兩二
錢。以上各款遵照部章各歸各部核銷。共應歸戶部核銷。湘
平銀二十一萬二千五百五十五兩二錢九分。又除歸兵部
核銷督辦大臣並行轄各局處員司等出差車馬費等項。自
開辦起截至三十年十二月底止共湘平銀七千二百四十

八兩八錢一分。豐寧兩局員司等出差文地車馬費等項自
開辦起截至三十年十月底裁併之日止共湘平銀二萬一
千三百五十一兩五錢一分。又歸工部核銷製造各項工料
湘平銀五百六十一兩九錢九分四釐。統共支過湘平銀二
十四萬一千七百一十七兩六錢四釐。應存湘平銀七百二
十八兩一錢一分二釐六毫九絲七忽三微八纖。歸於下屆
辦墾經費內舊管項下。滾接造報。由行轅收支處造具總散
各冊呈請奏咨。送部銷核。飭部覈覆。以上均光緒
三十二年案

以上東墾奏案

案綏墾參案調查記。察哈爾右翼墾局前截放地。自光緒

二十八年五月起。至三十年十二月底止。計豐鎮廳地五

千六百四十三頃八十四畝六分二釐。寧遠廳地三千九

百四十一頃九十六畝五分四釐二毫。興和廳地三千八百六十一頃二十七畝一分。共地一萬三千四百四十七頃八畝二分六釐二毫。共荒價庫平銀四十萬三千四百一十二兩四錢七分八釐六毫。又後截放地。自三十一年正月。起至三十四年四月十一日止。豐鎮廳地一千八百九十六頃九十九畝七分。寧遠廳地三百一頃三十四畝一分四釐。陶林廳地一百八十六頃八十四畝。興和廳地三千九百五十二頃六十六畝九分。共地六千三百三十七頃八十四畝七分四釐。共荒價銀一十九萬一百三十五兩四錢二分。又自光緒二十八年八月起。至三十四年四月十一日。停辦止。復文放豐寧陶各廳屬餘地。計放各蘇木餘地四百四頃一十九畝七分。照章每畝徵押荒三

錢。共應徵押荒銀一萬二千一百二十五兩九錢一分。棠
祥寺餘地三十頃七十七畝五分。照各廟地每畝徵減半
押荒一錢五分。共應徵押荒銀四百六十一兩六錢二分五釐。共
計丈放各蘇木及各廟餘地四百三十四頃九十七畝二
分云。案上列前後截及餘地三項地畝。共為二萬二百一
十九頃九畝二分。此貽任內辦理東四旗墾務丈放地畝之
總數也。惟此項地數。僅為清末辦墾所放在綏東五縣額
徵地約有十萬頃。從前經過墾放事蹟。迄今無可詳考。則
以豐寧兩廳即今東五縣地。晚在光緒中年始隸屬歸綏道。改隸
之時。官府文移。往往僅有徵糧冊籍。而無歷辦底案。况加
以年代久遠。卷檔殘闕乎。今僅於豐鎮涼城田賦檔案內
關於各地招佃升科。附註年月畧。可見其大概。
豐鎮之舊地民糧雍

| | | | | | | | | | | | | | | |
|--------------------------|--------------------------|-------|------------------------|------------------------|------------------------|------------------------|-----------------------|------------------------|-------------------------|------------------------|------------------------|----------------------|-----------------------|------------------------|
| 侍郎紹英馳赴綏遠一併碣實查辦時經兩旬回京覆命查奏 | 光緒三十四年四月參案既起朝命以大學士鹿傳霖理藩院 | 明其原委耳 | 符也特自雍乾以來墾政如何設施今以文獻難徵弗克 | 之地亦屬不少今綜計東五縣田賦固與十萬頃之數相 | 年續墾至光緒年間幾經清墾迭有增益入民國後升科 | 蓋自乾隆以還四旗境內土地始大興招墾嘉慶道光節 | 均為莊舊地十甲嘉慶年放新地八甲道光放地六甲 | 寧遠廳劃撥新舊續地二十餘甲分三次開放清乾隆有 | 祥寺等地均納木王謹慶及兵米折色均王恒祿德齊恒林 | 公凝升顯納木王謹慶及兵米折色均王恒祿德齊恒林 | 後撥歸鄭親王嘉慶年墾米克勤郡王營德原歸山西均 | 光緒年墾涼城八年三村地雍正年墾原歸山西均 | 五等圖廟道年八相公祿公紅正年營德原歸山西均 | 正年由直隸張溝禮親王等管大糧隆折太僕寺承安旗 |
|--------------------------|--------------------------|-------|------------------------|------------------------|------------------------|------------------------|-----------------------|------------------------|-------------------------|------------------------|------------------------|----------------------|-----------------------|------------------------|

大旨。以誤認宗旨。誤用小人之二誤。巧立公司。朦放站地。隱匿墾款。誤殺台吉之四罪。臚列以聞。旋奉上諭。畧曰。前據歸化城副都統文哲琿奏。參貽穀敗壞邊局。欺蒙取巧。蒙民怨恨各款。當令鹿傳霖。紹英前往。確查嗣據。貽穀奏。參文哲琿等。侵吞庫款。亦即諭令鹿傳霖等。一併查辦。茲據查明覆奏。貽穀督辦墾務。有二誤。四罪等語。朝廷放墾蒙地。意在開荒備邊。並非攘地圖利。乃貽穀不顧藩部邊氓大局。祇為一己罔利起見。專用小人。苛索取巧。以官地墾局。巧立公司名目。輒轉漁利。定章每畝地價三錢。公司輒浮收八錢。墾熟之地。亦復勒繳地價。甚至房基廬舍。鋪面街道。勒交租價。每畝竟多至三百數十兩。且縱勇濫殺。燒斃台吉丹丕爾一家五命之多。復羅織成獄。輒將丹丕爾置諸重辟。尤屬殘酷無比。所收地價。以八錢計。約收銀四百

餘萬兩。除支撥有案及代為約計用款外。其查無用項者。尚二百餘萬之多。顯係貽穀及各員等朋分吞蝕。貽穀又需索蒙旗。扣留荒價。揀改官缺。批索銀兩。開設鋪店。剝兵扣餉。似此貪殘。相濟。擾害蒙民。敗壞墾局。實屬辜恩負國。縱遠城將軍貽穀。着革職拿問。由山西巡撫派員押解來京。交法部審訊。監追治罪。文哲瑋於庫款亦有侵挪。且向來阿附貽穀。聽其苛斂。隨同畫諾。着交部嚴加議處。其隨同婪賄虐蒙之山東候補道斌儀。聚斂附益。婪款不貲。雲南候補直隸州知州景禔。苛暴險詐。商賈共憤。五原廳同知姚學鏡。心貪手辣。率定爰書。着即行革職。拿交法部監追治罪。署東勝廳同知岳鍾麟。讐蒙誣判。幾壞邊局。山西候補知縣吳棟棻。以兵壓民。形同寇盜。分省補用府經歷誌良。逼追地價。慘用非刑。均着革職。發往新疆。効力贖罪。候補

通

參將譚勇發虛報冒功。縱兵擄物。着革職。發往軍台効力贖罪。
 分省補用知府陳光遠直隸州知州許桂棻山西候補直隸知
 州呂繼純。郝敬瑞。余寶滋。知縣鄭天馥。林毓杜。喬懋蔭。通泰。均
 屬驕謔互用。迎合殃民。着一併革職。所有貽穀歷年辦墾保案。
 着該部查明。一併撤銷。塔爾巴哈台參贊大臣榮昌。着解任。赴
 綏遠。交接任將軍切實查辦。餘着照所議辦理。至鹿傳霖等條
 陳善後事宜。及請派員接辦等語。着派信勤前往接充督辦墾
 務大臣。暫行兼署綏遠城將軍。查照鹿傳霖等各條辦法。體察
 情形。妥籌辦理。務期痛除積弊。既須振興墾務。尤須深恤蒙艱。
 以示朝廷撫綏藩部之至意。欽此。等因。蒙此。自應遵旨。派員押
 解。除札委候補知府何見揚。劉守德。刻速馳往綏遠城。帶同看
 管。俟奉廷寄。再行飭遵。給咨起解外。合亟札飭。札到該道即便

遵照切切特札。又奉撫憲札開。准軍機處電開。奉旨。信勤未到。任以前。墾務大臣。綏遠城將軍。印務。着歸綏道。胡孚宸。暫行護理。欽此。文哲璋。亦經部議革職。歸綏道。胡孚宸。護理篆務。一月。後。繼任將軍。兼墾務大臣。信勤。於六月。到綏。接任。辦理墾務。善後事宜。墾務經參案。以後。繼任將軍。對於貽任內。未完各事。接續清理。已辦各事。切實調查。並由部派專員來綏。會同墾當局。設置專處。於從前墾款收支。詳確調查。經時二載。始克竣事。製有綏墾參案調查總案。經貽任。文放。各項地畝。及墾務行轅收支處。墾務總局。暨東西兩路公司。前後收支款目。逐項列表。勾稽核算。極為詳盡。而結果。仍與貽之遞部供狀。大體無甚出入。於是部臣察其情罪。未符。而礙於前此嚴旨。又未便遽從寬宥。遷延至宣統三年。始以遣戍川邊結案。

貽奉旨甫就道。適值川漢路事變起。以路梗。遂

州。留易

參案調查

記

有總論西墾一則。觀其叙述各節。固與實地

情事大致相同。核諸貽任歷次奏陳事理。亦無比較懸殊之處。

則知當日調查者對貽案已有相當之諒解。意在言外矣。

信勤至宣統二年十月卸任。其間除清理從前收支各款。及未

繳荒價外。他如杭旗渠地。勘收之後。丈放未竣。渠工用款。尚未

結報。驛站地及寧遠餘地。所收地價。亦未清結。此即原參案內

所指為隱匿墾款之最大節目也。信任內着手清理。以勘收杭

旗地。畝興修各渠。均未辦竣。且已出鉅款。利在將來。必須續行

丈放。整頓渠道。以竟前功。於宣統元二年間。復丈放杭旗東巴

噶中巴噶地一千二百餘頃。二年。經信勤及繼任將軍瑞良任

內。將驛站地河東西十一台已放各地。議定改荒價為官租。辦

法。按年徵收。蓋因原參案內有站地仍歸原主之議。故改荒為

租以示租而不放之意。斯時墾務節節清釐，專務收縮。原設墾務行轅，是年以事務從簡，縮小範圍，改為綏遠墾務公所。瑞良三年正月卸任，桂春繼之。甫及一月，即去任。莒岫繼之。國元年卸任。直至宣統末年，墾務公所於經理已放各地及收束未了各事而外，於放墾一事無所進行。當墾案嚴厲參辦之後，墾款切實查究之餘，官廳地方言及開放蒙荒，幾同談虎色變。綏墾在此時期不能有所進展，亦其情勢使然也。

